



This is a digital copy of a book that was preserved for generations on library shelves before it was carefully scanned by Google as part of a project to make the world's books discoverable online.

It has survived long enough for the copyright to expire and the book to enter the public domain. A public domain book is one that was never subject to copyright or whose legal copyright term has expired. Whether a book is in the public domain may vary country to country. Public domain books are our gateways to the past, representing a wealth of history, culture and knowledge that's often difficult to discover.

Marks, notations and other marginalia present in the original volume will appear in this file - a reminder of this book's long journey from the publisher to a library and finally to you.

Usage guidelines

Google is proud to partner with libraries to digitize public domain materials and make them widely accessible. Public domain books belong to the public and we are merely their custodians. Nevertheless, this work is expensive, so in order to keep providing this resource, we have taken steps to prevent abuse by commercial parties, including placing technical restrictions on automated querying.


We also ask that you:


- + *Make non-commercial use of the files* We designed Google Book Search for use by individuals, and we request that you use these files for personal, non-commercial purposes.
- + *Refrain from automated querying* Do not send automated queries of any sort to Google's system: If you are conducting research on machine translation, optical character recognition or other areas where access to a large amount of text is helpful, please contact us. We encourage the use of public domain materials for these purposes and may be able to help.
- + *Maintain attribution* The Google "watermark" you see on each file is essential for informing people about this project and helping them find additional materials through Google Book Search. Please do not remove it.
- + *Keep it legal* Whatever your use, remember that you are responsible for ensuring that what you are doing is legal. Do not assume that just because we believe a book is in the public domain for users in the United States, that the work is also in the public domain for users in other countries. Whether a book is still in copyright varies from country to country, and we can't offer guidance on whether any specific use of any specific book is allowed. Please do not assume that a book's appearance in Google Book Search means it can be used in any manner anywhere in the world. Copyright infringement liability can be quite severe.

About Google Book Search

Google's mission is to organize the world's information and to make it universally accessible and useful. Google Book Search helps readers discover the world's books while helping authors and publishers reach new audiences. You can search through the full text of this book on the web at <http://books.google.com/>

A 931,510







SOCIÉTÉ DES TEXTES FRANÇAIS MODERNES

JACQUES AMYOT

LES VIES
DES HOMMES ILLUSTRES
GRECS ET ROMAINS

PERICLES ET FABIVS MAXIMVS

ÉDITION CRITIQUE

PUBLIÉE PAR

LOUIS CLÉMENT



PARIS

PUBLICATIONS DE LA S^TE NELLE DE LIBRAIRIE ET D'ÉDITION
(ANCT RUE CUJAS)

ÉDOUARD CORNÉLY ET C^{IE}, ÉDITEURS

101, RUE DE VAUGIRARD, 101

1906



LES VIES
DES
HOMMES ILLUSTRÉS GRECS ET ROMAINS

PERICLES ET FABIVS MAXIMVS

pressee que claire, polie ou aisee, qui est propre à Plutarque » ; car « l'office d'un propre traducteur ne gist pas seulement à rendre fidelement la sentence de son auteur, mais aussi à représenter aucunement et à adombrer la forme du style et maniere de parler d'iceluy ».

Quoi qu'il en soit, ce n'est plus aujourd'hui dans l'interprétation d'Amyot que nous allons chercher la pensée, ou, comme le disait Montaigne « l'imagination vraie de Plutarque. » Mais nous lisons Amyot, comme nous ferions un écrivain original : il appartient à la littérature française.

Montaigne en faisait son bréviaire ; il y revient presque à chaque page de ses *Essais*, pour le citer ou pour le commenter ; il en goûtait « la naïveté et pureté de langage. » C'était encore l'avis de Vaugelas qui tenait Amyot pour avoir su mieux que personne « le génie et le caractère de notre langue ». « Bien que nous ayons retranché, disait-il, la moitié de ses phrases et de ses mots, nous ne laissons pas de trouver dans l'autre moitié presque toutes les richesses dont nous nous vantons et dont nous faisons parade »¹. Vaugelas considérait Amyot comme le meilleur prosateur du xvi^e siècle ; cette admiration serait plus qu'excessive, s'il fallait y voir l'exclusion d'écrivains tels que Rabelais et Montaigne ; mais Vaugelas pensait à la langue plus qu'au style, et d'ailleurs le style même d'Amyot, toujours égal et soutenu, était bien fait pour plaire aux honnêtes gens du xvii^e siècle.

Quant à ces richesses verbales, d'autres qu'Amyot pouvaient les revendiquer, du moins pour une partie. Sans parler de Rabelais, des érudits, comme Estienne Dolet², avaient déjà fait entrer, par le moyen des traductions, une foule de mots « savants » dans notre langue littéraire. Mais c'est le fonds populaire qui fait peut-être l'étoffe solide du français d'Amyot ; c'est ce qu'a remarqué un contemporain, Antoine Du Verdier : « il a la vertu qui est

1. *Remarques sur la langue française*, édit. Chassang, t. I, p. 37.

2. Traduction des *Epistres familières* de Cicéron, 1542. V. sur cette histoire F. Brunot, *Histoire de la langue et de la litt. fr.* (Petit de Julleville), t. III, p. 829 et suiv.

singulière en écriture parfaite : assavoir le langage du commun et du peuple, et la liaison du docte. Ce personnage a joint ces deux points en perfection ¹ ». Qu'il ait inventé moins de mots qu'on ne l'a dit, l'importance du service qu'il a rendu à la prose française n'en est pas diminuée. Son influence littéraire a été aussi considérable : il a rendu populaire en France l'histoire morale et anecdotique de l'antiquité ; conteurs, moralistes, auteurs dramatiques sont venus puiser dans son livre comme dans un arsenal de faits et d'idées.

A ce double titre, le *Plutarque d'Amyot* (c'est l'expression justement consacrée) est un des ouvrages que la Société des textes français modernes voudrait rééditer. Il comprend, comme on sait, les *Vies des hommes illustres* et les *Œuvres morales et mêlées* ; de cet ensemble nous détachons aujourd'hui les *Vies de Périclès et de Fabius Maximus*, portées au programme de l'agrégation de grammaire, en les faisant précéder de l'*Épître à Henri II* et de l'*Avertissement aux lecteurs*, c'est-à-dire de la préface des *Vies*. Nous espérons que ce premier morceau recevra du public un accueil favorable et nous encouragera à poursuivre la publication du Plutarque ².

Pour nous conformer aux règles adoptées par la Société, nous avons tout d'abord cherché « le texte qui représente la forme définitive de la pensée de l'auteur ». De 1559, date de l'édition originale, à 1593 (l'année de la mort d'Amyot), les *Vies* ont été souvent réimprimées en France et à l'étranger ; mais nous ne devons retenir que les éditions données à Paris par Michel de Vascosan, le seul éditeur autorisé par Amyot.

C'est grâce à l'intervention d'Amyot que Vascosan avait été nommé imprimeur du roi (Henri II), l'année même où il reçut son privilège pour l'édition des *Vies* (1560), et c'est encore Amyot qui, pour répondre à une contrefaçon de son livre, faite à Anvers,

1. *Bibliothèque de Du Verdier*, édit. Rigoley de Juvigny, t. II, p. 288.

2. Dans ce cas, nous suivrons l'ordre de l'édition de Vascosan, 1567, où chacun des six tomes comprend huit vies parallèles. Les vies de Périclès et de Fabius Maximus deviendront la première partie de notre second volume ; la préface d'Amyot se retrouvera en tête du premier volume.

obtint de Charles IX des lettres patentes, défendant à tous libraires et imprimeurs « d'imprimer ne vendre ledit livre, s'il n'est de l'impression de Vascosan »¹. Enfin, Vascosan fut chargé par Amyot d'imprimer sa traduction des *Œuvres morales*, et pour cette publication il eut recours à la collaboration de son gendre Frédéric Morel, dont l'évêque d'Auxerre mettait volontiers la science à contribution (1572).

Or, des éditions des *Vies* publiées par Vascosan, nous n'en connaissons que trois², et ce sont les trois premières de l'ouvrage :

1559 : 2 vol. in-f^o 3.

1565 : 1 vol. in-f^o 4.

1. V. l'édition des *Vies* de 1565 et dans les *Morales* de 1572 (in-f^o) le privilège accordé à Vascosan ; nouvelle défense est faite « à tous imprimeurs et libraires qu'ils n'ayent à imprimer, vendre ou tenir aucun desdicts livres de Plutarque ». En signant l'épître à Charles IX, Amyot prend le titre d'*evesque d'Auxerre* qui lui avait été conféré en 1570. Cf. de Balignières, p. 409 et suiv., et Joseph Dumoulin, *Vie et Œuvres de Frédéric Morel*, imprimeur à Paris depuis 1557 jusqu'à 1583 (Paris, A. Picard, 1901), p. 56 sq. et passim.

2. Il n'y a pas encore de bibliographie satisfaisante pour le *Plutarque* d'Amyot. La liste donnée par Nicéron est le comble de la confusion et de l'inexactitude ; Maittaire (*Annales typographici*...) se borne à citer pour les *Vies* les trois premières éditions. Hoffmann (*Lexicon bibliographicum*) et Brunet (*Manuel du libraire*) ne sont pas toujours assez clairs, et ils sont incomplets. Nous avons du moins vu et examiné les éditions dont nous parlons ici

3. « *Les Vies des Hommes Illustres, Grecs et Romains*, Comparees l'une avec l'autre par Plutarque de Chaeronee, Translatees de Grec en François. A Paris, De l'imprimerie de Michel de Vascosan. M. D. LVIII. Avec Privilège du Roy. » Le nom du traducteur n'est pas sur la page du titre ; mais il se lit au second feuillet, en tête de l'épître dédicatoire : « Au tres puissant et tres chrestien roy de France Henry deuxieme de ce nom, Jacques Amyot, Abbé de Bellozane... » ; l'épître est datée : « En vostre Royale maison de Fontaine-belleau, au mois de Febvrier, M. D. LVIII. » [Bibl. Nationale, vélins, 701-2 ; et Bibl. de la Sorbonne.]

4. « *Les Vies des Hommes Illustres, Grecs et Romains*, Comparees l'une avec l'autre par Plutarque de Chæronee, Translatees premiere-ment de Grec en François par maistre Jacques Amyot lors Abbé de Bellozane, et depuis en ceste seconde edition reveuës et corrigées en infinis

1567 : 6 vol. petit in-8° 1.

Nous les désignerons (en suivant l'ordre chronologique) par les lettres A, B, C.

Si nous en croyons l'assertion de l'éditeur autorisé, le texte de ces trois éditions a été chaque fois revu par l'auteur. Toutes les autres éditions, faites en dehors de l'imprimerie de Vascosan, portent, il est vrai, la même mention « en cette dernière édition revu et corrigé par le même translateur ». Elles n'en sont pas moins, à notre avis, des contrefaçons, les unes faites sans beaucoup de soin et fautives, les autres assez exactes 2. Mais quand bien même Amyot les aurait avouées, elles nous seraient inutiles pour l'établissement de son texte, puisqu'elles se bornent à reproduire soit l'édition de 1565, soit celle de 1567.

passages par le mesme translateur, maintenant Abbé de sainte Corneille de Compiègne, Conseiller du Roy, et grand Aumosnier de France, à l'aide de plusieurs exemplaires vieux, escripts à la main, et aussi du jugement de quelques personnages excellents en sçavoir. A Paris, De l'Imprimerie de Michel de Vascosan, M. D. LXV. Avec Privilege du Roy. » [Bibl. Nat.]

1. Même titre que celui de l'édition précédente ; on a seulement remplacé : *seconde par troisième (édition) et corrigé sainte en saint (Corneille)* « A Paris, par Vascosan Imprimeur du Roy. M. D. LXVII. Avec Privilege. » [Bibl. Nat. et Bibl. de l'Arsenal].

2. Dans cette deuxième catégorie (les exactes), citons, pour les *Vies*, les éditions de :

Iaques Du Puy : Paris, 1572, 4 tomes en 3 vol. in-8° [Bibl. Nat.] reproduit le texte de 1565 ; le titre même est un aveu : « en ceste seconde édition » ; 1578, 2 vol. in-8° [Arsenal] et 1583, 1 vol. in-f°, [Bibl. Nat.] avec les sommaires de Simon Goulard.

L'édition de *Ieremie des Planches*, Paris, 1583, in-f° [Bibl. Nat.] paraît négligée ; il est curieux qu'elle s'autorise d'un privilège du roy « de vendre et distribuer les *Vies de Plutarque* » ; toutefois le privilège ne mentionne pas le nom d'Amyot, qui figure sur le titre.

Des éditions de Paris, nous avons encore vu :

Gilles Beys, 1582, in 8° [le 1^{er} vol. seulement, Bibl. Nat.] ; *Gabriel Buon* 1584, 1 vol. in-f° [Bibl. Mazarine] ; *Guillaume Auvray*, 1587, in-8° [le 1^{er} volume seulement à la Bibl. Nat.] ; *Iean Richer*, 1587, 2 vol. in-8° que nous possédons ; *Pierre Bertault*, 1600, in-8° [le 1^{er} vol. seulement Bibl. Nat.] ; *Georges Lombard et Pierre Cbevalier*, 1601-1604, 2 vol. in-8° [Bibl. Sorbonne] ; *Estienne Roland*, 1606, 2 vol, in-4° [Bibl. Nat.] ; *François Gueffier*, 1609, 2 vol. in-8° [Bibl. Nat.] ; *Jean du Carroy*, 1611, 2 vol. in-12 [Bibl. Sorb.].

D'ailleurs ces deux éditions de Vascosan (B et C) ne présentent entre elles que des différences d'orthographe, et parfois de ponctuation : le texte en est absolument identique. En dépit de la mention « en cette 3^e édition revues et corrigées en infinis passages... » l'auteur n'a rien corrigé ; sans doute, parce qu'il n'y voyait plus rien à reprendre. Toutefois, il est vraisemblable qu'Amyot a pris la peine de relire lui-même ces feuilles : la ponctuation est plus soignée que dans les deux premières éditions ¹. Ce qui recommandait aussi l'édition de 1567, c'était le format petit in-8^o, autrement maniable que le massif in-f^o où le bonhomme Chrysale mettra ses rabats ; et c'était la netteté des caractères, l'élégance des vignettes, cette beauté de l'exécution matérielle, faite pour séduire les bibliophiles : aussi ont-ils spécialement nommé cette édition : le *Plutarque de Vascosan*, en y comprenant, avec les six volumes des *Vies*, les sept volumes des *Œuvres morales*, rééditées en 1574 dans ce même format ².

Telles sont les raisons qui nous ont fait choisir le texte de 1567 (C) ; restait à le comparer au premier (A) de 1559. Ici encore l'annonce faite en B et reproduite en C « revues et corrigées en infinis passages » nous a déçu ; on pourra le constater par les variantes que nous avons relevées : les corrections faites par Amyot à sa première rédaction sont, pour l'ensemble, peu nombreuses et peu importantes. Je ne dis pas qu'elles soient négligeables, puisque l'auteur s'est préoccupé surtout de rendre sa traduction plus exacte ; mais ces modifications n'ont porté que sur des points de détail : noms propres mal transcrits, ou parfois quelques expressions incomprises. On voit même qu'Amyot n'a pas cherché à serrer de plus près le sens de Plutarque, ni à rendre avec plus de précision le contour de la phrase grecque ; en cela il restait fidèle à sa méthode d'interprétation et de transposition. Quant au style, aucune retouche sensible ; çà et là un mot remplacé ou supprimé pour éviter une répétition, et c'est tout !

1. L'orthographe, d'une uniformité remarquable, appartient sans doute plus à l'imprimeur qu'à l'auteur.

2. La 3^e édition des *Œuvres morales* est de 1575, in-f^o (Vascosan et Éd. Morel).

Il est vrai que notre collation n'a encore porté que sur les deux vies parallèles contenues dans le présent volume ; nous aurions scrupule à ne pas le déclarer ; mais il nous paraît peu probable que la suite du travail infirme cette conclusion : le texte d'Amyot a été fixé dès 1559 ; à cette date, l'écrivain, comme il le dit lui-même, a vraiment « conduit l'œuvre totale à chef ».

Signalons, en passant, les additions faites au Plutarque du vivant même d'Amyot : la *Decade des Empereurs*, traduite de Guevara par Antoine Allegre, parue d'abord chez Vascosan en 1567 avec les *Vies d'Hannibal et Scipion l'Africain* traduites par Charles de l'Ecluse — les *Vies* « recueillies des bons auteurs »¹ et celles prises du latin d'*Æmilins Probus* par Simon Goulard ; et, rédigés par le même Goulard, des sommaires pour chacune des *Vies*, des résumés et sentences placés dans les marges, avec des index et « les effigies des hommes illustres, retirees des medailles antiques » : tout cela figure dans la plupart des réimpressions que nous avons signalées plus haut, entre autres celles de Du Puys, et se retrouve dans l'édition donnée par Frédéric Morel le jeune (les *Morales* en 1618, les *Vies* en 1619, 2 vol. in-f°).

Nous devons tenir compte de cette édition de 1619, que nous désignerons par la lettre D². Il nous a paru cependant qu'on s'en était exagéré la valeur. Frédéric le jeune avait été à son tour le protégé d'Amyot. Ce fut encore l'évêque d'Auxerre qui fit transmettre au fils, en 1581, le titre d'imprimeur du roi, dont le père avait bénéficié ; en 1585 il s'employait à le faire nommer

1. Sur les sources de ces vies, v. de Blignières, p. 182 et sq. — Cf. l'édition d'Amyot par Coray, p. rv et suiv.

2. « *Les Vies des Hommes Illustres*, etc., translatees de Grec en François par messire Jaques Amyot, lors Abbé de Bellozane, depuis evesque d'Auxerre, Conseiller du Roy et grand Aumosnier de France, Reueuës, corrigees et augmentees en ceste derniere edition, de plusieurs comparaisons et Vies, ainsi qu'il se pourra cognoistre par l'advertissement au lecteur inseré après la preface du Translateur... etc. A Paris, chez Claude Morel, rue Saint Jaques à la Fontaine. M. D. CXIX. Avec privilege de Sa Majesté. » [Bibl. Nat. et Bibl. de la Sorbonne]. V. après l'avertissement de Frédéric Morel, « un sommaire de la vie de messire Jacques Amyot ».

« lecteur royal en éloquence grecque et latine ». Frédéric le jeune avait reçu d'Amyot des corrections et des variantes sur le texte grec de Plutarque; il les réservait pour « une impression nouvelle de Plutarque grec et latin », qui n'a pas été faite; mais, en revanche, il affirme avoir donné dans cette édition des *Vies* la version française corrigée suivant l'exemplaire même d'Amyot¹.

Est-ce une raison suffisante pour que nous considérions avec de Blignières cette édition de Frédéric le Jeune « comme l'œuvre définitive du traducteur »? Savons-nous si ces corrections manuscrites représentaient une revision totale? Sommes-nous sûrs que l'éditeur les ait littéralement transcrites?

En fait, parmi les variantes que nous avons relevées dans le texte de 1619, il y en a peu qui aient vraiment de l'intérêt, soit pour le sens, soit pour le style; ce que nous avons constaté jusqu'à présent pour les trois premières éditions de Vascosan, se vérifie de nouveau pour cette dernière: l'immobilité à peu près entière du texte d'Amyot.

Le *Plutarque français* eut encore quelques éditions au xviii^e siècle, jusqu'en 1655². Citons pour mémoire les réimpressions faites au xviii^e siècle par Bastien (1754), par Brotier et Vauvilliers (1783-84); au xix^e par Clavier (1801-1806). L'édition de Coray (1826)³ ne comprend que les *Vies*; elle a le tort de rajeunir, non pas seulement l'orthographe, mais le texte lui-même, ce qui est plus grave, en l'altérant parfois d'une manière méconnaissable.

Nous avons apporté tout notre soin à reproduire avec exactitude le texte et même l'orthographe de 1567; on a seulement distingué, pour rendre la lecture plus facile, le *j* de l'*i* et le *v* de l'*u*; les majuscules n'ont été maintenues que pour les noms

1. Même assertion l'année précédente pour les *Œuvres morales*: « revue et corrigée en infinité de lieux par feu M. Amyot, peu auparavant son décès ».

2. Paris, 1622, in-8°: le tome I chez Nicolas de la Vigne; le t. II chez Mathurin Henault [Bibl. Sorbonne]. — Paris, 1645, 2 vol. in-f°, chez Antoine Robinet et 1655, 2 vol. in-f°, chez Léonard [Bibl. Nat.].

3. Paris, Dupont, 12 vol. grand in-8°. V. dans le t. I^{er} la vie d'Amyot, par l'abbé Lebeœuf; cf. de Blignières, p. 400 et suiv.

AVERTISSEMENT.

propos, pour le tout entier, nous avons omis de dire souvent
celle d'ailleurs, nous avons à peine mentionné les
sujet, et nous ne voyons pas que les
autres, par exemple, ne soient pas
nous avons vu, les autres, et on est de
orthographe, mais nous avons une même chose de
qui peuvent intéresser l'homme et la technologie et la
lecture.

Enfin nous ne voyons pas que les autres, et
à just nos d'ailleurs, et nous ne voyons pas que les
éditions, nous avons de l'homme et de l'homme et de l'homme, la
lecture et les autres.

LOUIS BRUNOT.



AV TRESPVISSANT ET TRESCHRESTIEN ROY DE FRANCE

Henry deuxieme de ce nom,

Jacques Amyot Abbé de Bellozane

Son treshumble et tresobeïssant serviteur S.

5 Ceux qui de pere en fils sont nez ou habitez soubz une
juste, legitime et hereditaire principauté, comme la vostre,
Sire, doyvent, à mon jugement, au service de leur prince
la devotion que les Sages anciens attribuoyent à la charité
du païs où lon a pris naissance. Car ilz disoyent que le
10 premier degré en estoit deu aux Dieux, le second au
païs, et le troisieme aux parens, sans faire mention de
roy ne de prince, pourautant que c'estoyent gens qui
vivoyent soubz autre forme de gouvernement que de
royaume, et qui pour inciter les hommes à defendre le
15 public, soubz lequel la vie, l'honneur. et le bien de chaque
particulier sont compris, et à tascher de profiter à la
communauté de ceux avec lesquelz on a convenance de
nativité, de langue, de loix, de mœurs et de demurance,
enseignoyent que non seulement la raison de tout droict
20 humain, mais aussi la religion de droict divin, et le
devoir de conscience obligeoyent toute personne de servir à
son entier pouvoir au bien public de son païs, oultre la
douceur d'affection que nature imprime en noz cueurs, et la
conformité d'humeurs qui se treuve ordinairement en noz

x6 D: comprins

T. fr. mod. — Amyot, I.

B

corps, avec le ciel et l'air ou nous avons premièrement respiré, qui semble une obligation naturelle. Mais comme ainsi soit que toutes nations, non plus que tous hommes particuliers, ne sont pas propres à estre régies d'une
5 mesme sorte de gouvernement, pource qu'il est plus expédient à aucunes de servir que de commander, et qu'au jugement du prince des philosophes, la plus parfaite des trois especes du gouvernement de la chose publique, et la plus selon Dieu et nature, est celle de la royauté, ceulx
10 qui par election ou par nativité y sont soubmis, doyvent bien affectueusement esvertuer toutes leurs forces, et de corps et d'entendement, pour faire, chacun en son endroit et selon sa vacation, service à leur souverain : attendu que servans à un, ilz profitent à tous, et qu'en luy seul gist
15 l'heur et malheur de ses subjects ; de luy depend le repos ou travail, l'aise ou misere de tous ceux qui vivent sous son empire ; luy seul represente la chose publique, veu que sa volonté est loy, sa parole arrest, et sa vie discipline exemplaire de bien ou de mal faire. Si me semble à ce
20 propos qu'Artabanus, l'un des capitaines du roy Xerxes, respondit sagement à Themistocles, lors qu'il se retira fuitif de la Grece en la cour de Perse : « Les loix et
« coustumes des hommes, dit il, sont differentes, Themis-
« tocles, et y a des choses tenues pour honestes en un païs,
25 « qui ne le sont pas en un autre : mais bien est il par
« tout honeste à un chacun, de maintenir et garder celles
« de son païs. Car quant à vous autres Grecs, on dit que
« vous n'avez rien si cher ny en si grande recommandation
« que la liberté et l'egalité : mais nous Persiens estimons
30 « que la plus belle et la plus sainte ordonnance que nous

« ayons, soit celle qui nous commande d'honorer, servir
 « et reverer nostre roy, ne plus ne moins que l'image de
 « Dieu vivant, qui regit et gouverne tout ce monde ». —
 C'est bien un tiltre auguste et venerable que celuy la, et
 5 le plus magnifique et le plus digne, qui scauroit estre
 donné à un monarque souverain, prouueu qu'il s'en
 vueille souvenir, et qu'il ait tousjours la crainte de Dieu,
 et la raison, qui luy sonne continuellement aux oreilles.
 Ce qui jadis s'observoit par coustume en la cour de
 10 Perse : là où l'un des gentilzhommes de la chambre
 avoit la charge de se trouver tous les matins au resveil du
 roy, et luy dire : « Leve toy, Sire, pour prouvoir aux
 « affaires, dont le grand Mesoromasdes (car ainsi appel-
 « loient ilz Dieu) veut que tu ayes le soing. » Ce discours
 15 de raison naturelle, Sire, quand encore le commandement
 des Escritures saintes, ou l'autorité des princes est si
 authentiquement fondee, n'y seroit point, oblige assez
 tous voz subjects à desirer de vous faire service : et de
 ma part, ayant cherché de vous en faire, en l'insti-
 20 tution de Messeigneurs d'Orleans et d'Angoulesme,
 voz tresheureusement nez enfans, que Dieu benie, pour
 employer le temps qui me demeueroit vuide, à faire encore
 quelque autre chose qui vous fust agreable, apres avoir
 vacqué au devoir de l'office, auquel il vous a pleu me
 25 commettre, de leur enseigner les lettres, je me suis mis à
 revoir ce que de long temps j'avoie traduit de Grec en Fran-
 çois des Vies de Plutarque, et à continuer de traduire ce
 qui m'en restoit : tant que finalement, ayant conduit
 l'œuvre totale à chef, j'ay pris la hardiesse de la vous
 30 presenter imprimee, et la faire sortir soubz la sauve-garde

de vostre tres illustre nom, en public, es mains de voz hommes ; non que j'eusse opinion qu'il peust issir de moy, personne si basse et si petite en toute qualité, chose qui meritast d'estre mise devant les yeux de vostre Majesté :
 5 mais bien ayant certaine confiance que l'œuvre de soy est si recommandable et si excellente, qu'elle pourra faire excuser le defaut qui s'y trouvera de ma part, pource que je confesse avoir plus estudié à rendre fidelement ce que l'auteur a voulu dire, que non pas à orner ou polir le
 10 langage, ainsi que luy mesme a mieulx aimé escrire docement et gravement en sa langue, que non pas doucement ny facilement. Mais en recompense il y a tant de plaisir, d'instruction et de profit en la substance du livre, qu'en quelque style qu'il soit mis, prouveu qu'il s'entende, il
 15 ne peut faillir à estre bien receu de toute personne de bon jugement, pource que c'est en somme un recueil abrégé de tout ce qui a esté de plus memorable et de plus digne faict ou dict par les plus grands roys, plus excellens capitaines et plus sages hommes des deux plus nobles, plus vertueuses
 20 et plus puissantes nations qui jamais furent au monde. Et au reste j'espère, Sire, que de vostre grace et liberalité royale, laquelle se monstre aussi bien à recevoir guayement et joyeusement les petits presens, comme à donner franchement et liberalement les grands, quand la bonne volonté
 25 des offrans excuse l'impuissance de mieulx faire, vous aurez pour agreable l'humble affection que j'ay eue en ce faisant, de recommander à la posterité la memoire de vostre glorieux regne, de servir au bien public de voz subjects, et d'enrichir nostre langue Françoisé, selon la foible portee de
 30 mon peu de sens et de litterature : pource que je m'assure

que d'icy à longues annees, quand les survivans trouveront tant de beaux et bons livres translatez des langues Grecque et Latine en la Françoisé durant vostre heureux regne, et soubz l'inscription de vostre tres illustre nom, lon vous
5 donnera la louange d'avoir glorieusement couronné et achevé l'œuvre, que ce grand roy François vostre feu pere avoit heuresement fondé et commencé de faire renaistre et florir en ce noble royaume les bonnes lettres, dont nostre langue va tous les jours de plus en plus recevant tel ornement et enrichissement, que ny l'Italiene, ni l'Hespagnole,
10 ny autre qui soit aujourdhuy en usage par l'Europe, ne se pourra vanter de la surmonter en nombre, ny en bonté des outilz de sapience, qui sont les livres : et consequemment voz subjects en recueilliront ce fruict, que sans se
15 travailler pour apprendre les nobles anciennes langues, qui coustent beaucoup de temps et de peine à apprendre, à cause qu'elles sont mortes, et qu'il les faut tirer hors des monumens des livres, ou elles sont ensepvelies, ilz auront en leur maternelle, et chez eulx, par maniere de dire, ce
20 qu'il y a de plus beau et de meilleur en la Latine et en la Grecque. A raison duquel benefice ilz seront de tant plus obligez à prier Dieu, comme je fay en toute humilité et toute reverence, pour la bonne prosperité, accroissement d'honneur, et continuation de longue vie en bonne santé de
25 vous, Sire, et de tout ce qui appartient à vostre sacree Royale Majesté. En vostre Royale maison de Fontainebleau, au mois de Febvrier, M. D.LVIII.

26 A : Fontaine-belleau. — D : Fontaine-bell'eau.

27 D : M. D. LVIII

AVX LECTEVRS

*La lecture des livres qui apportent seulement une vaine et oiseuse delectation aux lisans, est à bon droict reprouvee des hommes sages et de grave jugement, et celle
5 qui profite aussi simplement, sans faire aimer le profit qu'elle apporte, et addoucir la peine que lon prend à le recueillir, par quelque allechement de plaisir, semble un peu trop austere au goust de plusieurs delicats entendemens, qui pour ce defaut ne s'y peuvent arrester longue-
10 ment. Mais celle qui plaist et profite, qui delecte et instruit ensemble, a tout ce que lon scauroit desirer, pour estre universellement aimee, receuë et estimee de toute maniere de gens, suyvant le commun dire du poëte Horace :*

« Qui le plaisir à l'utilité joint

15 *« En ses escripts, le gaigne de tout poinct :
et fait mieuls ces deux effects, l'un pour l'amour de l'autre reciproquement, en profitant plus d'autant qu'elle delecte, et delectant davantage d'autant qu'elle profite. Ceste louange à mon advis est deuë proprement, ou principale-
20 ment plus qu'à nulle autre, à la lecture des histoires, comme à celle ou il y a plus d'honeste plaisir conjoint avec utilité, et qui a plus d'efficace pour ensemble plaire et profiter, resjouir et enseigner, que nulle autre sorte d'escripture ne d'invention humaine. A raison dequoy il
25 sembleroit aussi convenable d'advouër que les hommes sont autant ou plus obligez aux bons esprits, qui ont meritè le nom d'historiens par leurs sages escripts, qu'ilz*

ne sont à nulle autre manière de lettres : pouravant que
 l'histoire est une narration ordonnée des choses notables,
 dictes, faictes, ou advenues par le passé, pour en con-
 server la souvenance à perpetuité, et en servir d'instruc-
 5 tion à la posterité. Et tout ainsi comme la memoire est
 le tresor de l'entendement de l'homme, sans laquelle les
 actions des autres deux parties demeureroient imparfaites
 et presque inutiles : aussi se peut-il dire que l'histoire est
 à la verité le tresor de la vie humaine, qui preserve de la
 10 mort d'oubliance les faicts et dicts memorables des hommes,
 et les adventures merveilleuses, et cas estranges, que
 produit la longue suite du temps. C'est pourquoy le sage
 Platon veut qu'elle ait esté appelee histoire*, pource
 qu'elle arreste le flux de nostre memoire, qui autrement
 15 auroit trop peu de duree et de tenue: et peut on à cela
 reconnoistre combien nous luy sommes obligez, si nous
 imaginons seulement en quelle horreur de tenebres, et quelle
 fondriere d'ignorance bestiale et pestilente nous serions
 abysmez, si la souvenance de tout ce qui s'est faict, ou qui
 20 est advenu avant que nous fussions nez, estoit entierement
 abolie et esteincte. Je veux doncques laisser à part l'excel-
 lence et la dignité de la chose en soy, veu que non seule-
 ment elle est plus ancienne que toute autre espece d'escryp-
 ture qui onques ait esté au monde, mais aussi qu'elle a
 25 eu cours entre les hommes, avant que l'usage des lettres
 mesmes y fust : pource que lors les vivans laissoient à
 leurs successeurs la memoire des choses passees en chansons
 qu'ilz faisoient apprendre par cueur de main à main à

* ἀπὸ τοῦ ἱστασθαι τὸν ῥοῦν τῆς μνήμης.

leurs enfans, ainsi que lon a peu voir de nostre temps
 par l'exemple des barbares habitans es terres neufves
 Occidentales, qui sans conserve d'aucunes lettres avoyent la
 cognoissance des choses advenues bien huit cents ans aupa-
 5 ravant. Je laisse semblablement à deduire que c'est la plus
 seure garde et le plus durable monument que les hommes
 puissent laisser de leurs faicts en ce monde, pour consacrer
 leur nom à l'immortalité : car il n'y a ny statues, ny
 trophées de marbre, ny arcs de triomphe, ny coulornnes,
 10 ny sepultures magnifiques, qui puissent combatre la duree
 d'une histoire eloquente, accomplie des qualitez qu'elle doit
 avoir. Aussi peu me veux-je arrester à peser que elle a
 je ne sçay quoy de venerable, en ce qu'elle fait profession
 de dire tousjours verité, et en ce que son propre subject est
 15 de traiter de toutes les plus hautes et plus grandes choses
 qui se facent en ce monde, pource qu'il me semble que l'uti-
 lité grande, qui est, comme dit Horace, presque la mere
 de justice et d'equité, la recommande tant, qu'il n'est ja
 besoing de luy chercher d'ailleurs autorité ny ornement
 20 de dignité. Car c'est une regle et instruction certaine, qui
 par exemples du passé nous enseigne à juger du present, et à
 prévoir l'advenir, à fin que nous sçachions ce que nous devons
 suyvre ou appeter, et qu'il nous faut fuir et eviter.
 C'est une peinture qui nous met devant les yeux, ne plus
 25 ne moins qu'en un tableau, les choses dignes de memoire,
 qu'anciennement ont faictes les puissants peuples, les roys
 et princes magnanimes, les sages gouverneurs et vaillans
 capitaines et personnes marquées de quelque notable qua-
 lité, nous representant les mœurs des nations estrangeres,
 30 les loix et coustumes anciennes, les desseings des hommes

particuliers, leurs conseils et entreprises, les moyens qu'ilz ont tenus pour parvenir, et leurs deportemens, quand ilz sont parvenus aux plus hauts, ou bien qu'ilz ont esté dejettez aux plus bas degrez de la fortune : tellement qu'il ne
5 sçauroit naistre accident en paix ny en guerre, en public ny en privé, que qui aura leu diligemment, bien entendu et fidelement retenu les histoires, n'y treuve lumiere pour s'esclarcir et conseil pour se resoudre à prendre party, ou à donner advis à un autre en tout douteux et dangereux
10 passage, pour eslire le plus expedient, et juger à peu pres le poinct auquel devra tomber un affaire bien emmeslé : advertissement pour soy moderer en prosperité et reconfort, pour se revenir et soustenir en adversité. Et si le fait avec plus de grace, d'efficace et de dexterité, que ne font
15 les livres de philosophie morale, d'autant que les exemples sont plus aptes à esmouvoir et enseigner, que ne sont les arguments et les preuves de raisons, ny leurs imperieux preceptes, à cause qu'ilz sont particuliers, accompagnez de toutes leurs circonstances, là ou les raisons et demonstra-
20 tions sont generales, et tendent plus à fin de prouver ou de donner à entendre, et les exemples à mettre en œuvre et à executer : pource qu'ilz ne monstrent pas seulement comme il faut faire, mais aussi impriment affection de le vouloir faire, tant pour une inclination naturelle, que
25 tous hommes ont à imiter, que pour la beauté de la vertu qui a telle force, que par tout ou elle se voit, elle se fait desirer et aimer. Aussi le fait elle avec plus de pois et plus de gravité que ne font les inventions et compositions poëtiques, d'autant qu'elle ne se sert jamais que de la nue
30 verité : et la poésie ordinairement enrichit les choses qu'elle louë, par dessus le merite, à cause que son but principal

est de delecter ; et encore plus honestement et plus doucement que ne font les loix et ordonnances civiles, d'autant qu'il est plus honeste instruire et enseigner que non pas punir et corriger. Et toutefois l'histoire a bien aussi sa
5 maniere de chastier les meschans par la note d'infamie perpetuelle dont elle marque leur memoire, qui est un grand moyen de retirer des vices ceux qui autrement auroyent mauvaise et lasche volonté : comme aussi est-ce un bien
vif et poignant aiguillon aux hommes de gentil cueur et
10 de nature genereuse, pour les inciter à entreprendre toutes hautes et grandes choses, que la louange et la gloire immortelle dont elle remunere les bienfaisans. Car les livres sont pleins d'exemples d'hommes de courage et d'entendement eslevé, qui pour le desir de perpetuer la memoire
15 de leur nom, par le seur et certain tesmoignage des histoires, ont volontairement abandonné leurs vies au service de la chose publique, despendu tous leurs biens, supporte travaux infinis et d'esprit et de corps, pour defendre les oppressez, bastir edifices publiques, establir loix et gouvernemens politiques, inventer arts et sciences necessaires à
20 l'entretienement et ornement de la vie humaine; de tous lesquels grands benefices la grace est deuë à la fidele recommandation des histoires. Car encore que la vraye vertu ne demande aucun loyer mercenaire de ses actes louables,
25 et se contente à par soy de la conscience d'avoir bien fait : si est-ce chose utile et bonne, à mon advis, d'attirer par tous moyens les hommes à bien faire, et ne doit on point defendre aux gens de bien d'esperer honneur, qui naturellement accompagne la vertu comme l'ombre le corps, de
30 leurs vertueux faicts. Car on voit ordinairement que

c'est un signe infallible de lasche, basse et vile nature, que ne sentir point les estincelles du desir d'honneur, et que ceux qui estiment chose impertinente, superflue ou malseante, que d'estre loué, ne font aussi rien qui merite
5 *que lon les louë, ains sont coustumierement personnes de cueur failly, desquelles les pensees ne s'estendent point plus avant que les vies, et dont la souvenance se pert aussi quand et la veuë. Or si le conseil des vieilles gens est grandement estimé, pource qu'ayans vescu longuement,*
10 *il est force qu'ilz ayent beaucoup veu, et si ceux qui ont longuement voyagé, en païs estranges, qui se sont trouvez en beaucoup d'affaires, et ont grande experience des choses de ce monde, sont reputez sages et dignes à qui lon mette en main les resnes des grands gouvernemens:*
15 *combien fait à estimer la lecture des histoires, qui en un seul jour nous peut fournir plus d'exemples que ne scauroit faire le cours entier de la plus longue vie d'un homme? Tellement que ceux qui sont exercitez à la lire ainsi qu'il appartient, encore qu'ilz soyent jeunes,*
20 *deviennent, quand à l'intelligence des affaires du monde, telz que s'ilz estoyent vieux et chenus, et n'ayans jamais bougé de leurs maisons, sont aussi advertis, informez et instruits de tout ce qui est par le monde, que ceux qui avec travaux innumerables et dangers infinis ont abbrege*
25 *leurs jours à courir toute la terre habitable: comme au contraire ceux qui sont ignorans des choses faites ou advenues avant qu'ilz fussent nez, quoy qu'ilz soyent suraagez, demeurent tousjours enfans, et dedans le propre païs de leur naissance sont en pareille condition que les*
30 *estrangers. Brief il se peut veritablement dire que la lecture des histoires est une eschole de prudence, que l'homme*

se forme en son entendement, en considerant meurement l'estat du monde qui a esté par le passé, et observant diligemment par quelles loix, quelles mœurs et quelle discipline les empires, royaumes et seigneuries se sont
 5 jadis premierement establies, et depuis maintenues et grandies, ou au contraire changees, diminuees et perdues. Aussi lit on qu'Alexander Severus tres sage et vertueux empereur de Rome, toutes et quantes fois qu'il avoit à delibérer de quelque chose de consequence, tant au faict de
 10 la guerre que de gouvernement, appelloit tousjours ceulx qui estoient renommez de sçavoir bien les histoires. Je sçay bien toutefois qu'il y en a qui insisteront alencontre, en soustenant que ceste lecture des histoires ne sçauroit que bien peu, ou rien du tout, servir à l'acquisition de
 15 prudence, veu qu'elle gist en action, et que c'est experience reelle et actuelle qui l'engendre, quand l'homme remarque bien et retient fermement ce qu'il a veu à l'œil, et qu'il a experimenté de faict, suyvant ce que dit l'ancien poëte Afranius :

- 20 « Prudence suis, V'sage est le mien pere,
 « Qui m'engendra en Memoire ma mere ; »

et ce qu'entendoit le philosophe qui dit que la main estoit l'instrument de sapience : au moyen de quoy (disent-ils) ceulx qui parlent de matieres de gouverne-
 25 ment et d'affaires d'estat, mesmement de ceulx de la guerre, par livres, en parlent comme clerks d'armes, ainsi que dit le proverbe François, rapportant à celuy des Grecs, qui appellent un pilote par livre celuy qui n'a pas seure et certaine cognoissance des choses dont il parle,
 30 voulans dire qu'il ne se fault pas fier à l'intelligence

que lon acquiert par la lecture, es choses qui consistent en action, et qu'il fault avoir mis la main à l'œuvre : ne plus ne moins que rien ne sert à devenir bon peintre, avoir ouy souvent parler et discourir de la peinture, et
 5 deviser des couleurs, qui ne prent le pinceau en main : et qu'au contraire il se trouve de bien sages hommes et de bons capitaines, qui ne sçavent ne lire ny escrire : joint qu'ilz alleguent davantage qu'au faict des armes, toutes choses se changent d'an à autre, par maniere de
 10 dire : au moyen de quoy les ruses et subtilitez que lon pourroit apprendre es livres, ne serviroient non plus que les mines esventees, ainsi que Cambyse remonstre à son filz Cyrus en Xenophon, disant que comme en la musique les chansons les plus nouvelles sont ordinairement
 15 celles qui pour une fois plaisent le plus, à cause que jamais elles n'ont esté ouyes : aussi en la guerre les ruses qui n'ont point esté practiquees, sont celles qui succedent le mieulx, et qui sortent le plus souvent à effect, d'autant que les ennemis s'en doutent moins.
 20 Mais aussi ne suis-je pas celuy qui voudroit soustenir que lon peust faire un sage gouverneur d'estat politique, ny un grand capitaine d'un personnage qui n'auroit jamais bougé de dessus les livres en une estude : combien que Ciceron escrive de Lucius Lucul-
 25 lus que quand il partit de Rome capitaine general et lieutenant du peuple Romain, pour aller faire la guerre au roy Mithridates, il n'avoit experience quelconque de la guerre, mais que depuis il feit si grande diligence de lire les histoires, et d'interroguer sur chasque point les
 30 vieux capitaines et gens de longue experience, qu'il menoit avec luy, que quand il fut arrivé en Asie, ou il

salut mettre à bon esciant la main à la besongne, il se trouva un tressuffisant capitaine, ainsi que le tesmoignerent ses effects, attendu que par voyes d'armes toutes contraires il desfeit les deux plus puissans, plus redoubtez
5 et plus grands princes qui fussent lors en tout l'Orient. Car son entendement fut si vif, son soing si vigilant, et son courage si bon qu'il n'eut point besoin du long apprentissage, ny de la grossiere discipline d'usage. Et encore que je confesse qu'il se soit trouvé des gouverneurs et capitaines,
10 qui par la seule vigueur de leur nature aidee de longue routine d'usage ont fait de belles et grandes choses, lon ne me sçauroit aussi nier que s'ilz eussent adjousté à ces dons de nature la cognoissance des lettres et la lecture des histoires, ilz n'en eussent peu faire de beaucoup plus
15 grandes, et qu'ilz n'en eussent esté de beaucoup plus parfaits. Pource qu'à la perfection de ceste suffisance de bien gouverner en paix ou en guerre, il y a trois choses necessairement requises, comme en toute autre excellence d'art ou de science, la nature, l'art et l'exercitation. La
20 nature, au propos que nous traittons, fournira d'un bon sens naturel, d'un corps bien composé pour endurer tout travail, et d'une bonne volonté de se faire valoir : l'art contribuera le jugement et la cognoissance acquise par les exemples et sages discours leus et releus es bonnes his-
25 toires : et l'exercitation donnera la promptitude, l'assurance et la facilité de les mettre à execution. Car prudence quoy qu'elle regisse l'action, est neantmoins vertu de l'entendement, qui enseigne le point du milieu, auquel consiste toute louable action entre deux vicieuses extremitéz
30 du peu et du trop : et qui s'attent à l'acquerir par routine

d'usage seulement, et aime mieulx apprendre à ses despens
qu'à ceulx d'autrui, il pourroit estre du nombre de ceulx
que touche l'ancien proverbe, qui dit que l'experience est
la maistresse des fols, pource que la vie de l'homme est
5 courte, et l'experience difficile et perilleuse, mesmement au
faict de la guerre, auquel, comme disoit Lamachus,
capitaine Athenien, on ne peut pas faillir deux fois, pource
que les faultes y sont de telle consequence, qu'elles apportent
le plus souuent ruine d'estat ou perte de vie à ceulx qui les
10 font. Ainsi ne faut-il pas attendre celle prudence usagere
qui couste si cher, et qui est si longue à venir que l'homme
bien souvent est mort en la peine, avant qu'elle soit
arrivee, et qu'il luy faudroit une seconde vie pour l'em-
ployer, quand elle est trop tard venue : ains la fault
15 haster par diligence de lire continuellement es anciennes
et modernes histoires, à fin de jouir de l'heur que dit le
poëte :

« Heureux celuy qui pour devenir sage,
« Du mal d'autrui fait son apprentissage. »

20 Au demeurant, quant à ceux qui vont disans que le
papier endure tout, s'il y en a aucuns qui à faulses
enseignes usurpent le nom d'historiens, et qui par haine
ou faveur offensent la majesté de l'histoire, en y meslant
quelque mensonge, cela n'est point la faulte de l'histoire,
25 ains des hommes partiaux, qui abusent indignement de
ce nom pour desguiser et couvrir leurs passions : ce qui
n'adviendra jamais, si celuy qui escrit l'histoire, a les
parties qui luy sont necessairement requises, pour meriter
le nom d'historien, qu'il soit despouillé de toute affection,
30 sans envie, sans haine ny flatterie, versé aux affaires

du monde, eloquent, homme de bon jugement, pour
sçavoir discerner ce qui se doit dire, et qui se doit laisser,
et ce qui nuirait plus à déclarer qu'il ne profiteroit à
reprendre et à condamner : attendu que sa fin principale
5 doit estre de servir au public, et qu'il est comme un
greffier, tenant registre des arrest de la cour et justice
divine, les uns donnez selon le style et portee de nostre
foible raison naturelle, les autres procedans de puissance
infinie et de sapience incomprehensible à nous, par dessus
10 et contre tout discours d'humain entendement, lequel ne
pouvant penetrer jusques au fond des jugemens de la
divinité, pour en sçavoir les motifs et les fondemens, en
attribue la cause à ne sçay quelle fortune, qui n'est autre
chose que fiction de l'esprit de l'homme, s'esblouissant à
15 regarder une telle splendeur, et se perdant à sonder un tel
abysme, comme ainsi soit que rien n'advient ny ne se
fait sans la permission de celui qui est justice mesme et
verité essentielle, devant qui rien n'est ne futur ny passé,
et qui sçait et entend les choses casuelles necessairement.
20 Laquelle consideration enseigne aux hommes à s'humilier
sous sa puissante main, en recognoissant qu'il y a une
cause premiere qui gouverne supernaturellement, d'ou vient
que ny la hardiesse n'est pas tousjours heureuse, ny la
prudence bien asseuree. Ces utilitez si notables sont par
25 tout accompagnees de delectation singuliere, qui principa-
lement procede de la diversité et de la nouveleté dont nostre
nature s'esjouit, et en est grandement desireuse, à cause
qu'ayant une affectueuse inclination à son bien souverain,
elle le va cherchant en tout ce qu'elle cuide beau ou bon en
30 ce monde : mais ne trouvant de quoy se contenter sous la
voulte du ciel, elle s'ennuye et se fasche bien tost de ce que

nagueres elle avoit ardemment appeté, et va ainsi errant en la temerité de ses appetits, dont elle ne cessera jamais de changer continuellement, jusques à ce qu'estant unie à ceste fin dernière de son bien souverain, ou est la perfection
 5 de toute beauté et toute bonté, ses souhaits seront à un coup assouvis. Cest appetit de variété ne se peult mieulx recreer que en celle qui est le repertoire et le tesmoignage du temps, pere de toute nouvelleté, et messagere de l'antiquité. Car si nous sentons un plaisir singulier à escouter ceulx
 10 qui retournent de quelque loingtain voyage, racomptans les choses qu'ilz ont veuës en estrange païs, les mœurs des hommes, la nature des lieux, les façons de vivre différentes des nostres : et si nous sommes quelquefois si ravis d'aise et de joye que nous ne sentons point le cours des heures, en
 15 oyant deviser un sage, disert et eloquent vieillard, en la bouche duquel sourt un flux de langage plus doux que miel, quand il va recitant les adventures qu'il a eües en ses verds et jeunes ans, les travaux qu'il a endurez, et les perilz qu'il a passez : combien plus devons nous sentir de
 20 ravissement, d'aise et d'esbahissement de voir en une belle, riche et veritable peinture d'eloquence, les cas humains representez au vif, et les variables accidens que la vieillesse du temps a produits des et depuis l'origine du monde, les establissemens des empires, ruïnes des monarchies, accrois-
 25 semens ou aneantissemens des royaumes, et tout ce qui oncques a esté de plus esmerveillable par l'univers ? le tout representé si vifvement qu'en le lisant nous nous sentons affectionnez, comme si les choses n'avoient pas esté faictes par le passé, ains se faisoient presentement, et nous en
 30 trouvons passionnez de joye, de pitié, de peur et d'esperance, ne plus ne moins presque, que si nous estions sur le faict,

sans estre en aucune peine ou danger, ains avec le contentement qu'apporte la recordation en seureté des maulx que lon a autrefois endurez, et avec l'aise que décrit Lucrece en ses vers :

- 5 « C'est un plaisir quand la mer violente
 « Est par les vents batue de tourmente,
 « Voir de sur terre en toute seureté
 « Quelque autre en mer durement tourmenté :
 « Non que ce soit volupté agreable
 10 « De voir autrui en peine miserable,
 « Mais pourautant qu'il fait grand bien de voir
 « Quelz maulx on n'a, que lon pourroit avoir. »

Aussi voit on que ceste lecture retient et arreste tellement les bons esprits, que non seulement elle leur fait bien sou-
 15 vent oublier tous autres plaisirs : mais aussi leur sert d'agreable divertissement en leurs ennuis, et quelquefois de medecine en leurs maladies ; comme lon trouve escrit du roy Alphonse de Naples, prince tant renommé par les chroniques pour sa sagesse et bonté, qu'estant griefvement
 20 malade en la ville de Capoue, apres que ses medecins eurent employé tout ce que leur art enseigne, pour luy recouvrer sa santé, voyant que rien n'y valloit, il se resolut de ne prendre plus de medecines, et pour passer son temps, se fait lire devant luy l'histoire de Quintus Curtius, des
 25 faicts et gestes d'Alexandre le Grand : à la leçon de laquelle il prit si merueilleux plaisir, que la nature s'en fortifiant surmonta l'obstination de la maladie. Parquoy estant retourné en sa convalescence, il donna congé aux medecins, en leur disant : « Ne me faites plus de feste de vostre Hip-
 30 « pocrates et Gallien, puis qu'ilz ne m'ont sceu guarir : et

« vive Quintus Curtius, qui m'a si bien sceu aider à recou-
« vrer ma santé ». Mais si la lecture et cognoissance des
histoires est agreable, utile et profitable à toute autre
maniere de gens, je dy qu'elle est de tout poinct necessaire
5 aux grands princes et aux roys, non seulement pource
qu'ayans de plus pesantes et plus difficiles charges, la
raison voudroit aussi qu'ilz eussent plus grande provision
des qualitez qui seroyent requises pour bien s'en acquiter,
ny aussi pource qu'estant le propre subject de l'histoire
10 traiter de toutes hautes matieres, comme sont guerres,
batailles, conquestes de villes et de pais, traittez de paix
ou d'alliance, il semble qu'elle leur soit plus particulie-
rement qu'à nulz autres affectee : mais pource qu'à prendre
les choses comme elles sont, estans nez et nourris tendrement
15 en delices, pour le grand soing et la crainte que lon a de
leurs personnes, ainsi qu'il appartient à leur grandeur,
ilz ne travaillent pas en jeunesse tant comme il est
besoing à qui veut apprendre les nobles langues anciennes
et les disciplines laborieuses que comprennent la philosophie ;
20 puis quand ilz ont atteint l'aage d'homme, leur devoir les
appelle aux actions des grands affaires, de maniere qu'il
ne leur reste autre exercice d'entendement plus propre que
la lecture des histoires en leur langue, laquelle sans peine
leur peut enseigner, avec douceur et facilité grande, tout
25 ce que les penibles œuvres des philosophes, touchant le gou-
vernement de la chose publique, leur scauroyent monstrier
pour sçavoir bien regir et gouverner les peuples et pais que
Dieu a soubmis à leur obeissance. Mais le pis est qu'ilz
sont tousjours, ou le plus du temps, environnez de personnes
30 qui ne cherchent qu'à leur complaire par toutes voyes, et
s'en treuve bien peu qui leur osent dire franchement la

verité de toutes choses : et au contraire l'histoire ne leur flatte rien : ains leur met à descouvert devant les yeux les fautes et vices de ceux qui en grandeur de fortune ont esté semblables à eux. A raison dequoy Demetrius le Phalerien, 5 personnage autant renommé pour sa sagesse de bien gouverner un estat politique, que pour son eminent sçavoir, conseilloit à Ptolomæus, le premier roy d'Ægypte, apres le trespas d'Alexandre le Grand, qu'il leust souvent et diligemment les livres qui traittent de l'administration des 10 royaumes : « Pource que là dedans, disoit il, tu trouveras « plusieurs choses que tes serviteurs et familiers ne t'ose-
« roient dire. » Il y a davantage que telz personnages ne peuvent pas facilement sortir hors des limites de leurs seigneuries, et voyager en autres païs, comme font les personnes 15 privées : pource que la jalousie de leurs estats, et le regard de leur dignité requierent qu'ilz ne se treuvent jamais en lieu ou autre leur puisse commander, et bien souvent à faute d'avoir veu à l'œil les païs, et cognu les forces des peuples et princes voisins, ont fait des entreprises bien mal 20 fondees : auquel defaut l'information qu'ilz en peuvent avoir par la lecture des histoires, est un des plus aisez et plus commodes remedes qu'ilz sçauroyent trouver. Mais quand il n'y auroit autre occasion que ceste dernière, elle seule deust bien convier les princes à lire souvent et affectueusement les livres, ou sont escripts les faicts heroïques des 25 sages et vaillans hommes, mesmement des roys qui ont esté devant eulx. C'est qu'en les lisant, il leur prend envie d'en faire de semblables, mesmement à ceux qui ont le cueur haut et genereux, pource que les semences des vertus 30 royales, qui sont nees avec eulx, s'esveillent alors par emulation de ceulx qui ont esté ou qui sont en degré pareil

à eulx : et comme en noblesse de sang et en grandeur d'estat, ilz ne veulent ceder à personne, encore moins le veulent ilz en gloire de faicts vertueux. Dequoy lon pourroit alleguer innombrables exemples, si la chose n'estoit de soy tant
5 notoire que la doute en seroit trop plus desraisonnable que la preuve necessaire. Ainsi peut on veritablement conclurre que l'histoire est la maistresse des princes, de laquelle ilz peuvent apprendre sans peine, en passant leur temps, et avec singulier plaisir, la meilleure partie
10 de ce qui est requis à leur office. Or est il que selon la diversité de la matiere qu'elle traite, ou de l'ordre et maniere d'escrire dont elle use, on luy donne noms differents ; mais il y en a entre autres deux principales especes : l'une qui expose au long les faicts et adventures des hommes,
15 et s'appelle du nom commun d'histoire ; l'autre qui declare leur nature, leurs dicts et leurs mœurs, qui proprement se nomme Vie. Et combien que leurs subjects soyent fort conjoincts, si est ce que l'une regarde plus les choses, l'autre les personnes ; l'une est plus publique, l'autre plus domestique ;
20 l'une concerne plus ce qui est au dehors de l'homme, l'autre ce qui procede du dedans ; l'une les evenemens, et l'autre les conseils ; entre lesquels il y a bien souvent grande difference, fuyvant ce que Siramnes Persien respondit à ceulx qui s'esbahissoient dont venoit que ses devis estoient
25 si sages, et ses effects si peu heureux : « C'est pourautant, » dit il, que les devis sont en ma pleine disposition, et les « effects en celle de fortune et du roy ». Mais entre tous ceulx qui se meslerent oncques de rediger par escript les vies des illustres hommes, la palme d'excellence, au jugement
30 des plus clair voyans, est meritoirement adjugee à Plutarque, philosophe Grec, natif de la ville de Chæronee, en la

province de la Bœoe, homme noble, consommé en tout rare
sçavoir, ainsi comme ses œuvres ne laissent douter à qui
les a entierement leuës. Et ayant toute sa vie jusques en
sa vieillesse manié affaires publiques, comme luy mesme
5 tesmoigne en plusieurs lieux, mesmement au traitté qu'il a
fait, Si l'homme vieil se doibt entremettre du gouvernement
de la chose publique : et qui jadis eut cest heur et honneur
que d'estre precepteur de l'empereur Trajan, ainsi que lon
tient communement, et qu'il est expressement porté par une
10 missive qui se lit au devant de la traduction latine de ses
Politiques, laquelle à dire la verité m'est un petit suspecte,
pource que je ne l'ay point trouuee entre ses œuvres
grecques, joinct que elle parle comme si le livre estoit
dedié à Trajan, ce qui est manifestement dedict par le
15 commencement du livre, et pour quelques autres raisons :
encore toutefois, pource qu'elle m'a semblé sagement et
gravement escripte, et estre digne de luy, je l'ay inseree en
ce lieu : « Plutarque à Trajan, Salut. Je sçavoye bien que
« la moderation de ta nature n'estoit poinct convoiteuse
20 « de l'Empire, combien que par honesteté de vie tu
« te sois tousjours efforcé de le meriter, à raison dequoy
« tu en es de tant plus estimé digne, que plus on te
« treuve esloigné du vice d'ambition. C'est pourquoy
« maintenant je m'esjouy avec ta vertu et avec ma
25 « fortune, si tant est que tu vueilles justement adminis-
« trer ce que tu as deuëment merité. Car autrement je
« suis asseuré que tu t'es exposé à de grands dangers,
« et moy aux langues des mesdisans, pourautant que
« Rome ne peut endurer un lasche empereur, et que la
30 « commune voix du peuple a tousjours accoustumé de
« rejeter les fautes des disciples sur leurs maistres,

« comme Seneque est deschiré par les langues des mesdi-
« sans pour les pechez de son Neron, la temerité des
« jeunes disciples de Quintilian est imputee à luy mesme,
« et blasme lon Socrates d'avoir esté trop doulx à son
5 « pupille : Mais quant à toy, tu feras bien toutes choses
« prouveu que tu ne te departes point d'avec toy mesme,
« et si tu te composes le premier, et disposes toutes
« autres choses à la vertu, il n'y aura rien qui ne
« succede selon ton desir. Je t'ay descript les moyens qu'il
10 « fault tenir pour bien administrer une chose publique,
« et ay monstré combien les meurs y ont de pouvoir. Si
« tu y veux obtemperer, tu as Plutarque pour directeur
« et guide de ta vie : si non, je proteste par ceste missive
« que ce n'est point de la doctrine de Plutarque que tu
15 « vas au dommage et à la ruine de l'Empire. » Ceste
epistre tesmoigne disertement qu'il a esté precepteur de
Trajan : à quoy il semble que s'y rapporte aussi ce que
Suidas'en escrit, disant : « Plutarque, natif de la ville
« de Chæronée en la Bœoe, fut du temps de l'empereur
20 « Trajan et encore devant. Mais Trajan luy donna
« l'honneur de la dignité consulaire : et voulut que les
« officiers et magistrats qui seroyent en toute la province
« de l'Esclavonnie ne feissent chose aucune sans son
« autorité. » Voila ce qu'en escrit Suidas, et me semble
25 bien que Trajan si sage empereur ne luy eust pas fait ce
grand honneur, s'il ne se fust senty tenu à luy de quelque
obligation notable : mais ce qui plus'encore me semont à le
croire, c'est que lon voit en plusieurs faicts et dicts de Trajan
la mesme droiture, bonté et justice naïvement emprainte,
30 dont le moule et la forme est, par maniere de dire, engravée
es œuvres morales de Plutarque, de sorte que lon remarque

notoirement que l'un a bien sceu faire ce que l'autre luy a sagement enseigné. Car Dion escrit qu'entre autres honneurs que le Senat de Rome decerna à Trajan, il luy donna le tiltre d'Optimus Imperator, c'est à dire, tresbon
5 Empereur. Et Eutropius met que jusques à son temps, quand un nouveau empereur venoit à estre receu au senat, entre les cris d'heureux presage, et les souhaits qu'on luy faisoit, on luy crioit : « Que puisses tu estre plus heureux
« qu'Auguste, et meilleur que Trajan ». Comment que ce
10 soit, il est bien certain que Plutarque luy dedia le recueil de ses Apophthegmes. Mais estant retiré en sa maison, apres avoir longuement vescu à Rome, il se meit à escrire ceste euvre excellente des Vies, qu'il appella Parallelon, comme qui diroit l'accouplement ou assortissement, pource
15 qu'il accouple un Grec avec un Romain, mettant leurs vies l'une devant l'autre, et les conserant ensemble, selon qu'ilz se sont trouvez avoir entre eulx conformité de nature, de meurs et d'aventures, en examinant ce que l'un a eu de meilleur ou de pire, de plus grand ou de plus petit que
20 l'autre : le tout avec tant de beaux et graves discours par tout, tirez des plus profonds et plus cachez secrets de la philosophie morale et naturelle, tant de sages advertissemens et de fructueuses instructions, si affectueuse recommandation de la vertu et detestation du vice, tant de belles allegations
25 d'autres autheurs, tant de propres comparaisons et tant de hautes inventions, que le livre se doit plustost nommer un tresor de toute rare et exquise litterature, que de luy donner autre nom. Aussi dit on que Theodorus Gaza, personnage Grec d'erudition singuliere, et digne de l'ancienne
30 Grece, estant quelques fois enquis par ses familiers amis, qui le voyoyent si fort affectionné à l'estude qu'il en oublioit

- toute autre chose, quel autheur il choisiroit entre tous, s'il estoit reduit à ce point de n'en pouvoir retenir qu'un tout seul, il respondit qu'il esliroit Plutarque, pource que tout compris, il n'y en a pas un qui soit si profitable et si delectable ensemble à lire que luy. Celuy auquel il dedie son œuvre, Sosius Senecio, estoit un Senateur Romain, ainsi que tesmoigne Dion, qui escrit que les trois personnages que Trajan aimoit et honoroit le plus, estoient Sosius, Parma et Celsus, jusques à leur faire à tous trois eriger des statues.
- 10 Il est vray qu'il avoit escript beaucoup d'autres vies, que l'injure du temps nous a enviees, comme notamment luy mesme fait mention de celles de Scipion l'Africain et de Metellus le Numidique : et j'ay leu une petite epistre d'un sien filz, ou il n'y a point de nom, transcribed d'un vieil
- 15 exemplaire de la librairie de S. Marc à Venize, par laquelle il escrit à un sien amy la liste de tous les livres que son pere a composez : là ou entre les coupplés des vies il met celle de Scipion et d'Epaminondas, et au bout celles d'Augustus Cæsar, de Tiberius, de Caligula, de Clodius,
- 20 de Neron, de Galba, de Vitellius et d'Othon. Mais ayant fait toute diligence à moy possible de les chercher es principales librairies de Venize et de Rome, je ne les ay peu recouvrer, seulement en ay je tiré plusieurs diversitez de leçons, et plusieurs corrections, en conferant les vieux livres
- 25 escrits à la main avec ceux qui sont imprimez, qui m'ont grandement servy à l'intelligence de plusieurs difficiles passages : et plusieurs y en a aussi que j'ay restitué par conjecture, avec le jugement et l'aide de quelques uns des plus sçavans hommes de cest aage en lettres humaines.
- 30 Toutefois encore est il demeuré quelques lieux, mais peu, esquelz, pource qu'il y a en l'original omission de quelques

lignes, à mon advis, j'ay mieulx aimé tesmoigner la defec-
 tuosité par la marque d'une estoile, que de temerairement
 deviner, ou y rien adjouster. Mais au reste si je me suis
 en quelques endroits abusé, comme il est bien aisé en auteur
 5 si obscur et ouvrage si long, mesmement à personne de si
 peu de suffisance comme moy, je prieray les lisans de vouloir
 pour ma descharge accepter l'excuse que me donne le poëte
 Horace, quand il dit :

- « En euvre longue il n'est pas de merveille,
 10 « Si quelquefois l'entendement sommeille. »

Attendu mesmement que tant de gens de bien et de sçavoir,
 y ayants par cy devant mis la main pour le traduire, il
 ne s'en est encore trouvé pas un que moy seul, qui l'ait
 entierement achevé en quelque langue que ce soit, au moins
 15 que j'aye sçeu ne veu : et que ceulx qui se sont meslez d'en
 traduire, mesmement en Latin, ont evidemment tesmoigné
 la difficulté qu'il y a, ainsi que pourront facilement
 cognoistre ceulx qui voudront prendre la peine de conserer
 noz traductions. Mais si, peut estre, lon ne trouve le
 20 langage de ceste translation si coulant, comme lon a fait
 de quelques autres miennes, qui de pieça sont entre les
 mains des hommes, je prie les lecteurs de vouloir considerer
 que l'office d'un propre traducteur ne gist pas seulement à
 rendre fidelement la sentence de son auteur, mais aussi à
 25 représenter aucunement et à adombrer la forme du style et
 maniere de parler d'iceluy, s'il ne veut commettre l'erreur
 que feroit le peintre, qui ayant pris à pourtraire un
 homme au vif, le peindroit long, là ou il seroit court, et

*gros, là ou il seroit gresle, encore qu'il le feist naïfvement
bien ressembler de visage. Car encore puis je bien asseurer,
quelque dur ou rude que soit le langage, que ma traduc-
tion sera beaucoup plus aisee aux François que l'original
5 Grec à ceulx mesmes qui sont les plus exercitez en la langue
Grecque, pour une façon d'escrire plus aiguë, plus docte et
pressee, que claire, polie ou aisee, qui est propre à Plutarque.
Au fort, si je ne m'en suis acquitté si heureusement que
vous eussiez pensé et désiré, Seigneurs lisans, encore ay-je
10 esperance que vous excuserez le bon vouloir de celuy qui en
y aspirant a tasché de vous profiter. Et si ce mien labeur
sera si heureux que de vous contenter, à Dieu en soit la
louange, qui m'a donné la grace de le parachever.*

PERICLES

I. Cæsar, voyant un jour à Rome quelques estrangers, hommes riches et opulents, qui avoyent tousjours entre leurs bras de petits chiens et de petites guenons, et les cherissoient merveilleusement, leur demanda si les
5 femmes en leur païs ne faisoient pas des enfans : reprenant tressagement ceulx qui employent envers les bestes l'inclination à aimer et l'affection de charité que la nature a mise en nous pour en user envers les hommes, et non pas envers les bestes. Au cas pareil, aussi ayant la nature
10 empraint en nostre ame un desir naturel d'apprendre et de sçavoir, il est bien raisonnable de reprendre ceulx qui abusent de ce desir à ouir et apprendre choses qui n'apportent aucun fruit, et ce pendant mettent à nonchaloir celles qui sont utiles et honnestes. Car quant au sens
15 exterieur qui avec quelque passion reçoit impression de son object, il luy est à l'adventure force de considerer indifferemment tout ce qui se presente à luy, utile ou inutile qu'il soit : mais il n'est pas ainsi de l'entendement, pource que chascun en peut user à sa volonté, et
20 le tourner facilement à toute heure, et appliquer à ce que bon luy semble : à raison dequoy il le fault tousjours addonner à ce qui est le meilleur, à fin que non seule-

9 D : Au cas pareil ayant la nature — 19 D : volonté [*et sic passim*]

T. fr. mod. — Amyot, I.

1



ment il le contemple, mais aussi qu'il s'en repaïsse et nourrisse en le contemplant. Car tout ainsi que la couleur la plus propre pour l'œil est celle qui de sa vivacité jointe avec une gayeté resjouit et conforte la veuë, aussi
 5 doit on appliquer son entendement à contemplations, qui en delectant le tirent quand et quand à ce qui est son propre bien : comme sont les effects de la vertu, lesquelz en les oyant ou lisant impriment es cueurs une affection et un zeile de les ensuyvre. Ce qui n'est pas en toutes
 10 autres choses que nous avons en quelque estime, et ne sommes pas tousjours incitez à desirer faire ce que nous trouvons bien fait : ains au contraire, bien souvent prenans plaisir à l'œuvre, nous en mesprisons l'ouvrier, comme es compositions des parfums et es teintures de
 15 pourpre : car nous nous delectons de l'un et de l'autre, et neantmoins estimons les parfumeurs et teinturiers personnes viles et mechaniques. Pourtant respondit tres-bien Antisthenes à un qui luy disoit que Ismenias estoit excellent joueur de flustes : « C'est-mon, dit-il, mais
 20 « au demourant homme qui ne vault rien : car autrement il ne seroit point si excellent joueur de flustes. » Auquel propos Philippus, roy de Macedoine, dit une fois à son filz Alexandre le grand, qui avoit chanté en un festin fort plaisamment, et en homme qui entendoit bien
 25 l'art de musique : « N'as tu point de honte de chanter « si bien ? » pource qu'il suffit bien que un roy employe quelquefois son loisir à ouïr chanter les chantres, et fait beaucoup d'honneur aux Muses de vouloir estre aucune-fois auditeur des oyvriers de tel art, quand ilz font à
 30 l'envy les uns les autres à qui chantera le mieulx.

6 D : quant et quant — 16 D : parfumeurs — 28 A : estre quelquefois — 29 D : d'un tel art — 30 A, B, D et Du Puys, 1583, in f° : à l'envy les uns des autres

II. Mais qui actuellement exerce quelque art basse et vile, il produit en tesmoignage contre soymesme le labour qu'il a employé en choses inutiles, pour prouver qu'il a esté paresseux à apprendre les honnestes et utiles.

5 Et n'y eut jamais jeune homme de bon cueur et de gentille nature, qui en regardant l'image de Jupiter, laquelle est en la ville de Pise, souhaitast devenir Phidias, ny Polycletus en regardant celle de Juno qui est en Argos, ne qui desirast estre Anacreon, ou Philemon, ou Archi-

10 lochus pour avoir quelquefois pris plaisir à lire leurs œuvres : car il ne s'ensuit pas necessairement, si l'ouvrage delecte, que tousjours l'ouvrier en soit à louer. Ainsi ne profitent point telles choses à ceulx qui les contemplent, pource qu'elles n'engendrent point es cueurs

15 des regardans un zeile de les imiter, ny n'excitent point une affection de les ressembler et de s'y conformer : mais la vertu a cela de propre en ses actions, qu'elle rend l'homme qui la cognoist affectionné de sorte que tout ensemble il en treuve les actes beaux, et desire ressem-

20 bler à ceulx qui les font. Car des biens de la fortune nous en aimons la fruition et la possession, et de la vertu l'action : au moyen dequoy nous sommes bien contents d'avoir ces biens la des autres, mais ceulx cy, nous voulons que les autres les ayent de nous. Car la vertu a ceste

25 force qu'elle incite la volonté de l'homme qui la considere, à la vouloir incontinent exercer, et engendre en son cueur une envie de la mettre en execution, formant les meurs de celuy qui la contemple, non point par imitation, ains par la seule intelligence et cognoissance de

30 l'acte vertueux, qui tout soudain luy apporte un instinct et un propos deliberé de faire le semblable. C'est pour-

20 D : car de biens de la fortune

114011



quoy j'ay estimé que je devois continuer à mettre par
 escript les vies des hommes illustres, et en ay composé
 ce dixieme livre, auquel sont contenues celles de Pericles,
 et de Fabius Maximus qui sousteint la guerre contre
 5 Hannibal : pource que ce ont esté deux personnages sem-
 blables en plusieurs autres vertus, et mesmement en
 douceur et en justice, et qui pour avoir sceu patiem-
 ment supporter les folies de leurs peuples et de leurs
 compagnons es charges de gouvernement, ont esté tres-
 10 utiles à leurs païs : mais si nous avons bien rencontré
 de les assortir et conferer l'un à l'autre, on le pourra
 mieulx juger par ce que nous en mettrons cy dessous en
 escript.

III. Pericles donques estoit de la lignee Acamantide,
 15 du bourg de Cholarge, de l'une des meilleures maisons,
 et plus anciennes races de la ville d'Athenes, tant du costé
 de sa mère que du costé de son pere. Car Xantippus, son
 pere, qui desfeit en bataille les lieutenans du roy de Perse
 en la journee de Mycale, espousa Agariste, laquelle estoit
 20 descendue de Clisthenes, celuy qui chassa d'Athenes les
 descendans de Pisistratus, et ruina vaillamment leur
 tyrannie : puis establit des loix, et ordonna une forme de
 gouvernement fort bien temperé, pour maintenir ses
 citoyens en paix et en concorde les uns avec les autres.
 25 Ceste Agariste songea une nuit qu'elle avoit enfanté un
 lion : et peu de jours apres elle accoucha de Pericles, si
 bien formé en toutes les parties de son corps, qu'il n'y
 avoit que redire, excepté qu'il avoit un peu la teste longue
 et desproportionnee en grosseur au reste de la personne :
 30 qui est la cause pourquoy toutes ses statues presque ont
 l'armet en teste, n'ayans pas les ouvriers, ainsi qu'il est

9 D : és charges du gouvernement — 29 A et D : desproportionnee



vray-semblable, voulu luy reprocher celle deformité. Mais les poëtes Attiques l'appelloyent Schinocephalos, qui vault autant à dire comme teste d'ougnon, pource que les Attiques appellent aucunesfois ce qui s'appelle en langue commune Scilla, c'est à dire, ougnon de Barbarie, Schinos : et Cratinus, poëte comique, en la comedie qu'il a intitulee Chirones, dit :

Le vieil Saturne avec Sedition
 Ont engendré par leur conjunction
 10 Ce grand Titan, qu'en la cour immortelle
 Des Dieux du ciel Grosse teste on appelle.

Et de rechef en celle qui se nomme Nemesis, en parlant de luy, il dit :

Vien, Jupiter, hostelier, longue teste.

15 Et Teleclides aussi se moquant de luy, dit en un lieu :

Aucunesfois ne sachant bonnement
 Ou il en est de son gouvernement,
 Il se tient coy, et point ne se presente,
 Sentant du mal en sa teste pesante :
 20 Mais quelquefois aussi seul il desserre
 De son grand chef un merveilleux tonnerre.

Et Eupolis, en la comedie qu'il intitule Demi, en interrogant et demandant particulierement de chascun des orateurs, qu'il feinct estre retournez des enfers, quand
 25 on luy nomme Pericles le dernier, il dit :

Certainement amené tu nous as
 Le chef de tous ceux qui estoient là bas.

IV. Or quant à la musique, la pluspart des auteurs escrit que Damon fut celuy qui la luy enseigna, le nom



duquel, comme lon dit, se doit prononcer la premiere syllabe briefve : mais toutefois Aristote dit qu'il apprit la musique chez Pythoclide. Comment que ce soit, il est certain que cestuy Damon estoit homme fort entendu et
 5 ruzé en matiere de gouvernement, qui, pour dissimuler et cacher au peuple sa suffisance en cela, se couvroit du nom de musicien, et hantoit autour de Pericles comme un maistre de lucte ou d'escrime, qui luy enseignoit comme il se devoit conduire es affaires d'estat : toutefois
 10 à la fin il ne peut si bien dissimuler, que le peuple ne cogneust qu'il se servoit de sa lyre et de la musique pour couverture : et comme homme remuant, entreprenant, et favorisant à la tyrannie, fut banny pour cinq ans : ce qui donna aux poëtes comiques matiere de parler, entre
 15 lesquelz Platon en une de ses comedies introduit quelcun qui luy demande :

Dis moy premier Chiron, car il est bruit
 Que Pericles tu as fait et instruit.

Il fut aussi quelque temps auditeur et disciple du philosophe Zenon, natif de la ville d'Elee, qui enseignoit la
 20 philosophie naturelle comme Parmenides ; mais il faisoit profession de contredire à tout le monde, et alleguer tant d'oppositions en disputant, qu'il rengeoit son homme à ne sçavoir que respondre, ny à quoy se resouldre, ainsi
 25 comme Timon Phliasien le tesmoigne en ces vers :

Grande eloquence, et grande force d'art
 Pour disputer en l'une et l'autre part
 Avoit Zenon, reprenant tout le monde
 Quand il vouloit desployer sa faconde.

30 Mais celuy qui frequenta plus avec luy, et qui luy donna celle gravité et celle dignité qu'il gardoit en tous

ses faicts et ses dictz, plus seigneuriale que ne comporte la condition et l'estat de ceulx qui ont à harenguer devant un peuple libre, et qui brief luy eleva ses meurs jusques à une certaine majesté qu'il avoit en toutes ses façons de
5 faire, fut Anaxagoras le Clazomenien, lequel par les hommes de ce siecle la estoit communement appelé Nus, c'est à dire l'entendement, fust ou pource qu'ilz avoyent en singuliere admiration la vivacité et subtilité de son esprit à rechercher les causes des choses naturelles, ou
10 pource que ce fut le premier qui attribua la disposition et le gouvernement de ce monde, non à la fortune ny à la nécessité fatale, ains à une pure et simple intelligence ou entendement, lequel separe, comme cause premiere agente, les substances de parties semblables, qui sont en
15 tous les autres corps de l'univers meslez et composez de diverses substances.

V. Pericles donques ayant ce personnage en singuliere admiration, par lequel il avoit à plein esté instruit en la cognoissance des choses naturelles, mesmement de
20 celles qui se font en l'air et au ciel, en prit non seulement une grandeur et hauteuse de courage, et une dignité de langage ou il n'y avoit rien d'affetté, de bas, ny de populaire, mais aussi une constance de visage qui ne se mouvoit pas facilement à rire, une gravité en son mar-
25 cher, un ton de voix qui jamais ne se perdoit, une contenance rassise, et un port honneste de son habillement, qui jamais ne se troubloit pour chose quelconque qui luy advinst en parlant, et autres semblables choses, qui apportoyent à tous ceulx qui les voyoyent et conside-
30 roient un merveilleux esbahissement. Auquel propos on compte qu'il y eut quelquefois un meschant effronté, qui

25 A : ne se perdoit, et une contenance rassise et fort honneste de son habillement — 28 A : qui luy advint

- fut tout un jour à l'oultrager de paroles diffamatoires en pleine place, et à luy dire toutes les injures dont il se pouvoit adviser : ce qu'il endura patiemment sans jamais luy respondre un seul mot, depeschant ce pendant
 5 quelque affaire de consequence, jusques au soir qu'il se retira tout doucement en son logis, sans se monstrier alteré en façon quelconque, combien que cest importun la le suyvist tousjours en luy disant tous les outrages qu'il est possible de dire : et comme il fut prest à entrer
 10 dedans son logis, estant desja nuict toute noire, il commanda à l'un de ses serviteurs qu'il prist une torche, et qu'il allast reconduire cest homme, et l'accompagner jusques en sa maison : toutefois le poëte Ion escrit que la frequentation de Pericles estoit superbe et arrogante,
 15 et que parmy sa gravité et sa magnanimité il y avoit beaucoup d'orgueil et de mespris des autres : et au contraire il louë grandement la civilité, humanité et courtoisie de Cimon, en ce qu'il se sçavoit dextrement accommoder à toutes compagnies. Mais il ne nous faut pas
 20 arrester à ce que dit ce poëte Ion, qui voudroit qu'en la vertu il y eust, comme en quelques tragedies, une partie ou lon introduisist des Satyres pour faire rire : et au contraire, Zenon conseilloit à ceulx qui disoyent que la gravité de Pericles estoit une presumption et une
 25 arrogance, qu'ilz feissent les presumptueux comme luy : pource que ceste maniere de contrefaire les choses honnestes et vertueuses apporte secretement, avec le temps, une affection de les aimer et de s'y vouloir accoustumer à bon esciant.
- 30 VI. Si ne receut pas seulement Pericles ces biens la de la conversation d'Anaxagoras, ains y apprit aussi à chas-

25 A : qu'ilz feissent les presumptueux [comme luy, *ajouté par C.*] —

28 A : accoustumer

ser hors de soy et mettre sous les pieds toute superstitieuse crainte des signes celestes et des impressions qui se forment en l'air : lesquelles apportent grande terreur à ceulx qui en ignorent les causes, et à ceulx qui craignent
5 les Dieux d'une frayeur esperdue, pource qu'ilz n'en ont aucune cognoissance certaine, que la vraye philosophie naturelle donne, et au lieu d'une tremblante et tousjours effroyee superstition, engendre une vraye devotion accompagnee d'asseuree esperance de bien. Lon dit à ce
10 propos que lon apporta un jour à Pericles de l'une de ses terres la teste d'un belier qui n'avoit qu'une corne seule, et que le devin Lampon ayant consideré ceste teste qui n'avoit qu'une corne forte et dure au milieu du front, interpreta que cela vouloit dire, que y ayant deux
15 ligues et deux parts en la ville d'Athenes touchant le gouvernement, celle de Pericles et celle de Thucydides, la puissance des deux seroit toute reduitte en une, et notamment en celle de celuy en la maison duquel ce signe estoit advenu : mais que Anaxagoras qui se trouva là present,
20 feit fendre le test en deux, et monstra aux assistans comme le cerveau du belier n'emplissoit pas la capacité de son lieu naturel, ains se resserroit de toutes parts, et alloit aboutissant en pointe comme un œuf, à l'endroit ou la corne prenoit le commencement de sa racine : si en fut
25 Anaxagoras fort estimé sur l'heure par tous les assistans, mais Lampon le fut aussi bien tost apres, quand Thucydides fut chassé, et que tous les affaires de la chose publique universellement tumberent entre les mains de Pericles. Aussi n'est il pas inconvenient, à mon advis, que le
30 philosophe naturel et le devin ayent bien et veritablement rencontré tout ensemble, ayant l'un bien pris la cause, et l'autre la fin de cest evenement : car la profession de l'un est de rechercher comment il se fait, et de l'autre pour-

quoy il se fait, et de sçavoir predire ce qu'il signifie. Car quant à ceulx qui disent que rendre la cause soit oster la signifiante du signe, ilz ne considerent pas qu'en voulant abolir par ceste raison les predictions des signes et prodiges celestes, ils ostent aussi ceulx qui se font par artifice, comme les sons des bassins, les lumieres des feus le long de la marine, les umbres des aiguilles es horloges au soleil, toutes lesquelles choses se font par quelque cause et quelque manufacture, pour estre signe de quelque chose : mais ceste dispute à l'adventure appartient mieulx à un autre traitté.

VII. Et pour retourner à Pericles, estant encore jeune il redoubtoit fort le peuple, pource qu'il sembloit retraire un peu de visage à Pisistratus, et les plus vieux de la ville craignoient aussi fort sa voix qui estoit douce, sa langue diserte, et sa parole aisee, à cause qu'elle ressembloit à celle de Pisistratus. Davantage il avoit beaucoup de biens, et estoit de l'une des plus nobles maisons de la ville, et si estoient ses amis ceulx qui avoyent le plus de credit et d'autorité au manienent des affaires : au moyen dequoy, craignant qu'il ne fust banny du ban de l'ostracisme, il ne s'entremettoit point du gouvernement en façon quelconque, et à la guerre se monstroient vaillant homme, et qui n'espargnoit point sa personne. Mais apres que Aristides fut mort, que Themistocles eut esté chassé, et que Cimon ayant charge des armées se trouva la plus part du temps hors de la Grece, occupé en guerres lointaines, alors il se rengea à la ligue du menu peuple, preferant la multitude de la commune pauvre au petit nombre des nobles et des riches : ce qui estoit contre son naturel, pource que de soy mesme il n'estoit point populaire :

5 A : ils ostent aussi quand et quand ceulx

mais il le feit, comme il est vraysemblable, pour eviter la
 suspicion qu'il pretendist à usurper la tyrannie : et aussi
 pource qu'il voyoit que Cimon inclinoit entierement du
 costé de la noblesse, et estoit singulierement aimé et
 5 porté des gens de bien, luy au contraire se jetta entre les
 bras de la commune, se provoyant par ce moyen de seure-
 teté pour soymesme, et d'autorité contre luy. Si com-
 mencea incontinent à suyvre une toute nouvelle maniere
 de vivre, depuis qu'il se fut mis aux affaires : car on ne
 10 le veit onques-puis aller par la ville, sinon qu'il allast ou
 en la place ou au senat. Il desista d'aller aux banquetz ou
 lon le convioit, et laissa tout autre tel entretien d'amis,
 et toute telle maniere de conversation, tellement qu'en
 tout le temps qu'il se mesla du gouvernement de la
 15 chose publique, qui fut fort long, il n'alla jamais soupper
 chez pas un de ses amis, sinon qu'il fut au festin des nopces
 d'Euryptolemus son nepveu, encore n'y demoura il
 que jusques aux graces quand lon offre du vin aux
 Dieux, et se leva de table incontinent, pource que ces
 20 amiables privaultez la abaissent fort toute haultesse
 affectee pour apparoir, et est bien difficile de maintenir
 une severe gravité pour garder sa reputation en se laissant
 familièrement hanter à tout le monde. Il est vray qu'en
 une vraye vertu entiere, cela est tousjours le plus beau qui
 25 est le plus apparent, et n'y a rien esgens de bien et d'hon-
 neur que les estrangers trouvent si admirable, comme
 leurs domestiques qui sont tousjours à l'entour d'eulx
 trouvent leur vie ordinaire. Pericles donques, pour obvier
 à ce que le peuple ne se saoulast de luy, s'il le voyoit con-
 30 tinuellement, ne s'approchoit de luy, et ne se presentoit
 devant luy que par intervalles, ny ne parloit pas de

toutes matieres, et ne sortoit pas en public, ains se reser-
voit ne plus ne moins que lon gardoit à Athenes la
galere Salaminienne, comme dit Critolaus, pour les ma-
tieres de grande consequence : et ce pendant manioit les
5 autres affaires de moindre importance par l'entremise de
quelques orateurs qui estoient ses familiers, entre les-
quelz Ephialtes, à ce que lon dit, en estoit l'un, celuy
qui osta l'autorité et la puissance à la cour d'Areopage,
et donna trop grande et trop effrenee licence au peuple,
10 ainsi que dit Platon : à l'occasion de laquelle, ce disent
les poëtes comiques, il devint si insolent qu'on ne le
pouvoit plus tenir non plus qu'un jeune cheval qui n'a
point de bride, et prit une audace telle, qu'il ne voulut
plus obeir, ains mordit l'isle d'Eubœe, et saulta dessus
15 les autres isles.

VIII. Pericles donques se voulant former un stile de
parler, et une façon de langage comme un outil conve-
nable et conforme à la maniere de vivre et à la gravité
qu'il avoit prise, y employoit à tous propos ce qu'il avoit
20 appris de Anaxagoras, coulourant ses raisons de philoso-
phie naturelle par l'artifice de rhetorique : car ayant acquis
par l'estude de ceste philosophie une haultesse de con-
ceptions et une efficace de venir à bout de tout ce qu'il
prenoit à prouver, avec ce que de nature il estoit doué
25 de bon entendement, comme escrit le divin Platon, et en
tirant ce qui convenoit à son propos, qu'il accoustroit
puis apres par artifice d'eloquence, il se rendit de beau-
coup plus excellent orateur que nul autre de son temps :
au moyen dequoy luy fut, comme lon dit, imposé le sur-
30 nom d'Olympien, qui vault autant à dire comme celeste
ou divin : encore que quelques uns vueillent dire que ce
fut à cause des beaux ouvrages et des edifices publiques
dont il embellit la ville d'Athenes : et d'autres à cause de la

grande autorité et puissance qu'il avoit au gouvernement tant en guerre qu'en paix. Mais il n'est pas inconvenient que ceste gloire ne luy ait esté deferee, à raison de plusieurs excellentes qualitez ensemble qui estoient en luy :

5 toutefois les comedies que feirent jouer les poëtes de ce temps la, esquelles il y a plusieurs paroles dites de luy, les unes à bon esciant, les autres en jeu et avec risee, tesmoignent que ce fut pour son eloquence principalement que luy fut donné ce surnom : car ilz disent qu'il

10 tonnoit, qu'il esclairoit en harenguant, et qu'il portoit sur sa langue une fouldre terrible. Auquel propos on fait un compte d'une response de Thucydides, filz de Milesius, qu'il feit touchant la force d'eloquence de Pericles assez plaisamment : car il estoit homme de bien et d'honneur,

15 et avoit longuement fait teste au gouvernement des affaires à Pericles. Comme donques Archidamus, roy de Lacedæmone, luy demandast un jour le quel luctoit le mieulx de luy ou de Pericles, il luy respondit : « Quand

« je l'ay jetté par terre en luctant, il sçait si bien dire en

20 « le niant, qu'il fait croire aux assistans qu'il n'est point « tumbé, et leur persuade le contraire de ce qu'ilz ont « veu. » Toutefois il estoit fort retenu et reservé en son parler, de sorte que toutes les fois qu'il s'alloit presenter à la tribune des harengues pour prescher le peuple, il

25 faisoit prieres aux Dieux qu'il ne luy eschappast de la bouche, sans y penser, aucune parole qui ne servist bien à la matiere qu'il avoit à traiter : toutefois il n'est rien demouré de ses œuvres par escrit, si ce ne sont quelques edicts qu'il meit en avant : encore a lon retiré par me-

30 moire bien peu de ses dicts notables, comme quand il dit, « qu'il falloit oster la ville d'Ægine, pource qu'elle estoit

« comme une paille en l'œil du port de Pyræe » : et une autre fois qu'il dit : « qu'il voyoit ja de loing la guerre qui leur « couroit sus de devers le Peloponese. » Une autre fois, ainsi comme il s'embarquoit avec Sophocles, qui lors
5 estoit son compagnon en la charge de capitaine general, et qui luy louoit la beauté d'un jeune garçon qu'ilz rencontrerent par le chemin : « Il faut, luy dit il, Sophocles, qu'un « gouverneur ait non seulement les mains nettes, mais « les yeux aussi. » Et Stesimbrotus escrit qu'en la
10 harengue funebre qu'il feit à la louange de ceulx qui estoyent morts en la guerre de Samos, il dit qu'ilz estoyent immortelz comme les Dieux ; car nous ne voyons pas les Dieux en leur essence ; mais, par les honneurs que lon leur fait, et par les grands biens dont ilz jouissent,
15 nous conjecturons qu'ilz soyent immortelz, et les mesmes choses sont en ceulx qui meurent pour la defense de leur païs.

IX. Or pource que Thucydides décrit le gouvernement de la chose publique soubz Pericles comme un gouverne-
20 ment de la noblesse, et qui en apparence sembloit bien estre populaire, mais en effect estoit une principauté regie par le sens et l'autorité du premier homme de la ville, et que plusieurs autres disent que ce fut luy qui premierement meit en avant la coustume de departir au
25 peuple les terres conquises en guerre, et de leur distribuer des deniers communs pour veoir les jeux, et qui leur ordonna salaire pour toutes choses : qui fut une mauvaise accoustumance, à cause que le commun populaire, qui paravant se passoit à peu, et qui gaignoit sa vie à
30 la peine de son corps, en devint superflu, sumptueux et dissolu, pour les choses qui furent lors introduites : lon

pourra veoir par la simple exposition du faict la cause de ceste mutation. Car Pericles à son advenement, ainsi que nous avons dit par cy devant, pour acquerir reputation pareille à celle de Cimon, tascha à se mettre en la
 5 bonne grace du commun populaire : mais n'ayant pas la richesse ny les biens si grands que luy, pour soustenir la despense telle que faisoit Cimon, par laquelle il entretenoit les pauvres, en tenant maison ouverte à tous venans, en revestant les pauvres vieilles gens, et faisant
 10 oster les clostures de ses terres, vergers et heritages, à fin que chascun y peust entrer et y cueillir des fructs à son plaisir : se voyant par ces moyens la surmonté en la bienvueillance du commun populaire, il se meit à introduire ces distributions de deniers communs, à la sugges-
 15 tion et par le conseil de Demonides, natif de l'isle d'Ios, ainsi comme Aristote le recite : et ayant en peu de temps gaigné la bonne grace du menu populaire par ces distributions de deniers communs, qu'il leur faisoit departir, tant pour avoir lieu à veoir jouer les jeux, comme pour
 20 le salaire d'assister aux jugemens, et par autres semblables corruptions, il s'en servit puis apres à l'encontre de la cour d'Areopage, du corps de laquelle il ne fut jamais, pource qu'il ne luy estoit onques escheut par le sort d'estre ny prevost annuel, ny conservateur des loix, ny roy des
 25 sacrifices, ny maistre des guerres, qui estoyent offices lesquelz de toute ancienneté se creoyent par le sort : et ceulx à qui le sort touchoit, s'ilz s'estoyent bien portez en l'administration de leurs magistrats, montoyent et venoyent à estre du corps de la cour d'Areopage. Pericles
 30 donques, par ces moyens ayant acquis grand credit et grande autorité entre le menu peuple, embrouilla telle-

12 A : [coupe mal cette période, commence une autre phrase à se voyant]—

14 D : suggestion — 30 D : par ce moyen

ment ce senat d'Areopage, qu'il luy fait oster la cognoissance de plusieurs matieres, par l'entremise d'Ephialtes, et fait bannir d'Athenes à temps Cimon, comme favorisant aux Lacedæmoniens, et contrariant au bien et à l'authorité du peuple, encore que ce fust le plus riche et le plus noble de toute la ville, et qui avoit gagné de plus glorieuses victoires, et avoit emply la cité d'Athenes de despouilles conquises sur les ennemis, ainsi comme nous avons escrit en sa vie : tant estoit grande l'authorité de Pericles envers le peuple.

X. Or le bannissement dont il fut banny, que lon appelle ostracisme, estoit par la loy limité à dix ans, durans lesquelz estans les Lacedæmoniens descendus avec grosse puissance en la contree de Tanagre, les Atheniens leur allerent incontinent au devant : là ou Cimon voulant faire veoir par effect que lon le calumnioit faulcement de favoriser aux Lacedæmoniens, s'y en alla se presenter en armes pour combatre avec ceulx de sa lignee : mais les amis de Pericles se banderent ensemble, qui le contraignirent de se retirer comme banny. Ce qui fut aussi cause que Pericles combatit celle journee plus asprement que jamais, et y acquit l'honneur d'avoir fait preuve de sa personne autant et plus que nul autre qui fust en toute l'armee. Mais les amis de Cimon, que Pericles chargeoit aussi de porter faveur aux affaires des Lacedæmoniens, y moururent tous entierement : dont les Atheniens se repentirent bien d'avoir chassé Cimon, et le regretterent fort apres avoir esté desfaicts en celle bataille sur les confins du païs d'Attique, mesmement pource qu'ilz s'attendoient bien d'avoir à la saison nouvelle une bien aspre et forte guerre. Ce que sentant Pericles, il ne feignit point de gratifier en cela à la commune, ains luy mesme proposa et meit en avant le decret qu'il fust rappellé :

comme il fut fait. Et retourné que fut Cimon, il moyena la paix entre ces deux citez, pource que les Lacedæmoniens luy portoyent bonne affection, et à l'opposite ilz haïssoyent Pericles et tous les autres gouverneurs. Toutefois il y en a qui escrivent que jamais Pericles ne descendit à le faire rappeler, que premierement ilz n'eussent fait un accord secret entre eulx par l'entremise d'Elpinice, sœur de Cimon, à sçavoir que Cimon iroit avec une armee de deux cents galeres faire la guerre aux
 10 païs de l'obeïssance du roy de Perse, et Pericles demoureroit en sa maison avec l'autorité du gouvernement dedans la ville. Ceste sœur Elpinice avoit ja auparavant une autre fois adoulcy Pericles envers son frere, lors qu'il fut mis en justice pour un crime capital : car Pericles estoit
 15 l'un de ceulx à qui l'accusation en avoit esté deleguee et commise par le peuple. Elpinice alla devers luy, et le pria de ne faire pas du pis qu'il pourroit à son frere. Pericles luy respondit en riant : « Tu es trop vieille, « Elpinice, tu es trop vieille, pour venir à bout de si
 20 « grandes choses. » Toutefois quand ce vint au jugement que la cause fut plaidee, il ne se leva qu'une seule fois pour parler contre luy, comme par maniere d'acquit : et s'en alla, ayant fait moins de mal à Cimon que nul autre des accusateurs. Qui pourra donques adjouxter foy
 25 à Idomeneus, lequel met sus à Pericles qu'il avoit fait occire en trahison l'orateur Ephialtes qui estoit son amy, et avoit tousjours esté de son advis et de son party au gouvernement de la chose publique, par jalousie et envie qu'il portoit à sa gloire ? Car telles paroles diffamatoires,
 30 je ne sçay d'ou ramassees, a Idomeneus vommy comme une humeur cholerique à l'encontre de Pericles : lequel

10 D : demeurerait — 24 D : adjouster — 30 A : vommy comme une cholere

T. fr. mod. — Amyot, I.

encore qu'il ne fust pas à l'aventure du tout irreprehensible, si est ce qu'il avoit le cueur grand et noble, et la nature desireuse d'honneur, esquelles manieres d'hommes lon ne voit pas gueres avenir que telles passions si brutales et si cruelles s'engendrent. Mais cest orateur Ephialtes estant redoubtable à ceulx qui soustenoyent le party de la noblesse, pource qu'il ne pardonnoit aucunement à ceulx qui avoyent en chose quelle qu'elle fust offensé l'autorité du peuple, ains les en poursuyvoit et
10 persecutoit en toute rigueur jusques au bout, ses ennemis luy dresserent embusche par l'entremise d'un Aristodicus Tanagrien, et le feirent tuer en trahison, ainsi comme l'escrit Aristote. Or en ces entrefaites mourut Cimon en l'isle de Cypre, estant general de l'armee de mer
15 d'Athenes : [XI.] parquoy ceulx qui tenoyent le party de la noblesse, voyans que Pericles estoit desja grand, et qu'il marchoit devant tous les autres citoyens de la ville, voulans qu'il y eust quelcun de leur part qui luy feist teste, et luy rabbatist un peu son
20 autorité, de maniere qu'il ne vinst pas à avoir puissance absoluë, ilz luy opposerent Thucydides du bourg de Alopece, homme sage, beaupere de Cimon, pour luy resister. Cestuy Thucydides s'entendoit moins de la guerre que Cimon, mais plus des affaires de ville
25 et du gouvernement de la chose publique, et se tenoit le plus du temps en la ville, là ou combatant continuellement à l'encontre de Pericles en la tribune des harengues à prescher contre luy, il eut en peu de temps mis sus une ligue pareille à celle de Pericles : car il en-
30 garda que les gens de bien et d'honneur, que lon appelle, qui sont les nobles, ne se meslassent et confundissent

4 A et D : advenir — 12 D : en trahison, comme l'escrit

parmy la commune, ainsi comme auparavant, là ou leur dignité estoit offusquee et effacee par la multitude du peuple : ains les separa d'avec la commune, et les assembla tous en un corps, qui vint à avoir puissance egale à l'autre ligue, et meit, par maniere de dire, le contrepoids à la balance. Car du commencement il n'y eut que un peu de debat occulte seulement entre ces deux partialitez, comme une fueille superficielle en une lame de fer, qui fait un peu apparoir la difference de ceulx qui tenoyent le party du peuple, et de ceulx qui tenoyent le party de la noblesse : mais la contention et dissension de ces deux personnages fut comme une profonde incision, qui mespartit la ville en deux partialitez, dont l'une tout publiquement fut appelée la noblesse, et l'autre le peuple. Et pourtant Pericles relaschant encore plus alors la bride au peuple, faisoit toutes choses pour luy aggreer et complaire, donnant ordre qu'il y eust tousjours en la ville quelques jeux, quelques festes, banquets et passetemps publiques, pour entretenir la commune de telz plaisirs honnestes : et outre cela, il envoyoit tous les ans à la guerre une armee de soixante galeres, sur lesquelles y avoit bon nombre de pauvres citoyens, qui neuf mois de l'an durans prenoient soude du public, et ensemble s'apprenoyent et s'exercitoient à l'experience de la marine. Davantage il envoya au pais de la Cherronese mille bourgeois pour y habiter, et departir les terres entre eulx, cinq cents en l'isle de Naxe, en celle d'Andros deux cents cinquante, en la Thrace mille, pour habiter avec les Bisaltes, et d'autres en Italie quand la cité de Sybaris fut rebastie, qui depuis fut surnommer la ville des Thuriens : ce qu'il faisoit pour descharger la ville d'une multitude oisive, qui pour son oisiveté estoit

curieuse et desirouse de choses nouvelles, et aussi pour prouueoir à la necessité des pauvres bourgeois qui n'auoyent rien, avec ce que en logeant ainsi des naturelz citoyens d'Athenes aupres de leurs subjects ou alliez, ce
5 leur estoit comme une garnison qui les tenoit en bride, et les gardoit d'attenter aucune nouuelleté.

XII. Mais ce qui donna plus de plaisir, et adjouxta plus d'ornement à la ville d'Athenes, qui apporta plus d'esbahissement aux estrangers, et qui seul porte suffi-
10 sant tesmoignage que ce que lon dit de l'ancienne puissance, richesse et opulence de la Grece, n'est point chose faulse, c'est la magnificence des ouvrages et edifices publics qu'il feit faire. Aussi est-ce l'œuvre de toutes celles de Pericles, pour laquelle ses envieux et malvueil-
15 lans luy porterent plus d'envie, et dont ilz le calumnierent plus, crians contre luy en toutes les assemblees de conseil, que le peuple d'Athenes estoit diffamé pour auoir transporté les deniers comptans de toute la Grece, qui estoient en depost dedans l'isle de Delos : et encore que
20 la plus honneste excuse que lon eust pour couvrir ce faict, en disant que c'estoit pour la crainte des Barbares, à fin de le mettre en lieu fort, ou il fust en plus seure garde, Pericles la leur auoit ostee, et que c'estoit une trop grande injure faite à tout le demourant de la Grece, et un tour
25 de manifeste tyrannie, attendu qu'elle voit devant ses yeux que l'argent que lon luy a fait contribuer à force pour les affaires de la guerre contre les Barbares, nous l'employons à faire dorer, embellir et accoustre nostre ville, ne plus ne moins qu'une femme glorieuse, qui
30 veult estre paree de riches joyaulx et de pierres precieuses, et en faisons faire des images, et bastir des

temples d'une excessive despense. Pericles au contraire remonstroit aux Atheniens qu'ilz n'estoyent point tenus de rendre compte de ces deniers à leurs alliez, attendu qu'ilz combatoyent pour eulx, et qu'ilz tenoyent les Barbares loing de la Grece, sans qu'eulx contribuassent pour ce faire un seul homme, un seul cheval, ny un seul vaisseau, ains seulement de l'argent, lequel n'est plus à ceulx qui le payent, ains à ceulx qui le reçoivent, moyenant qu'ilz facent ce pourquoy ilz le reçoivent, et qu'estant leur ville bien prouuee de toutes choses necessaires pour la guerre, il estoit honneste d'employer le surplus de ses finances en choses qui à l'advenir, quand elles seroyent parachevees, leur apporteroient gloire sempiternelle : et des lors que lon estoit encore apres à les faire, les enrichiroyent d'une opulence presente pour la diversité des ouvrages de toutes sortes, et des matieres qui y feroient besoiing, pour lesquelles amener et mettre en œuvre seroyent employez ouvriers de tous mestiers et toutes mains qui vouldroyent travailler, de maniere que tous les habitans de la ville viendroyent à en recevoir paye et salaire du public, et elle par mesme moyen s'embelliroit et se nourrirroit quand et quand de soymesme. Car ceulx qui estoyent forts et dispos de leurs personnes, et en aage de porter armes, avoyent entretenement de la souldie publique, qu'ilz touchoyent en allant à la guerre : et les autres qui ne mesloyent point des armes, comme les gens mechaniques et vivans de leurs bras, il vouloit bien qu'ilz eussent aussi part aux deniers communs, mais non pas sans les gaigner ne sans rien faire. Ce qui fut cause qu'il meit en avant au peuplè des entreprises de grands edifices, et des desseings d'ouvrages de plusieurs mestiers

qui ne se pouvoient achever que avec long traict de temps, à fin que les citoyens qui demouroient en la maison eussent moyen de prendre part aux deniers publiques, et de s'en enrichir aussi bien comme ceulx qui alloient à la guerre, qui servoient aux vaisseaux sur la mer, ou qui estoient engarnison à la garde des places : pource que les uns gaignoyent à fournir les matieres, comme la pierre, le cuyvre, l'yvoire, l'or, l'ebene et le cyprez : les autres à les mettre en œuvre, et à en besongner, comme les charpentiers, 10 mouleurs, fondeurs, imagers, maçons, tailleurs de pierres, teinturiers, orfevres, menuisiers besongnans d'yvoire, peintres, ouvriers de marquetterie, tourneurs : les autres à conduire les estoffes, et à les fournir, comme marchands, mariniers, pilotes es choses qui s'amenoyent par la mer, 15 et par terre les charrons, voituriers, chartiers, cordiers, carriers, selliers, bourreliers, pionniers pour applanir les chemins, fouilleurs de mines. Davantage chascue mestier comme capitaine avoit soubz soy sa propre armee de manœuvres, gaignans leur vie à la peine de leurs bras 20 seulement, pour servir comme d'outils et d'aides aux maistres ouvriers : de maniere que la besongne par ce moyen venoit à espandre et distribuer le gaing à toute aage et à toute qualité et condition de gens.

XIII. Ainsi venoyent les ouvrages à se haulser et avancer, estans superbes en magnificence de grandeur, et 25 nompareilz en grace et beaulté, pource que les ouvriers, chascun en son endroit, s'efforçoyent à l'envy les uns des autres à surmonter la grandeur de leurs ouvrages par l'excellence de l'artifice : mais encore n'y avoit il chose 30 qui fust tant admirable comme la celerité : car là ou lon estimoit chascun desdits ouvrages devoir à peine estre

parachevé en plusieurs aages, et plusieurs successions de vies d'homme les unes apres les autres, tous furent entierement faits et parfaits dedans le temps que dura en vigueur le credit et l'autorité d'un seul gouverneur. Et
5 toutefois lon dit qu'en ce mesme temps la, comme le peintre Agatharchus se glorifiast de ce qu'il peignoit promptement et facilement des bestes, Zeusis l'ayant entendu respondit : « Et moy, au contraire, je me glo-
« rife de demourer long temps à les faire », pource que
10 ordinairement la soudaineté et facilité ne peut donner une fermeté perdurable ny une beaulté parfaite à l'œuvre : mais la longueur du temps, adjouxtée à l'assiduité de labeur en la manufacture d'un ouvrage, luy donne force et vigueur de longue duree. Voila pourquoy les ouvrages
15 que fait alors Pericles sont plus esmerveillables, attendu qu'ilz ont esté parfaits en si peu de temps, et ont duré si longuement : pource que chascun d'iceulx, des lors qu'il fut parfait, sentoit desja son antique quant à la beaulté, et neantmoins quant à la grace et vigueur, il semble jusques
20 aujourdhuy qu'il viene tout freschement d'estre fait et parfait, tant il y a ne sçay quoy de florissante nouveaulté, qui empesche que l'injure du temps n'en empire laveuë, comme si chascun desdits ouvrages avoit au dedans un esprit tousjours renjeunissant, et une ame non jamais
25 vieillissante qui les entreteinst en celle vigueur. Or celuy qui luy conduisoit tout, et avoit la superintendence sur toute la besongne, estoit Phidias, combien qu'il y eust plusieurs autres maistres souverains et ouvriers tresexcellents à chasque ouvrage : car le temple de Pallas qui s'appelle Parthenon, comme qui diroit, le temple de la
30 vierge, et se surnomme Hecatompèdon, pource qu'il a

1 D : des vies — 24 D : rejeunissant — 25 A : entreteint

cent pieds en tout sens, fut edifié par Ictinus et Callicratidas; et la chapelle d'Eleusine, ou se faisoient les secrettes cerimonies des mysteres, fut plantee par Corcebus, lequel dressa le reng des premieres coulottes qui
 5 sont à fleur de terre, et les lia avec leurs architraves : mais, luy mort, Metagenes, natif du bourg de Xypete, feit la ceinture, et puis y renga les coulottes qui sont au dessus, et Xenocles, du bourg de Cholarge, fut celuy qui feit la lanterne ou cul de lampe qui couvre le sanctuaire :
 10 mais la longue muraille, dont Socrates dit avoir luy mesme ouy proposer la structure à Pericles, ce fut Callicrates qui la prit à faire. Le poëte Cratinus en une siene comedie se moque de cest ouvrage la, comme qui alloit trop laschement en avant, et qui demouroit trop à s'ache-
 15 ver, en disant :

Long temps y a que Pericles de bouche
 L'avance fort, mais de faict point n'y touche.

Quant au theatre ou auditoire de musique destiné à ouir les jeux des musiciens, qui s'appelle Odeon, il est bien
 20 par dedans fait à plusieurs ordres de sieges, et plusieurs renga de coulottes, mais la couverture est un seul comble rond, qui se va tout à l'entour courbant et couchant en soymesme, abboutissant en pointe : et dit on qu'il fut fait sur le patron et à la semblance du pavillon du roy
 25 Xerxes, et que Pericles en bailla le devis et l'ordonnance : parquoy Cratinus en un autre passage de la comedie des Thraciens s'en jouë, et s'en moque de luy en disant,

Voicy venir Pericles au surnom
 De Jupiter à la teste d'ougnon,
 30 Qui a dedans son large test compris

De l'Odeon la forme et le pourpris,
Depuis qu'il est eschappé du danger
D'aller banny en pais estranger.

Ce fut lors premier que Pericles procura fort affectueu-
5 sement qu'il fust ordonné par le peuple, qu'au jour de la
feste qui s'appelle Panathenea, lon celebrast des jeux de
pris de musique : et ayant esté luy mesme eleu recteur des-
dicts jeux, pour adjuger le pris à ceulx qui l'auroyent
gaigné, ordonna la maniere comment pour tousjours à
10 l'advenir les musiciens devroyent chanter de la voix, ou
jouer des flustes, ou de la cithre et autres instrumens de
musique. Si fut ce premier jeu de pris de musique fait
dedans l'Odeon, et tousjours depuis y ont aussi esté les
autres celebrez. Quant au portail et aux portiques du
15 chasteau, ilz furent faits et parfaits dedans l'espace de
cinq ans, soubz la conduite de Mnesicles qui fut maistre
de l'œuvre : et advint pendant qu'on les bastissoit un
accident merveilleux, qui monstra bien que la deesse
Minerve ne reprouvoit point celle fabrique, ains l'avoit
20 pour bien agreable : car le plus diligent et le plus affec-
tionné de tous les ouvriers qui y besongnoyent, tumba
d'aventure du hault en bas : de laquelle cheute il fut si
malade que les medecins et chirurgiens n'esperoyent pas
qu'il en peust eschapper. Dequoy Pericles estant fort
25 desplaisant, la deesse s'apparut à luy de nuit en dormant,
qui luy enseigna une medecine, de laquelle il guarit facile-
ment le patient, et en peu de temps : et fut l'occasion
pour laquelle il feit depuis fonder en cuyvre l'image
de Minerve que lon surnomme de Santé, laquelle
30 il feit mettre dedans le temple du chasteau, aupres de
l'autel qui y estoit auparavant, comme lon dit. Or quant

à l'image d'or de la deesse Minerve, ce fut Phidias qui la
 fait, et est ainsi escrit en la base : mais au demourant il
 avoit la superintendence de tous les autres ouvrages
 presque, et commandoit à tous les autres ouvriers pour
 5 l'amitié que luy portoit Pericles : ce qui apporta à l'un
 envie, et à l'autre mauvais bruit : pource que les envieux
 et mesdisans allerent semans par tout un bruit, que Phi-
 dias recevoit en sa maison les dames de la ville, soubz
 couleur d'aller veoir ses ouvrages, pour les livrer à
 10 Pericles. Et les poëtes comiques, prenans l'occasion de ce
 bruit, espendirent à l'encontre de luy force paroles inju-
 rieuses et diffamatoires, le calumnians qu'il entretenoit
 la femme d'un Menippus, qui estoit son amy et son lieu-
 tenant en guerre, et luy mettans sus aussi que Pyrilampes,
 15 l'un de ses familiers, nourrissoit des oyseaux, et notam-
 ment des pans, qu'il envoyoit secrettement aux femmes
 dont Pericles jouissoit. Mais il ne se fault point esbahir
 de ces hommes satyriques la, qui font profession de mes-
 dire et de picquer tout le monde, et qui ordinairement
 20 sacrifient à l'envie du commun populaire, comme à un
 esprit maling, les injures et oultrages qu'ilz jettent à l'en-
 contre des gens de bien et d'honneur, veu que Stesim-
 brotus le Thasien osa bien reprocher à Pericles un crime
 detestable controuvé faulusement, qu'il entretenoit la
 25 femme de son propre filz. Voila pourquoy il est, à mon
 advis, bien difficile et malaisé d'avoir entiere cognoissance
 de la verité des choses anciennes par les monumens des
 histoires, attendu que les successeurs ont la longueur du
 temps, qui leur brouille et offusque la nette intelligence
 30 des affaires : et l'histoire qui est escrite du vivant des
 hommes dont elle parle, et du temps des choses dont

elle fait mention, quelquefois par haine et par envie, et quelquefois par faveur ou par flatterie, desguise et corrompt la vérité.

XIV. Mais comme les orateurs qui estoient de la ligue
 5 de Thucydides, criassent à l'encontre de Pericles en leurs
 harengues ordinaires, qu'il consommoit en vain les
 finances de la chose publique, et y despendoit tout le
 revenu de la ville, Pericles un jour en pleine assemblée
 de ville demanda à l'assistance du peuple, s'il luy sem-
 10 bloit qu'il eust esté trop despendu ; le peuple respondit,
 beaucoup trop : « Bien donques, dit il, ce sera, si vous
 « voulez, à mes despens, et non pas aux vostres, pour-
 « veu qu'il n'y ait aussi que mon nom seul escrit en la
 « dedication des ouvrages. » Quand Pericles eut dit ces
 15 paroles, le peuple, soit ou pource qu'il eust en admira-
 tion sa magnanimité, ou qu'il ne luy voulust point ceder
 l'honneur et la louange d'avoir fait faire de si sumptueux
 et si magnifiques ouvrages, luy cria tout hault qu'il ne le
 vouloit point, ains entendoit qu'il les feist parachever aux
 20 despens du public, sans y rien espargner. Mais à la fin
 estant ouvertement descendu en contention avec Thucy-
 dides, et s'estant mis au hazard à qui feroit bannir son
 compagnon du ban de l'ostracisme, il le gaigna sur luy,
 et le chassa de la ville, et par mesme moyen desfeit aussi
 25 la ligue qui luy estoit contraire.

XV. Parquoy estant toute partialité entierement
 esteincte, et la ville totalement reduitte en union et con-
 corde, il se trouva adonc toute la puissance d'Athenes en
 sa main, et tous les affaires des Atheniens en sa disposi-
 30 tion, les finances, les armes, les galeres, les isles, la mer,
 et une si grande seigneurie, laquelle s'estendoit partie

5 A : en leur harengues — 6 D : harangues — 9 A et D : assis-
 tance — 24 A : desfeit aussi quand et quand la ligue

sur les Grecs et partie sur les Barbares, si bien fortifiée et munie d'obeïssance de nations sujettes, d'amitié de roys, et d'alliance de divers princes et puissans seigneurs. Au moyen dequoy il commença des lors à estre envers
5 le peuple autre qu'il n'avoit accoustumé, et à ne ceder et n'obtemperer plus ainsi facilement à tous les appetits du commun populaire, ne plus ne moins qu'à des vents contraires : et roidit un peu celle trop lasche, trop molle et trop populaire maniere de gouverner, dont il avoit usé
10 jusques à lors, comme une trop delicate et trop effeminee armonie de musique, en la convertissant en un gouvernement plus seigneurial, et tenant plus de l'autorité royale : en cheminant neantmoins tousjours droit, et se maintenant tousjours irreprehensible à faire, à dire et
15 conseiller ce qui estoit le plus expedient pour la chose publique. Il menoit le plus souvent par remonstrances et raisons le peuple à faire volontairement et de bon gré ce qu'il mettoit en avant : mais quelquefois aussi le tiroit il par force, et luy faisoit faire contre sa volonté ce qui
20 estoit pour le mieulx. Suyvant en cela le stile du sage medecin, lequel en une longue et diverse maladie permet aucunesfois à son patient, avec une mesure reservee toutefois, des choses ou il prent plaisir : mais quelquefois aussi luy donne des medecines, qui le travaillent et le
25 tourmentent, pour le guarir. Car, comme il est necessaire en un peuple tenant si grand empire, il advenoit ordinairement des accidents, qui luy apportoyent diverses passions, lesquelles luy seul sçavoit regir et manier dextrement avec deux timons principaux, la crainte et l'esperance, refrenant avec l'une la fierté et temerité insolente
30 de la commune en prosperité, et avec l'autre reconfortant

25 D: guerir

- son ennuy et son descouragement en adversité. En quoy il monstra et prouva evidemment que la rhetorique, comme dit Platon, et l'eloquence, est un art qui mene et manie les esprits des hommes à son plaisir, et que son principal
- 5 artifice est de sçavoir bien mouvoir à propos les passions et les affections, qui sont comme des tons et des sons de l'ame, qui veulent estre touchez et sonnez de main de bon maistre. Dequoy toutefois estoit cause, non la force de son eloquence seulement, ains, comme tesmoigne
- 10 Thucydides, la reputation de sa vie, l'opinion et la fiance que lon avoit de sa preudhommie, pource qu'il n'estoit aucunement corrompable par presens, et que l'avarice ne luy commandoit nullement, attendu qu'ayant rendu sa ville de grande tresgrande et tresopulente, et ayant sur-
- 15 monté en autorité et puissance plusieurs roys et plusieurs tyrans, mesme de ceulx qui ont peu par testament laisser leurs estats à leurs enfans, il n'augmenta neantmoins jamais les biens que son pere luy avoit laissez, d'une seule drachme d'argent.
- 20 XVI. Et toutefois l'historien Thucydides décrit assez clairement la grandeur de sa puissance : et les poëtes comiques de ce temps la la donnent malignement soubz paroles couvertes à entendre, appellans ses familiers et amis les nouveaux Pisistratides, et disans qu'il luy falloit
- 25 faire protester et jurer qu'il n'usurperoit point la tyrannie, voulans donner à entendre que son autorité estoit par trop excessive pour une chose publique populaire. Et Teleclides, entre autres, dit que les Atheniens luy avoyent mis entre mains le revenu des villes de leur
- 30 obeissance, et les villes mesmes, pour en lier les unes et deslier les autres, et leurs murailles pour les abbatre ou



rebastir à son plaisir, le pouvoir de traiter paix et alliance, leur force, leur puissance, leurs finances, et tout leur bien entierement. Mais cela ne fut point pour une boutee seulement, ny pour une vogue de faveur qui passast en peu de
5 temps, ains dura quaranteans, estant tousjours le premier de sa cité entre des Ephialtes, Leocrates, Mironides, Cimons, Tolmides et Thucydides : car apres avoir ruiné et fait bannir Thucydides, il demoura encore par dessus tous les autres l'espace de quinze ans : et ayant acquis une principauté et
10 autorité de commander, qui dura tousjours continuellement pendant ce temps la, ou celle des autres capitaines ne duroit qu'un an, il se mainteint tousjours invincible et imprenable par argent, combien qu'au demourant il ne fust point du tout mauvais mesnager ny paresseux de con-
15 server le sien. Car quant aux biens qui estoyent justement siens, et que ses predecesseurs luy avoyent laissez, à fin que par negligence ilz ne deperissent point, et aussi qu'ilz ne luy donnassent trop d'affaires, et ne le reteinssent trop s'il se vouloit amuser à les faire valoir, il les mesnageoit d'une
20 maniere qui luy sembloit la plus aisee et la plus certaine : c'estoit qu'il vendoit à un coup tous les fruicts qu'il recueilloit de son revenu annuel, et puis envoyoit à la journee acheter au marché ce qui faisoit besoing pour l'entretienement et despense ordinaire de sa maison. Cela ne fut
25 point agreable à ses enfans quand ilz devindrent un peu grands, ny ne pleut point à ses femmes, lesquelles vouloyent qu'il despendist plus largement, et se plaignoyent d'une si estroite et si reserree despense ordinaire, attendu qu'en une si grosse et si riche maison il n'y avoit
30 jamais rien de demourant, ains y alloit toute recepte et toute mise par compte et par mesure juste. Car tout ce mesnagement estoit conduit et entretenu par un sien serviteur nommé Evangelus, fort habille homme et tresbien

entendu au faict du gouvernement d'une grande maison, soit qu'il eust esté ainsi fait et instruit par Pericles, ou qu'il eust ceste provoyance de nature. Ces choses estoient bien differentes de la sapience d'Anaxagoras, attendu
5 qu'il abandonna sa maison, et laissa ses terres venir en friches et en pasturages par un contemnement des choses terrienes, et un ravissement de l'amour des celestes. Mais aussi y a il, à mon advis, grande difference entre la vie d'un philosophe contemplatif, et d'un personnage actif
10 s'entremettant du gouvernement d'une chose publique : car l'un employe son entendement à la speculation des choses belles et honnestes, sans pour ce faire avoir besoin d'aucun instrument, ny de matiere quelconque exterieure : et l'autre accommodant sa vertu à la commune
15 utilité des hommes, a besoing de richesse, comme d'un instrument non seulement necessaire, mais aussi honneste, ainsi qu'elle fut à Pericles, qui en secourut plusieurs pauvres gens, et mesmement Anaxagoras entre autres : duquel on compte qu'estant Pericles si empesché ailleurs
20 qu'il n'avoit pas loisir de penser de luy, il se trouva delaisné de tout le monde en sa vieillesse, et se coucha la teste affublee, en resolution de se laisser mourir de faim. Dequoy Pericles estant adverty, s'encourut aussi tost tout esperdu devers luy, et le pria le plus affectueusement qu'il
25 luy fut possible, qu'il retornast en vouldté de vivre, en lamentant non luy, mais soy mesme, de ce qu'il perdoit un si feal et si sage conseiller es occurrences des affaires publiques. Adonc Anaxagoras se descouvrit le visage et luy dit : « Ceulx qui ont affaire de la lumiere d'une
30 « lampe, Pericles, y mettent de l'huile pour l'entretenir. »

XVII. Or commenceoyent ja en ce temps la les Lacedæmoniens à avoir jalouzie de l'accroissement des Atheniens : parquoy Pericles voulant elever encore davan-

tage le cueur au peuple d'Athenes, et le faire penser à
 toutes choses haultes et grandes, meit en avant un decret,
 que lon depeschast ambassadeurs pour aller solliciter
 tous les Grecs, en quelque partie qu'ilz habitassent de
 5 l'Europe ou de l'Asie, et autant la petite que la grande
 ville, d'envoyer leurs deputez à Athenes en l'assemblee
 generale qui s'y tiendrait, pour deliberer touchant les
 temples des Dieux que les Barbares avoyent bruslez, et
 touchant les sacrifices que lon avoit vouez pour le salut
 10 de la Grece, lors que lon donna la bataille aux Barbares :
 et aussi, touchant la marine, à fin que chascun peust
 naviger seurement là ou bon luy sembleroit, que tous
 vescuissent amiablement en bonne paix les uns avec les
 autres. Si furent envoyez à ceste commission vingt per-
 15 sonnages, chascun desquelz avoit cinquante ans passez,
 dont les cinq allerent devers les Doriens qui habitent en
 Asie, et devers les habitans des isles, jusques à celles de
 Lesbos et de Rhodes : cinq autres suyvirent tout le país de
 l'Hellespont et de la Thrace, jusques à la cité de Byzance :
 20 les autres cinq eurent charge d'aller en la Bœoe, en la
 Phocide, et par tout le Peloponese, et de là passer par le
 país des Locriens en toute la terre ferme adjacente, jusques
 en la contree de l'Acarnanie et de l'Ambracie : et les
 autres allerent premier en l'isle d'Eubœe, et de là aux
 25 Oetæïens et par tout le gouffre de Malea, aux Phtiotes,
 aux Achaïens et aux Thessaliens, faisant des remonstrances
 par tout aux peuples pour leur suader d'envoyer à
 Athenes, et assister au conseil qui s'y tiendrait pour la
 pacification et union de toute la Grece : mais il ne s'en
 30 fait du tout rien à la fin, et ne s'assemblerent point
 lesdites villes Grecques, par les menees des Lacedæ-

moniens, qui l'empescherent, comme lon dit : car ce fut au Peloponese que ceste semonce fut premierement rejettee. J'ay bien voulu escrire cela, pour donner à cognoistre la magnanimité de Pericles, et comment il
5 avoit le cueur et l'entendement elevé.

XVIII. Au demourant, es charges de capitaine, il estoit fort estimé de ce qu'il menoit ses gens à la guerre seurement : car jamais de sa volonté il ne hazarda la bataille, là ou il sentist qu'il y eust grande doubte ny appa-
10 rent danger : et n'estimoit pas bons capitaines, ny ne vouloit ensuyvre ceulx qui avoyent gaigné de grandes victoires par s'estre aventurez, encore qu'on les louast et estimast beaucoup : ains souloit dire : « Que si autre
« que luy ne les menoit à la boucherie, entant qu'en luy
15 « estoit, ilz demoureroient immortelz. » Et voyant que Tolmides, filz de Tolmæus, sur la confiance de ses prosperitez passees, pour lesquelles il estoit grandement prisé et honoré à cause de ses beaux faicts d'armes, se preparoit pour entrer sans propos ny occasion quelconque de-
20 dans le païs de la Bœoece, et avoit ja induit mille des plus hardiz et plus vaillans jeunes hommes de la ville à s'offrir volontairement pour aller quand et luy en ce voyage, oultre et par dessus le demourant de l'armee qu'il avoit levee, il tascha à l'en divertir, et le retenir à la
25 maison par remonstrances qu'il luy fait publiquement devant le peuple : là ou il dit une parole qui a bien depuis esté notee : « Que s'il ne vouloit croire au conseil de
« Pericles, à tout le moins qu'il attendist le temps, qui
« estoit le plus sage conseiller que lon sçauroit avoir. »
30 Ce propos sur l'heure fut moyennement loué, mais peu de jours apres quand on apporta nouvelle que Tolmides

17 A : passees, à cause qu'il estoit

T. fr. mod. — Amyot, I.

luy mesme avoit esté tué en une bataille qu'il avoit perdue pres la ville de Coronée, là ou plusieurs autres gens de bien et vaillans hommes Atheniens estoient demourez morts aussi, cela augmenta grandement la
5 reputation et la bienveillance de la commune envers Pericles, pource qu'il en fut estimé homme sage et qui aimoit ses citoyens.

XIX. Mais de tous ses voyages qu'il fait estant chef de l'armée d'Athenes, celui de la Cherronese fut le plus
10 aimé et le plus estimé, à cause qu'il fut tressalutaire à tous les Grecs habitans au païs : car oultre ce qu'il y mena mille bourgeois d'Athenes pour y habiter, en quoy faisant il fortifia les villes d'autant de bons hommes, il rempara encore l'encouleure qui empesche que ce ne soit
15 une isle, avec une fortification qu'il tira d'une mer à autre : de maniere qu'il garentit le païs des courses, surprises et pilleries des Thraces habitans à l'environ, et en jetta hors une trespérnecieuse guerre, dont la province estoit continuellement travaillée, pour le voisinage des
20 Barbares leurs voisins ou habitans parmy eulx, qui ne vivoyent que de brigandage. Aussi fut il grandement estimé et renommé entre les estrangers, quand il environna tout le Peloponese, partant du port de Peges en la coste Megarique avec une flotte de cent galeres : car il
25 ne pillà pas seulement les villes maritimes, comme avoit fait devant luy Tolmides, mais entrant bien avant en la terre arriere de la mer, avec les hommes de guerre qu'il avoit sur ses galeres, fait retirer les uns au dedans de leurs murailles, tant il leur donna d'effroy, et en la
30 contree de Némée desfeut en bataille les Sicyoniens qui l'attendirent en campagne, et en dressa un trophée pour

marque de sa victoire. Et embarquant sur ses vaisseaux quelque renfort de gens de guerre qu'il prit en Achaïe pour lors alliee des Atheniens, passa en la terre ferme qui est vis à vis, et cinglant oultre la bouche de la riviere d'Achelous, alla courir toute la province d'Acarnanie, là ou il renferma les Oeneades au dedans de leurs murailles : et apres y avoir gasté et destruit tout le plat païs, s'en retourna à la maison, s'estant fait cognoistre en ce voyage capitaine redoutable, aux ennemis, et executant seurement, à ses citoyens : car il n'advint pas un seul sinistre accident, par cas fortuit ou autrement, en toute celle expedition, à ceulx qui y furent soubz sa charge.

XX. Depuis estant allé avec une grosse flotte de vaisseaux fort bien en point au royaume de Pont, il y traitta humainement les citez Grecques, et fait tout ce qu'elles luy requirent, donnant à cognoistre aux Barbares habitans à l'environ, et aux princes et roys d'iceulx, la grandeur de la puissance des Atheniens, qui navigeoyent sans rien craindre par tout jusques ou bon leur sembloit, tenans toute la mer en leur obeissance. Davantage il laissa aux Sinopiens treze galeres avec quelque nombre de gens de guerre soubz la charge du capitaine Lamachus, pour les defendre à l'encontre du tyran Timesileon, lequel ayant esté dechassé avec ceulx de sa ligue, Pericles fit publier et passer un edict à Athenes, que six cents bourgeois de la ville qui voudroyent, sans contrainte, peussent aller demourer à Sinope : là ou leur seroyent departiz les biens et heritages qui avoyent esté au tyran et à ses adherens. Mais au reste il n'obtempera pas aux folz appetits de ses citoyens, ny ne se laissa pas

9 A et D : redoutable aux ennemis, — A : et executant seurement à ses citoyens — D : et executant seurement, à ses citoyens— 10 D : il n'avint pas

aller à leur convoitise trop elevee pour se veoir des forces si grandes, et la fortune si favorable, jusques à vouloir de rechef attenter de conquerir l'Égypte, et remuer les provinces maritimes de l'empire du roy de Perse : car il y en
5 avoit desja plusieurs qui estoyent espris du maleureux et calamiteux desir de la Sicile, que depuis Alcibiades alluma davantage. Et encore y en avoit il, qui songeoyent desja à conquerir la Thoscane et l'empire de Cartage : ce qui n'estoit pas du tout sans apparence, ny sans occasion
10 d'esperance, veu la grande estendue de la seigneurie qu'ilz tenoyent, et l'heureux cours de leurs affaires qui leur succedoyent à soubhait.

XXI. Mais Pericles empescha ceste saillie, et retrenchâ toute ceste curieuse convoitise, employant la plus
15 part de leur puissance à conserver et asseurer ce qu'ilz avoyent acquis, estimant que c'estoit beaucoup fait que d'engarder que les Lacedæmoniens ne s'accressent : car il leur estoit tousjours contraire, comme il declara en plusieurs autres endroits, et mesmement par ce qu'il feit
20 en la guerre sainte. Car les Lacedæmoniens ayans osté aux Phociens la superintendence du temple d'Apollo en la ville de Delphes, qu'ilz avoyent usurpee, et l'ayans remise entre les mains des Delphiens, si tost qu'ilz eurent le dos tourné, Pericles y alla aussi avec une armee, qui
25 y remeit les Phociens. Et comme les Lacedæmoniens eussent fait engraver sur le front d'un loup de cuyvre la prerogative que les Delphiens leur avoyent ottroyee, de pouvoir les premiers proposer leurs demandes à l'oracle, luy ayant obtenu le mesme droit des Phociens, le feit engraver
30 sur le flanc droit de la mesme statue du loup de bronze.

XXII. Et qu'il soit vray qu'il ait sagement contenu les forces des Atheniens au dedans de la Grece, les effects le tesmoignent : car premierement ceulx de l'Eubœe se

rebellerent, contre lesquelz il mena incontinent l'armee
d'Athenes : et tout soudain luy vindrent nouvelles d'un
autre costé comme les Megariens avoyent aussi pris les
armes contre eulx, et que les ennemis estoient ja en
5 grosse puissance dedans le païs d'Attique, sous la con-
duitte de Plistonax, roy de Lacedæmone. A l'occasion
dequoy il s'en retourna incontinent en diligence, pour
prouveoir à ceste guerre qui estoit au dedans de l'Attique
mesme : si n'oza pas se presenter en bataille contre si
10 grand nombre de bons combatans, mais sachant que le
roy Plistonax, qui estoit encore fort jeune, se gouvernoit
par le conseil de Cleandrides principalement, pource que
les Ephores le luy avoyent baillé pour luy assister, et pour
le conseiller et le guider, il essaya de le corrompre secre-
15 tement : et l'ayant bien tost gagné par argent, luy per-
suada qu'il remenast les Peloponesiens hors du païs
d'Attique : ce qu'il feit. Mais quand les Lacedæmoniens
veirent l'armee rompue, et que les peuples s'estoyent reti-
rez chascun en sa ville, ilz en furent si courroucez, qu'ilz
20 condamnerent le roy en une grosse amende : laquelle luy
ne pouvant payer, fut contraint de s'absenter de Lacedæ-
mone : et Cleandrides s'en estant fuy de bonne heure,
fut par contumace condamné à mourir. Cestuy Clean-
drides estoit pere de Gylippus qui desfeit depuis les Athe-
25 niens en la Sicile, auquel il semble que nature imprima
l'avarice comme une maladie hereditaire passant de pere
en filz : car en ayant aussi esté ignominieusement atteint
et convaincu pour aucuns villains actes qu'il commeit, il
en fut banny de Sparte, comme nous avons plus au long
30 déclaré en la vie de Lysander.

13 A : les Ephores luy avoient baillé — 20 A : condamnerent leur
Roy — 22 D : fuy — 23 A : condamné

XXIII. Mais comme Pericles, en la reddition des comptes de ceste charge la, eust couché un article de despense de dix talents, qu'il disoit avoir employez ou il falloit, le peuple l'alloua, sans vouloir enquerir comment, ny en quoy, ny adverer s'il estoit vray : et y en a quelques uns, entre lesquelz est le philosophe Theophrastus, qui escrivent que Pericles envoyoit par chascun an ^a dix talents à Sparte, avec lesquelz il entretenoit ceulx qui y avoyent autorité, à fin qu'on ne leur feist point la
 10 guerre, non qu'il acheptast la paix, mais bien le temps : durant lequel, se preparant tout à loisir, il peust avoir meilleure commodité de soustenir la guerre. Si tost donc que l'armee des Peloponesiens fut hors de l'Attique, il s'en retourna contre les rebelles, et passa en l'isle d'Eu-
 15 boëe avec cinquante voiles, et cinq mille combatans à pied tous bien armez, et là subjuga toutes les villes qui s'estoyent soulevees, chassa les Hippobates, qui estoyent les plus renommez d'entre les Chalcidiens, tant pour leurs richesses que pour leur vaillance et prouesse : et chassa
 20 aussi semblablement les Estieïens, qu'il feit vuidier hors de tout le país, et en leur ville logea des bourgeois d'Athenes seulement. Et la cause pour laquelle il les traitoit ainsi rigoureusement, sans leur vouloir pardonner, estoit pource que eulx ayans pris une galere d'Athenes
 25 prisonniere, ilz avoyent fait mourir toutes les personnes qui estoyent dessus.

XXIV. Depuis ayant esté faite une trefve pour trente ans entre les Atheniens et les Lacedæmoniens, il feit decerner la guerre contre ceulx de l'isle de Samos, les
 30 chargeant de ce que, leur ayant esté enjoint de par les

a. Six mille escus.

5 D : averer

Atheniens, qu'ilz eussent à pacifier les querelles qu'ilz avoyent contre les Milesiens, ilz n'avoient pas voulu obeir. Mais pource que lon a opinion qu'il entreprit ceste expedition contre Samos en faveur de Aspasia, il ne sera
5 point hors de propos de rechercher et declarer en cest endroit, qui estoit ceste femme, et quel artifice ou puissance si grande il y avoit en elle, qu'elle peust ainsi prendre en ses retz les principaux hommes qui s'entremettoient pour lors du gouvernement de la chose publique, et que les philosophes mesmes parlissent tant et
10 si amplement d'elle. Tout premierement donques, c'est chose bien certaine qu'elle estoit natife de la ville de Milet, fille d'un Axiochus, laquelle suyvant l'exemple d'une ancienne courtisane d'Ionie nommee Thargelia, s'accointa
15 des principaux et plus grands personnages de son temps : car ceste Thargelia estant belle de visage, et ayant bonne grace, avec un esprit vif et doux langage, eut l'accointance de plusieurs grands personnages de la Grece, et gaigna au service du roy de Perse tous ceulx qui s'approcherent d'elle, si bien qu'elle sema par les villes de la
20 Grece de grands commencemens de la faction Medoise, pource que c'estoyent tous les plus grands et les plus puissans hommes qui fussent en chasque ville de qui elle s'accointoit. Mais quant à Aspasia, les uns disent que
25 Pericles la hanta comme femme sçavante et bien entendue en matiere de gouvernement d'estat : car Socrates mesme l'alloit aussi veoir quelquefois avec ses amis, et ceulx qui la hantoyent y menoyent aucunefois leurs propres femmes pour l'ouir deviser, combien qu'elle menast un
30 train qui n'estoit gueres beau ny honneste, pource qu'elle tenoit en sa maison de jeunes garces qui faisoient gaing de leurs corps. Et Æschines escrit que Lysicles, un revendeur de bestail, qui paravant estoit homme de basse et

vile nature, se fait le premier homme d'Athenes par la
 frequentation qu'il eut avec ceste Aspasia, depuis la mort
 de Pericles : et au livre de Platon intitulé Menexenus,
 encore que le commencement soit escrit par maniere de
 5 jeu et de risee, il y a cela comme de veritable histoire,
 que ceste femme avoit le bruit d'estre hantee par plusieurs
 Atheniens pour apprendre d'elle l'art de rhetorique. Tou-
 tefois il semble plus vray-semblable, que l'affection que
 luy portoit Pericles vint plus d'amour que d'autre cause :
 10 car il avoit bien espousé une femme qui estoit sa parente,
 et qui paravant avoit esté mariee à Hipponicus, duquel
 elle avoit eu Callias surnommé le riche, et eut depuis
 Xantippus et Paralus de Pericles : mais ne luy estant
 point sa compagnie agreable, il la bailla, du bon gré et
 15 consentement d'elle mesme, à un autre, et prit Aspasia,
 laquelle il aima singulierement : car toutes les fois qu'il
 sortoit de sa maison pour aller en la place, ou qu'il en
 retournoit, il la saluoit en la baisant. Au moyen dequoy
 es anciennes comedies elle est appelee en plusieurs lieux
 20 la nouvelle Omphale, et quelquefois Deianira, et aucune-
 fois Juno : mais Cratinus l'appelle tout ouvertement
 putain en ces vers :

Elle luy a sa Juno enfantee
 Aspasia la putain effrontee.

25 Et semble qu'il en eut un bastard : car Eupolis l'intro-
 duit en une siene comedie nommee Demosij, interrogant
 ainsi Pyronides :

Mon filz bastard est il encore en vie ?

Et puis Pyronides luy respond :

30 Il fust pieça homme fait pour certain,
 N'estoit qu'il craint ceste male putain.

8 A: vraysemblable — 26 D: Demisij

Brief ceste Aspasia fut tant celebree et tant renommee, que Cyrus, celuy qui combatit contre le roy Artaxerxes son frere pour l'empire de Perse, appella Aspasia celle de ses concubines qu'il aimoit plus, laquelle paravant s'appelloit Milto, estant natifve de la Phocide, fille de Hermotimus : et ayant Cyrus esté tué en la bataille, elle fut prise et menee au roy son frere, envers lequel elle eut depuis beaucoup de credit. Cela m'est venu en memoire en escrivant ceste vie, et m'a semblé que ceust esté trop durement fait de le rejetter ou obmettre.

XXV. Mais pour retourner à nostre propos, on charge Pericles d'avoir fait decerner la guerre contre ceulx de Samos en faveur de ceulx de Milet, à la requeste d'Aspasia, à cause que ces deux citez avoyent guerre ensemble pour la ville de Priene, et estoient les Samiens les plus forts : mais les Atheniens leur commanderent qu'ilz eussent à laisser la voye des armes, et à venir plaider leur different devant eulx, pour leur en estre fait droit : ce qu'ilz ne voulurent faire ; parquoy Pericles y alla, et y abolit le gouvernement du petit nombre de la noblesse, prenant pour ostages cinquante des principaulx personnages de la ville, et autant d'enfans, lesquelz il meit en depost en l'isle de Lemnos. Toutefois il y en a qui disent que chascun desditz ostages luy voulut donner un talent : outre lesquelz luy en furent encore presentez plusieurs autres par ceulx qui ne vouloyent point que l'autorité souveraine du gouvernement fust mise entre les mains de la commune. Davantage Pissuthnes, Persien, lieutenant du roy de Perse, pour quelque amitié qu'il portoit à ceulx de Samos, luy envoya dix mille escus, à fin qu'il leur pardonnast : mais de tout cela Pericles n'en prit jamais rien, ains ayant fait en Samos tout ce qu'il avoit proposé d'y faire, et y ayant estably un gouverne-

ment populaire, s'en retourna à Athenes. Mais les Samiens se rebellerent incontinent apres, ayans recouvré leurs ostages par le moyen de ce Pissuthnes qui les desrobba et leur fournit ce qui estoit necessaire pour soustenir la
5 guerre. Parquoy Pericles retourna une autre fois contre eulx, lesquelz il ne trouva point oyseux ny estonnez en façon quelconque, ains tresbien deliberez de le recevoir et combattre pour la principaulté de la mer : si y eut une grosse bataille entre eulx aupres de l'isle qui s'appelle
10 Tragia : et la gaigna Pericles, ayant desfait fort glorieusement, avec quarante et quatre voiles seulement, ses ennemis qui en avoyent soixante et dix, dont les vingt estoyent vaisseaux de guerre : [XXVI.] et quand et quand poursuivant sa victoire, il gaigna aussi le port de Samos, et
15 teint les Samiens assiegez dedans leur ville, ou ilz avoyent encore bien la hardiesse de sortir aucunesfois et combattre au devant de leurs murailles : mais depuis estant arrivé à Pericles un renfort de plus grand nombre de vaisseaux, ilz furent adonc enserrez de tout point. Et lors Pericles
20 prenant soixante galeres se jetta en pleine mer, voulant, comme aucuns disent, aller rencontrer, le plus loing de la ville qu'il pourroit, quelques vaisseaux Phœniciens, qui venoyent au secours de ceulx de Samos : ou, comme dit
25 Stesimbrotus, pour s'en aller en Cypre : ce qui ne me semble pas vray-semblable. Mais à quelque intention qu'il le feist, il commeit une treslourde faulte : car Melissus, filz de Ithagene, grand philosophe, estant pour lors capitaine des Samiens, voyant qu'il estoit demouré peu de
30 vaisseaux au siege devant la ville, et encore que les capitaines qui en avoyent la charge, n'estoyent pas gens guerres experimentez, persuada à ses citoyens de faire une saillie sur eulx : et y eut bataille donnee, que les Samiens gaignerent, ou ilz prirent plusieurs Atheniens prisonniers,

et meirent plusieurs de leurs vaisseaux à fond : au moyen
dequoy estans demourez seigneurs de la marine, ilz
meirent dedans leur ville plusieurs choses necessaires
pour la guerre, dont ilz avoyent faulte auparavant :
5 toutefois Aristote escrit que Pericles mesme en per-
sonne avoit desja auparavant esté vaincu en une bataille
navale par Melissus. Au demourant, les Samiens pour
rendre aux prisonniers d'Athenes pareille injure qu'ilz
avoyent receuë d'eulx, leur engraverent sur le front des
10 chevesches, pource que la chevesche est la marque de la
monnoye d'Athenes, ne plus ne moins que les Atheniens
avoyent imprimé sur les fronts de leurs prisonniers une
Samæne, c'est à dire une sorte de navire Samiene, basse
de prouë, mais creuse et large de ventre, de sorte qu'elle
15 est bonne à cingler en haulte mer, et legere à la voile :
et a esté ainsi appelée pource que la premiere de ceste
façon fut bastie en l'isle de Samos par le tyran Polycrates
qui la y fait faire. Lon dit que pour l'impression de ces
caracteres, le poëte Aristophanes, par une maniere de
20 moquerie couverte, dit en un passage de ses comedies :

Les Samiens sont hommes fort lettrez.

XXVII. Pericles donques adverty de la route de son
armee, s'en retourna incontinent au secours. Melissus luy
alla au devant, et luy donna la bataille, qu'il perdit, et
25 fut rembarré jusques dedans la ville, ou Pericles l'en-
ferma d'une closture de muraille tout à l'entour, aimant
mieulx emporter la victoire et prendre la ville par lon-
gueur de temps et avec despense, que par exposer ses
citoyens au danger d'estre tuez ou blecez : mais toutefois
30 quand il veit qu'ilz se faschoyent de la longueur, et qu'ilz

10 D: cheveche

vouloyent à toute force venir aux mains, de maniere qu'il estoit bien malaisé de les retenir, il divisa toute son armee en huit troupes, lesquelles il feit tirer au sort, et celle à qui escheoit une febve blanche demouroit en
5 repos à faire bonne chere, pendant que les autres sept combatoyent : et dit on que de là vient que lon appelle encore aujourd'hui un jour blanc auquel on a fait bonne chere et receu du plaisir, à cause de la febve blanche. Si escrit l'historien Ephorus que ce fut là premierement
10 que lon commença à user d'engins de baterie pour abbatre grosses murailles, et que Pericles en trouva la nouveauté fort esmerveillable : car ce fut Artemon, un ingenieur, qui les inventa, lequel se faisoit porter par tout dedans une chaire, pour conduire et haster les ouvrages, à cause
15 qu'il estoit impotent d'une jambe, et que pour ceste cause il fut appellé Periphoretos. Mais Heraclides le Pontique reprent en cela Ephorus par les vers d'Anacreon, esquelz Artemon est nommé Periphoretos, plusieurs aages avant ceste guerre de Samos : et dit que ce Periphoretos estoit
20 un homme fort delicat, et qui craignoit toutes choses si follement, que la plus part du temps il ne bougeoit de sa maison, ou il se tenoit tousjours assis, ayant deux de ses serviteurs à ses costez, qui luy tenoyent sur la teste un pavois de cuyvre, de peur qu'il ne tumbast rien sur luy :
25 et si d'aventure il estoit quelquefois contraint de sortir hors de son logis, il se faisoit porter dedans un petit lict suspendu bien pres de terre, et que pour ceste cause il fut surnommé Periphoretos.

XXVIII. A la fin, au bout de neuf mois, les Samiens
30 furent contraints de se rendre, et Pericles feit abbatre et raser leurs murailles, leur osta tous leurs vaisseaux, et les condamna en une grosse somme de deniers, dont ilz payerent promptement une partie, et le reste à certain

terme qui leur fut prefix, pour la seureté duquel payement ilz donnnerent ostages. Mais Duris le Samien amplifie les choses en cest endroit fort pitoyablement, pour charger les Atheniens, et Pericles mesme, d'inhumaine
5 cruauté, dequoy Thucydides, ny Ephorus, ny Aristote mesme, ne font aucune mention : et si ne me semble pas que ce qu'il en escrit soit veritable, c'est à sçavoir qu'il fait mener les capitaines des galeres, et les soudards mesmes Samiens, sur la place de la ville de Milet, ou il
10 les fait attacher sur des ais de bois par l'espace de dix jours, au bout desquelz les pauvres gens n'en pouvans plus, furent assommez à coups de bastons dont on leur froissa les testes, et puis fait on jeter les corps, sans permettre qu'ilz fussent ensepulturez. Ainsi Duris estant
15 assez coustumier, encore ailleurs ou il n'y a rien qui luy touche particulièrement, d'extravaguer hors de la verité, semble en ce lieu augmenter de paroles, oultre le devoir, les calamitez de son païs, pour en calumnier les Atheniens, et les en rendre odieux. Ayant donques
20 Pericles subjugué la ville de Samos, il s'en retourna à Athenes, là ou il fait honorablement inhumer les os de ceulx qui estoient morts en ceste guerre, et luy mesme fait le blason funebre à leur louange selon la coustume, dont il fut merueilleusement estimé : de sorte que quand
25 il descendit de la chaire ou il avoit harengué, les autres dames de la ville luy venoyent baiser les mains, et luy mettoient des chapeaux de fleurs et des couronnes sur la teste, comme lon fait aux champions victorieux, quand ilz retournent des jeux ou ilz ont emporté le pris ; mais
30 Elpinice s'approchant de luy : « Vrayement, dit elle, ce
« sont de beaux faicts que les tiens, Pericles, et bien
« dignes de chapeaux de triumphe, de nous avoir perdu
« beaucoup de bons et vaillans citoyens, non point en

« guerroyant les Medois, Phœniciens et Barbares, comme
 « fait mon frere Cimon, ains en destruisant une cité qui
 « est de nostre propre nation et nostre alliee. » A ces pa-
 roles respondit Pericles tout doucement, en riant, ce ver
 5 d'Archilochus :

Si vieille estant ne te parfume plus.

Mais lon escrit qu'il se glorifia grandement, et conceut
 une merveilleuse opinion de soymesme depuis qu'il eut
 subjugué les Samiens, disant qu'Agamemnon avoit
 10 demouré dix ans à prendre une cité barbare, et luy en
 neuf mois avoit conquis la plus puissante ville de toute
 la nation Ionique. Si n'estoit pas sans occasion qu'il
 s'attribuoit tant de gloire : car certainement il y eut
 grande doubte et non moins de peril en telle conquete,
 15 s'il est vray ce qu'en escrit Thucydides, qu'il s'en fallut
 bien peu que les Samiens n'ostassent la seigneurie et
 domination de la mer à ceulx d'Athenes.

XXIX. Depuis estant ja la guerre Peloponesiaque en
 branle, comme ceulx de Corfou fussent guerroyez par les
 20 Corinthiens, il persuada au peuple Athenien d'envoyer
 secours aux Corfiots, et de joindre à sa ligue ceste isle
 qui estoit puissante par mer, disant que bien tost ilz
 auroient les Peloponesiens ennemis declarez. Si conclut
 le peuple à sa suscitation de secourir ceulx de Corfou, et
 25 y fut envoyé Lacedæmonien, filz de Cimon, avec dix
 galeres seulement, par une maniere de moquerie, pource
 que toute la maison de Cimon portoit affection et amitié
 grande aux Lacedæmoniens : et à ceste cause fait Pericles
 bailler ainsi petit nombre de vaisseaux à Lacedæmonien,
 30 et l'y envoya malgré luy, à fin que s'il ne faisoit en ceste

10 D : demeuré

charge aucun exploit digne de memoire, il en fust de tant plus soupçonné de favoriser aux Lacedæmoniens : et tant qu'il vescu empescha tousjours, le plus qu'il peut, de parvenir les enfans de Cimon, comme n'estans point
5 par leurs noms mesmes naturelz Atheniens, ains estrangers, pource que l'un s'appelloit Lacedæmonien, l'autre Thessalien, et le tiers Elien, et estoient tous nez d'une mere native du païs d'Arcadie. Mais Pericles estant blasmé d'avoir envoyé ces dix galeres seulement, qui estoit
10 bien peu de secours pour ceulx qui leur en avoyent requis, et beaucoup de matiere à ceulx qui mesdisoyent de luy, il y en envoya depuis encore d'autres en plus grand nombre, lesquelles arriverent apres la bataille : dequoy les Corinthiens estans fort courroucez, s'en allerent plaindre
15 au conseil des Lacedæmoniens, ou ilz proposerent plusieurs charges et plaintes à l'encontre des Atheniens, et autant en feirent aussi les Megariens, allegans que ceulx d'Athenes leur avoyent defendu leurs ports, leurs estappes, et tout commerce et trafic es lieux de leur obeïssance,
20 qui estoit directement contre les loix communes, et contre les articles de paix accordez et jurez entre tous les Grecs. Davantage les Æginetes se sentans foulez et trop violement traittez, envoyerent secrettement faire leurs doléances et lamentations aux Lacedæmoniens, n'osans pas
25 ouvertement se plaindre de ceulx d'Athenes. Sur ces entrefaittes, la ville de Potidæe, pour lors sujette aux Atheniens, et ayant esté anciennement fondee par les Corinthiens, se rebella, et fut assiegee par les Atheniens, ce qui hasta bien la guerre. Ce neantmoins ambassadeurs
30 furent premierement envoyez à Athenes sur ces plaintes, et Archidamus, roy des Lacedæmoniens, feit tout ce

10 D : qui les en avoient requis

qu'il peut pour accorder la plus part de ces differents, en appaisant et addoulcissant leurs allies, de maniere que les Atheniens n'eussent point eu la guerre pour les autres charges qu'on leur mettoit sus, s'ilz se fussent voulu con-
5 descendre à revoquer le decret qu'ilz avoyent fait contre les Megariens : au moyen dequoy Pericles, qui resista plus que nul autre à ceste revocation, et qui aguisa et incita le peuple à perseverer opiniastrement en ce qu'il avoit une fois ordonné contre les Megariens, fut seul
10 estimé cause et autheur de la guerre Peloponesiaque.

XXX. Car on dit que les Lacedæmoniens envoyerent des ambassadeurs à Athenes sur ce poinct la : et comme Pericles alleguast une loy qui defendoit d'oster le tableau, sur lequel un edict public auroit une fois esté escrit, il y eut
15 l'un des ambassadeurs de Lacedæmone, nommé Polyarces, qui luy dit : « Et bien ne l'oste pas, mais tourne le seulement, car vous n'avez point de loy qui defende cela. » Ce mot fut trouvé plaisant, mais non pour cela Pericles n'en fleschit jamais : et pourtant semble il qu'il avoit
20 quelque occasion secrette de propre et particuliere malvueillance contre eulx, mais la voulant couvrir d'une cause publique et manifeste, il leur osta et retrencha les terres sacrees, qu'ilz mettoient en labourage : et pour ce faire, meit en avant un decret, Que lon leur envoyast un herault
25 pour les sommer de s'en deporter, et que le mesme herault allast aussi devers les Lacedæmoniens pour en accuser devant eulx les Megariens. Il est bien certain que ce decret fut mis en avant par Pericles, aussi n'y a il rien qui ne soit juste et raisonnable : mais il advint que
30 le herault qui y fut envoyé mourut, et pensa lon que les Megariens l'eussent fait mourir. Parquoy Charinus incontinent proposa un decret contre eulx, Qu'ilz fussent declarez ennemis mortelz des Atheniens à jamais, sans espoir

de reconciliation quelconque : et que si un Megarien
 mettoit le pied seulement dedans le territoire d'Attique,
 qu'il fust puny de mort : et que les capitaines annuelz
 quand ilz feroient leur serment ordinaire, jürassent entre
 5 les autres articles, que tous les ans ilz entreroient en
 armes par deux fois dedans le païs et au dommage des
 Megariens : et que le herault Anthemocritus fust enterré
 au lieu qui s'appelloit lors les Portes Thriasienes, et
 maintenant s'appelle Dipylon. Mais les Megariens nians
 10 fort et ferme qu'ilz eussent esté cause de la mort de ces-
 tuy Anthemocritus, en rejettoient la cause sur Aspasia et
 sur Pericles, allegans pour tesmoignage ces vers du poëte
 Aristophanes en sa comedie intitulee les Acharnes, qui
 sont si vulgaires que le commun peuple mesme les a en
 15 la bouche :

Noz jeunes gens enyvrez s'en allerent
 Devers Megare un jour, ou ilz emlerent
 Une putain qui Simætha s'appelle :
 Ceux de Megare irritez, au lieu d'elle
 20 S'en sont venus par furtive saisie
 Enlever deux des garses d'Aspasie.

XXXI. Ainsi est il bien malaisé de sçavoir dire à la
 verité la premiere origine et cause primitive de ceste
 guerre : mais bien sont tous les historiens d'accord que
 25 Pericles fut principalement autheur de ce que le decret
 fait à l'encontre des Megariens, ne fut point revoqué. Et
 tienent aucuns que ce fut par vraye magnanimité avec
 bon jugement, qu'il persista en ce qui luy sembla le plus
 expedient : pource qu'il estimoit que ce commandement
 30 des Lacedæmoniens n'estoit qu'un essay, pour sonder si
 les Atheniens leur voudroyent ceder : et que leur obtem-
 perer en cela seroit evidemment confesser qu'ilz se sen-

toyent les plus foibles : les autres au contraire disent que ce fut par une arrogance et opiniastreté, pour monst^rer son autorité et sa puissance, qu'il mesprisa les Lacedæmoniens. Mais la plus mauvaise occasion, et qui toute-
5 fois a plus de tesmoings qui la confirment, se racompte presque en ceste maniere : Phidias le faiseur d'images, comme nous avons ja dit auparavant, avoit entrepris de faire l'image de Pallas, et estant amy de Pericles avoit fort grand credit envers luy : cela luy suscita l'envie de
10 quelques malvueillans, lesquelz voulans sonder quel jugement le peuple feroit de Pericles, attiltrent Menon, l'un des ouvriers qui besongnoyent soubz Phidias, et le feirent venir sur la place requerir au peuple seureté publique, pour pouvoir deceler et accuser Phidias d'aucun crime
15 par luy commis. Le peuple receut son indice, et fut son accusation ouïe en pleine assemblee du peuple sur la place, là ou il ne fut fait aucune mention de larcin, pource que Phidias, par le conseil et advis de Pericles, avoit tellement apposé et appliqué l'or en la composition
20 de l'image des le commencement, que lon le pouvoit oster tout, et le peser : ce que Pericles allegua adonc publiquement aux accusateurs, leur disant qu'ilz le pesassent. Mais la gloire de ses ouvrages luy suscitoit celle envie, pour autant mesmement qu'ayant engravé sur l'escu de la
25 deesse la bataille des Amazones, il y avoit entaillé son portraict au naturel, soubz le personnage d'un vieillard chaulve qui leve une grosse pierre à deux mains : et y avoit aussi fait la portraiture de Pericles fort belle apres le naturel, qui combatoit contre une Amazone en tel geste,
30 que sa main haulsant une javeline au devant du visage de Pericles, par un singulier artifice semble vouloir cacher

17 D : ne fut faite aucune mention

et couvrir celle similitude, laquelle neantmoins se descouvre et se monstre d'un costé et d'autre. Si fut Phidias mis en prison, là ou il mourut de maladie, ou bien de poison que ses ennemis luy preparerent, comme aucuns disent, pour faire davantage souspeçonner et calumnier Pericles. Comment que ce soit, le peuple donna immunité et affranchissement de tous subsidies à l'accusateur Menon, suyvnt un decret qu'en meit en avant Glycon, et enjoignit aux capitaines qu'ilz le prissent en leur sauvegarde,
 10 et eussent soing de la seureté de sa personne.

XXXII. Environ ce mesme temps fut aussi Aspasia accusée de ne croire point aux Dieux, estant l'accusateur Hermippus faiseur de comedies, qui la chargea davantage qu'elle servoit de macquerelle à Pericles, recevant en sa
 15 maison des bourgeoises de la ville, dont Pericles jouissoit. Diopithes au mesme temps meit en avant un decret, Que lon feist inquisition des mescreans qui n'adjouxtoyent point de foy aux choses divines, et qui enseignoyent certains propos nouveaux touchant les effects qui se font en
 20 l'air et au ciel, tournant la suspicion sur Pericles à cause d'Anaxagoras. Le peuple receut et approuva ceste inquisition : et adonc fut aussi proposé par Dracontides, Que Pericles meist le compte de l'argent qu'il avoit despendu, entre les mains des pritanes, qui estoient comme supé-
 25 rintendans des finances, et que les juges qui auroient à en juger, donnassent leurs sentences dedans la ville dessus l'autel. Mais Agnon osta ce mot du decret, et y meit au lieu, que le proces fust jugé par quinze cents juges, et que l'action fust nommée de larcin, ou de concussion, ou
 30 d'injustice, comme lon voudroit. Or quant à Aspasia, il la sauva par la pitié et compassion qu'il feit aux juges, en

3 D : en prison, où il mourut — 16 A : Diopithes quand et quand meit en avant

priant de tresgrande affection pour elle, et plorant à chauldes larmes, pendant que la cause se plaidoit, ainsi comme l'escrit *Æschines* : mais quant à *Anaxagoras*, craignant qu'il n'en peust faire autant, il l'envoya hors la
5 ville, et luy mesme l'accompagna. Au demourant, voyant qu'il avoit encouru la malegrace du peuple pour le faict de *Phidias*, et à ceste cause redoubtant l'issue du jugement, il enflamma la guerre qui reculoit tousjours, et ne faisoit
10 encorę que fumer, esperant que par ce moyen il feroit esvanouir les charges que lon luy mettoit sus, et abbatroit l'envie que lon avoit contre luy, par ce que le peuple se trouvant en grands affaires et pleins de danger, se jetteroit du tout entre ses bras, et se commettrait à luy seul, tant il avoit acquis d'autorité et de reputation. Ce sont
15 les causes pour lesquelles il ne voulut pas souffrir, à ce que lon dit, que les Atheniens cedassent en rien aux *Lacedæmoniens*; toutefois on ne sçauroit qu'en asseurer à la verité : [XXXIII.] mais ceulx de *Lacedæmone* sçahans bien que s'ilz le pouvoient oster et ruiner, ilz jouiroient
20 mieulx à leur plaisir des Atheniens, leur manderent qu'ilz eussent à purger leur ville du crime Cylonien, pource qu'ilz sçavoyent bien que la race de *Pericles* du costé de sa mere en estoit entachee, ainsi comme l'escrit *Thucydides*. Mais ceste espreuve leur tourna tout au rebours de
25 l'esperance de ceulx qui y furent envoyez pour cest effect : car au lieu de faire souspeçonner et calumnier *Pericles*, ses citoyens l'en honorerent davantage, et s'en fierent encore plus que devant en luy, d'autant qu'ilz voyoyent que les ennemis le craignoient et le haïssoient ainsi. Parquoy avant
30 que le roy *Archidamus* entrast avec l'armée des *Pelopone-siens* dedans le país d'*Attique*, il predict aux Atheniens que si d'aventure *Archidamus*, en gastant et destruisant le plat país à l'environ, espargnoit ses terres et ses biens

pour l'amitié et l'hospitalité qu'ilz avoyent entre eulx, ou plus tost pour donner occasion à ses malvueillans de le calumnier, que des lors il donnoit à la chose publique les terres et les maisons qu'il avoit aux champs. Si descen-
5 dirent les Lacedæmoniens et leurs alliez et confederez avec grosse puissance au païs de l'Attique, sous la conduite du roy Archidamus, et en ruinant tout par ou ilz passoyent, entrerent jusques au bourg d'Acharnes, là ou ilz se camperent, estimans que les Atheniens ne les y souffriroyent jamais, ains leur sortiroyent à l'encontré pour
10 defendre leur païs et monstrier qu'ilz n'avoient point le cueur failly. Mais Pericles consideroit qu'il seroit trop dangereux de hazarder la bataille, ou il estoit question de la propre ville d'Athenes, contre soixante mille combattans à pied, tant du Peloponese que de la Bœoe : car
15 autant y en avoit il au premier voyage qu'ilz y feirent. Et quant à ceulx qui vouloyent combatre à quelque peril que ce fust, et qui perdoient patience de voir ainsi destruire leur païs devant leurs yeux, il les reconfortoit et appaisoit, en leur remonstrant, « Que les arbres taillez et cou-
« pez revenoyent en peu de temps, mais qu'il est impos-
« sible de recouvrer les hommes quand on les a une fois perdus. » Toutefois il ne faisoit jamais assembler le
20 peuple en conseil, craignant qu'il ne fust forcé par la multitude à faire aucune chose contre sa vouldté : ains comme le sage pilote, quand la tourmente le surprend en haulte mer, donne bon ordre à toutes choses en sa navire, et tient ses defenses toutes prestes, faisant ce que son art requiert, sans s'arrester aux larmes ny aux prieres des
25 passagers qui se tourmentent d'effroy et tirent du cueur : aussi luy ayant bien fermé la ville, et disposé de bonnes et seures gardes par tout, se gouvernoit par son jugement, sans se soucier de ceulx qui crioyent et se courrou-



ceoyent contre luy : encore qu'il y eust beaucoup de ses amis qui le prioient à grande instance, et plusieurs de ses ennemis qui le menaçoient et le chargeoyent, et que lon chantast par la ville des chansons pleines de moqueries
 5 au deshonneur et au blasme de son gouvernement, comme d'un capitaine lasche de cueur, et qui par couardise abandonnoit toutes choses en proye aux ennemis. Cleon entre les autres estoit desja l'un de ceulx qui plus le piquoyent, et commenceoit à entrer en credit et en grace de la commune,
 10 mune, par le courroux et malcontentement que lon avoit de Pericles, comme il appert par ces vers diffamatoires de Hermippus, qui furent alors publiez :

Roy des Satyres, pourquoy est-ce
 Que tu n'as pas la hardiesse
 15 De prendre en main picque ny lance,
 Veu qu'en homme plein de vaillance
 Tu nous parles si fierement
 De la guerre ordinairement,
 Et promet ton brave langage
 20 D'un preux chevalier le courage ?
 Puis tu enrages quand l'ardent
 Cleon te donne coups de dent,
 Ne plus ne moins que la cueux bise
 Le trenchant de l'espee aguise.

25 XXXIV. Ce nonobstant, Pericles pour tout cela ne s'esmeut en façon quelconque, ains endurant patiemment, sans mot dire, toutes ces injures, toutes ces moqueries et picqueures de ses malvueillans, il envoya une flotte de cent voiles au Peloponese, en laquelle il ne voulut
 30 point aller en personne, ains demoura à la maison, pour toujours retenir la ville en bride, jusques à ce que les

30 D : demeura

ennemis se fussent retirez : et pour entretenir le commun peuple, qui se courrouceoit et se faschoit de ceste guerre, il reconfortoit les pauvres en leur faisant distribuer quelques deniers publiques, et aussi par le departement
 5 des terres conquises : pource qu'ayant chassé tous les Æginetes entierement hors de leur païs, il fait departir toute l'isle d'Ægine entre les bourgeois d'Athenes au sort : et si leur estoit encore quelque consolation en leurs adversitez d'entendre le dommage que souffroyent aussi
 10 leurs ennemis : car ceulx de l'armee de mer qui furent envoyez au Peloponese gasterent beaucoup de plat païs, et saccagerent plusieurs bourgs et plusieurs petites villes : et luyesme, entrant par terre dedans le païs des Megariens, le courut et pillà tout, de maniere que les
 15 Peloponesiens recevans bien autant de dommage et de perte des Atheniens par mer, comme ilz leur en faisoient par terre, n'eussent pas si longuement duré ne soustenu la guerre, ains s'en fussent bien tost lassez, ainsi que Pericles leur avoit predit, s'il n'y eust eu quelque divine
 20 puissance, qui eust secrettement empesché le discours de la raison humaine. Car il advint premierement une pestilence si contagieuse et si violente qu'elle emporta toute la fleur de la jeunesse, et affoiblit grandement les forces d'Athenes : et puis les corps des survivans estans travail-
 25 lez de ceste maladie, les cueurs aussi consequemment s'en aigriront si asprement à l'encontre de Pericles, que leur ayant le mal troublé le sens, ilz se mutinerent contre luy, comme font les patiens contre leur medecin, ou les enfans contre leur pere, jusques à luy faire oultrage, à la
 30 suscitation de ses malvueillans, lesquelz alloient disans que la pestilence ne procedoit d'autre cause que de la

multitude des paisans qui s'estoyent jettez à la foule dedans la ville, au cueur d'esté, ou ilz estoyent contraints de se loger pesle mesle plusieurs ensemble dessoubs petites tentes et cabannes estouffees, y demourans accroupis
 5 tout le long du jour, sans pouvoir rien faire, au lieu qu'ilz avoyent accoustumé de vivre en air libre, pur et ouvert : dequoy, disoyent ilz, est cause celuy qui par la suscitation de ceste guerre a entassé tout le peuple des champs dedans les murailles d'une ville, sans les
 10 employer à chose quelconque, ains les tenant enfermez comme des bestes brutes dedans une estable, et les laissant infecter l'un l'autre de contagion pestilente, en ne leur donnant aucun moyen de changer un peu d'air, pour pouvoir à tout le moins nettement respirer.

- 15 XXXV. Parquoy Pericles, voulant remedier à cela, et aussi endommager un peu l'ennemy, fait armer cent cinquante vaisseaux, sur lesquelz il embarqua bon nombre de gens de pied armez et de gens de cheval aussi. Cela donna grande esperance à ses citoyens, et non moins
 20 d'espouventement aux ennemis voyans une si grosse puissance. Mais comme il fut prest à faire voile, estans ja tous ses gens embarquez et luy mesme monté dedans la galere capitainesse, il advint que le soleil eclipsa soudainement, et le jour faillit : ce qui effroya merveilleusement toute la compagnie, comme si c'eust esté un fort
 25 sinistre et dangereux presage. Parquoy Pericles voyant le pilote de sa galere tout perdu, et ne sachant qu'il devoit faire, estendit son manteau et luy en couvrit les yeux, puis luy demanda si cela luy sembloit mauvaise
 30 chose. Le pilote luy respondit que non : « Et adonc, luy
 « dit Pericles, il n'y a autre difference entre cecy et cela,

10 A : les tenans — 15 A : et quand et quand aussi endommager — 23 D : il avint

« sinon que le corps qui fait ces tenebres, est plus grand
 « que mon manteau qui te bouche les yeux. » Ces choses
 se disent ainsi es escoles des philosophes, mais toute-
 fois Pericles se mettant à la voile, ne fait aucun exploit
 5 digne d'un si grand equippage : et estant allé mettre le
 siege devant la ville sainte d'Epidaure, à l'heure que lon
 eseroit certainement qu'elle deust estre prise, il fut con-
 traint de lever son siege pour la peste, qui fut si violente
 qu'elle ne fait pas mourir les Atheniens seulement, mais
 10 aussi tous autres qui, pour peu que ce fust, s'appro-
 cherent d'eulx et de leur camp. A l'occasion dequoy,
 voyant les Atheniens fort indignez et irritez encontre luy,
 il essaya de les consoler et reconforter : mais il ne peut
 venir à bout de les appaiser, ains à la pluralité des
 15 voix luy osterent la charge de capitaine general, et le
 condamnerent en l'amende d'une grosse somme de
 deniers, laquelle ceulx qui disent le moins, escrivent
 avoir esté de quinze ^a talents, et ceulx qui disent le plus de
 cinquante ^b. L'accusateur subscript en ceste condamnation
 20 fut Cleon, comme dit Idomeneus, ou Simmias, comme
 escrit Theophrastus : toutefois Heraclides le Pontique
 met un nommé Lacratidas.

XXXVI. Or quant à ses maux publiques, ilz luy pas-
 serent bien tost, pource que le peuple laissa le courroux
 25 qu'il avoit contre luy, ne plus ne moins que la mouche
 guespe laisse l'aguillon en donnant le coup : mais en son
 privé, ses affaires domestiques se portoyent mal, tant
 pource que la peste luy avoit emporté plusieurs de ses
 parents et amis, comme aussi pource que de longue
 30 main il estoit en dissension avec ceulx de sa maison : car
 Xantippus l'aisné de ses enfans legitimes, estant homme

^a. Neuf mille escus.

^b. Trente mille escus.

de mauvaise nature, et davantage ayant espousé une femme jeune et despensiere, fille d'Isander filz de Epilycus, estoit mal content de l'estroite espargne de son pere, qui ne luy fournissoit argent que bien escharement et
5 bien peu à la fois : au moyen dequoy il envoya un jour au nom de Pericles, chez l'un de ses amis, luy demander de l'argent à emprunter : qui luy en envoya ; mais comme depuis il vint à le redemander, tant s'en fallut que Pericles le voulust payer, que qui plus est, il l'en appella en
10 justice. Dont le jeune homme Xantippus estant grièvement indigné contre son pere, alloit mesdisant de luy en public par la ville, comptant par une maniere de moquerie les occupations ausquelles il vaquoit et passoit son temps quand il estoit en son privé, et les propos qu'il
15 tenoit avec des sophistes et maistres de rhetorique : car comme il fust advenu qu'en un jeu de pris l'un des champions qui combatoyent à qui lanceroit mieulx le dard, eust par meschef atteint et tué un Epitimius Thesalieu, il alloit par tout racomptant que Pericles avoit
20 tout un jour esté à disputer avec Protagoras le rhetoricien, à sçavoir qui devoit estre jugé coupable de ce meurtre, selon la vraye et droitturiere raison, le dard, ou celuy qui l'avoit lancé, ou bien ceulx qui avoyent dressé le jeu de pris. Davantage Stesimbrotus escrit que
25 le bruit qui courut par la ville, que Pericles entretenoit sa femme, fut semé par Xantippus mesme. Tant y a que ceste querelle et dissension entre le pere et le filz dura, sans jamais se reconcilier, jusques à la mort : car Xantippus mourut en la pestilence generale, et mourut aussi
30 la sœur germaine de Pericles, qui y perdit semblablement la plus grande part de ses amis, alliez et parents,

x D : estant homme qui aymoît à despandre, et davantage

mesmement ceulx qui luy estoyent plus utiles au gouvernement de la chose publique. Mais toutefois jamais il ne fleschit pour tout cela, ny n'en rabaissa de rien la grandeur et haultesse de son courage, quelques malheurs
5 qui luy survinssent, ny ne le veit on jamais plorer, ny mener dueil aux funerailles d'aucun de ses parents ou amis, jusques à la mort de Paralus le dernier de ses enfans legitimes : car la perte de celuy la seul luy attendrit le cuer : encore tascha il à se maintenir en sa constance
10 naturelle, et se conserver en sa gravité accoustumee : mais ainsi comme il luy vouloit mettre uu chapeau de fleurs sur la teste, la douleur le forcea quand il le veit au visage, de maniere qu'il se prit soudainement à escrire tout hault, et espendit sur l'heure grande quantité de
15 larmes : ce qu'il n'avoit jamais fait en toute sa vie.

XXXVII. Au demourant, ayant le peuple ja essayé les autres capitaines et autres gouverneurs, et cogneu par experience qu'il n'y en avoit pas un de pois ny d'autorité suffisante pour une si grande charge, il le rappella à
20 la fin luy mesme à la tribune des harengues pour ouir ses conseilz, et à l'estat de capitaine pour la conduite des affaires : car il se tenoit lors renfermé en sa maison pour le dueil et la douleur de ses adversitez domestiques : mais Alcibiades et ses autres familiers et amis luy persua-
25 derent de se monstrier au peuple : lequel s'excusa envers luy du tort qu'il luy avoit ingratement fait. Et adonc Pericles reprit en main le gouvernement des affaires, comme devant : et la premiere chose qu'il y feit, fut qu'il requit que lon revoquast l'ordonnance qu'il avoit luy
30 mesme mise en avant touchant les bastards, de peur qu'à faulte d'hoir legitime de son corps, son nom et sa maison

ne vinst à fallir en luy. Mais quant à celle loy, voicy comment il en alloit : Pericles estant en la fleur de son credit avoit fait passer une ordonnance, que ceulx la seuls fussent tenus pour bourgeois d'Athenes, qui seroyent
5 nez de pere et de mere Atheniens : quelque temps apres, le roy d'Ægypte ayant envoyé au peuple d'Athenes, en don, quarante mille mines de bled, pour estre distribué entre les bourgeois de la ville, plusieurs à l'occasion de ceste loy furent accusez de bastardise et d'estre mestifz,
10 dont paravant on ne sçavoit rien, ou pour le moins on n'en faisoit compte, et y en avoit aucuns qui faulsement et à tort en estoient condamnez. Tant y a qu'il y en eut de convaincus et vendus comme esclaves, non gueres moins de cinq mille : et ceulx qui demourerent
15 pour jouir des privileges de bourgeoisie, et qui furent jugez citoyens d'Athenes, se trouverent jusques au nombre de quatorze mille et quarante. Or trouvoit on fort mauvais qu'une ordonnance qui avoit eu tant de pouvoir, fust revoquee et cassee par celuy mesme qui en
20 avoit esté autheur : mais toutefois la calamité presente, qui estoit survenue en la propre maison de Pericles, rompit le cueur aux Atheniens : lesquelz estimerent qu'il avoit suffisamment payé la peine de celle sienne arrogance : et croyans qu'il en avoit esté puny par expresse permis-
25 sion et vengeance des Dieux, et que sa requeste estoit humaine, ilz luy permeirent de faire enroller son bastard au registre des legitimes citoyens de sa lignee, en luy donnant son propre nom. C'est celuy qui depuis ayant desfait les Peloponesiens en une grosse bataille navalle,
30 pres les isles Arginuses, fut executé à mort par sentence du peuple, avec les autres capitaines ses compaignons.

XXXVIII. Au reste Pericles fut lors atteint de la peste, non pas si violente ni si aguë que les autres, ains foible et lente, et qui par long traict de temps, et avec plusieurs changemens luy amortit peu à peu la force et vigueur de
5 son corps, et surmonta la gravité de son courage et de son bon jugement : et pourtant Theophrastus en ses morales, au lieu ou il dispute si les meurs des hommes se changent selon leurs adventures, et si les passions et afflictions du corps les peuvent tant alterer, qu'elles
10 les facent issir hors des lices et des bornes de la vertu, recite que Pericles en ceste maladie monstra un jour à l'un de ses amis qui l'estoit allé visiter, ne sçay quel charme preservatif que les femmes luy avoyent attaché comme un carcan autour du col, pour luy donner à
15 entendre qu'il estoit fort mal, puis qu'il enduroit qu'on luy applicast une telle folie. A la fin, comme il fut arrivé bien pres de passer le pas de la mort, les plus gens de bien de la ville, et ceulx qui estoyent demourez encore vivans de ses amis, estans au tour de son lict, se meirent à parler
20 de sa vertu, et de la grande puissance et autorité qu'il avoit eüe, en pesant la grandeur de ses faicts, et comptant le nombre des victoires qu'il avoit emportees : car il avoit gagné neuf batailles estant capitaine general d'Athenes, et en avoit erigé autant de trophees à l'honneur
25 de son païs, et devisoyent de toutes ces choses entre eulx, comme s'il ne les eust point entendues, pensans qu'il eust ja perdu tout sentiment : mais au contraire, ayant encore l'entendement sain, il avoit tout bien noté ; si se prit à leur dire qu'il s'esmerveilloit
30 comme ils louoyent si haultement ce qui luy estoit commun avec plusieurs autres capitaines, et en quoy la

2 D : si aiguë — 5 A : et surmonta quand et quand la gravité



fortune mesme avoit sa part, et ce pendant ilz omettoient à dire ce qui estoit en luy le plus beau et le plus grand : c'est que nul Athenien, pour occasion de luy, n'avoit onques porté robbe noire.

- 5 XXXIX. Aussi estoit il veritablement grand et excellent personnage, non seulement pour la douceur et clemence qu'il avoit tousjours conservee au manient de si grands affaires, entre tant d'ennemis et de malvueillans, mais aussi pour avoir eu ce jugement de reputer que le
10 meilleur de ses plus glorieux actes estoit n'avoir en si absoluë puissance jamais rien concédé à haine, envie, ny à courroux, ny s'estre sans mercy vengé d'aucun sien ennemy. Si me semble que cela seul rendoit son surnom d'Olympien, c'est à dire, divin ou celeste, lequel autre-
15 ment estoit trop arrogant et trop superbe, non odieux ny envié, ains plus tost bien seant et bien convenable pour avoir eu la nature si benigne et tant debonaire, et en si grande licence avoir conservé ses mains pures et nettes, ne plus ne moins que nous reputons les Dieux pour estre au-
20 theurs de tous biens, et cause de nulz maulx, dignes de gouverner et regir tout le monde : non pas comme disent les poëtes, qui mettent nos esprits en trouble et en confusion par leurs folles fictions, lesquelles se contredisent à elles mesmes, attendu qu'ilz appellent le ciel, ou les
25 Dieux habitent, sejour tresasseuré, et qui point ne tremble, et n'est point agité de vents ny offusqué de nuees, ains est tousjours doulx et serein, et en tout temps egale-ment éclairé d'une lumiere pure et nette, comme estant telle habitation propre et convenable à la nature souve-
30 rainement heureuse et immortelle : et puis ilz les des-
crivent eulx mesmes pleins de dissensions, d'inimitiez,

de courroux et d'autres passions qui ne conviennent pas seulement à hommes sages et de bon entendement. Mais ce discours seroit à l'aventure mieux à propos en un autre traitté. Au demourant, les affaires ou se trouverent
5 les Atheniens incontinent apres la mort de Pericles, leur feirent bien sentir et regretter la perte qu'ilz avoyent faite en luy : car ceulx qui de son vivant supportoyent mal-vouluntiers sa trop grande autorité, pource qu'elle offus-quoit la leur, soudain apres qu'il fut decédé, et qu'ilz
10 vindrent à essayer d'autres harengueurs et d'aultres gouverneurs, furent contraints de confesser qu'il ne pouvoit estre une nature d'homme plus moderee en gravité, ne plus grave en douceur et bonté que la siene : et celle tant enviee puissance qu'ilz appelloyent durant sa vie monar-
15 chie et tyrannie, leur apparut alors evidemment avoir esté le rampart salutaire de toute la chose publique, tant il sourdit et se descouvrit incontinent apres son deces, au gouvernement de leurs affaires, de corruption et de meschanceté, laquelle luy, tant qu'il vescu, avoit tousjours
20 tenue basse et foible, de sorte qu'elle n'apparaissoit point, ou pour le moins ne pouvoit venir à telle licence, qu'elle peust commettre des faultes ausquelles il fust impossible de remedier.

16 A : rempart — D : rampart

FABIUS MAXIMUS

I. Ayant donques Pericles esté tel es choses dignes de memoire dont nous avons peu avoir cognoissance, il est temps desormais que nous escrivions aussi quel a esté Fabius. Lon dit que le premier Fabius, duquel est
5 descendue la maison et la race des Fabiens, qui est l'une des plus grandes et des plus nobles de Rome, fut engendré par Hercules qui engrossa une nymphe, ou, comme les autres disent, une femme du païs au long de la riviere du Tybre. Et y en a qui disent que les premiers de
10 ceste maison furent au commencement appelez Fodiens, pource qu'ilz chassoyent aux bestes sauvages avec des pieges et des fosses : car jusques aujourdhuy les Romains appellent encore des fosses *fossæ*, et fossoyer *fodere*; mais que depuis les deux premieres lettres ont esté
15 changees, et les a lon appelez les Fabiens. Comment que ce soit, il est certain que d'icelle maison sont issus plusieurs grands personnages; mais entre les autres il y en eut un nommé Fabius Rullus, qui pour la grandeur de ses faicts fut par les Romains surnommé *Maximus*,
20 c'est à dire, tresgrand; apres lequel Fabius Maximus, celuy dont nous escrivons presentement, fut le quatrieme en droite ligne, et fut surnommé Verrucosus, à cause d'un seing naturel qu'il avoit sur l'une des levres comme une petite verrue : et fut aussi surnommé Ovicula, qui vault

x8 A: nommé Fabius Rutilianus

autant à dire comme brebiette, pour la douceur, timidité
 et pesanteur de ses façons de faire des qu'il estoit encore
 enfant : car sa nature lente, doye et reposée, avec une faci-
 lité, et ce que lon le voyoit peu souvent et resserrement
 5 s'esbatre à jeux d'enfans : et aussi que lon le voyoit sur
 d'entendement, et qu'il avoit peine à comprendre ce qu'on
 luy enseignoit, joinct que lon en faisoit ce que lon vouloit,
 tant il estoit obeissant à tous ceux avec qui il habitoit :
 le tout ensemble faisoit que plusieurs qui ne le cognois-
 10 soient que par dehors, jugeoyent qu'il ne seroit jamais
 qu'un lourdaud et un niais ; mais il y en avoit d'autres
 qui, le considerans de plus pres, appercevoyent en sa
 nature une constance immuable et une magnanimité de
 lion. Et luy mesme depuis estant excité par les affaires,
 15 donna bien tost à cognoistre que ce que lon estimoit en
 luy bestise, estoit gravité qui ne s'esmeuvoit de rien : et
 que ce que lon jugeoit timidité, estoit prudence : ce qu'il
 n'estoit point hatif ne remuant en chose quelconque,
 estoit fermeté et constance. Parquoy considerant la gran-
 20 deur de la seigneurie de leur chose publique et les con-
 tinuelles guerres qu'ilz avoyent, il endurcit et exercita
 son corps, comme unes armes nees avec luy, pour
 s'en pouvoir mieulx servir à la guerre, et son eloquence
 aussi comme un instrument de persuasion, pour en pou-
 25 voir mener le peuple à la raison. Si estoit son langage
 conforme et convenable à ses meurs et à sa maniere de
 vivre : car il n'y avoit fard ny affecterie quelconque, ains
 estoit toute substance avec pois et profondeur de sen-
 tences et de conceptions singulieres et propres à luy,
 30 sinon que lon dit qu'elles ressemblent fort à celles de
 Thucydides : car on treuve encore aujourd'hui un blason

1 A : pour la douceur et pesanteur de ses façons — 22 unes armes
 nees [même texte en A et D]

T. fr. mod. — Amyot, I.

ou harengue funebre qu'il feit devant le peuple à la louange de son filz, lequel mourut au sortir de son consulat.

II. Mais quant à luy, ayant esté par cinq fois eleu
5 consul, en son premier consulat il triumpha des Liguriens, qui sont ceulx des montagnes et de la coste de Genes : lesquelz ayans esté par luy desfaits en une grosse bataille ou ils avoyent perdu beaucoup de gens, furent
contraints de soy retirer et reserrer au dedans de leurs
10 Alpes, sans plus courir ny fourrager les marches de l'Italie qui leur confine. Depuis estant Hannibal avec grosse puissance entré en Italie, et y ayant gaigné la premiere bataille pres la riviere de Trebia, il tira oultre à
travers la Thoscane, gastant et destruisant tout par ou il
15 passoit : ce qui meit la ville de Rome en grand trouble et en grand effroy : et si advint des signes et prodiges, aucuns ordinaires et assez accoustumez aux Romains, comme
ceulx des foudres et des tonnerres, et d'autres fort estranges et non jamais ouiz ne veuz. Car on rapporta
20 que quelques boucliers estoyent devenuz tous sanglants d'eulx mesmes, et qu'entour la ville d'Antium on trouvoit les espics de bled, en les moissonnant, tous ensanglantez, qu'il estoit tumbé du ciel des pierres toutes
ardentes et en feu, et que au cartier des Phaleriens le ciel
25 sembla s'entreouvrir, et en tumba plusieurs petits escriteaux, en l'un desquelz y avoit escrit de mot à mot :
« Mars secouë ses armes. » Mais neantmoins, il n'y eut rien de tout cela qui peust arrester ny faire reboucher l'audace du consul Caius Flaminius : lequel, outre ce que
30 naturellement il avoit le cueur grand et convoiteux d'honneur, estoit encore elevé davantage pour aucunes

merveilleuses prosperitez qu'il avoit eues auparavant, contre toute raison. Car combien que le senat le rappellast, et que son compagnon au consulat s'opposast à son intention, il avoit neantmoins donné une bataille aux
5 Gaulois, malgré tout le monde, et en avoit emporté la victoire. Or quant à tous ces signes et prodiges celestes, encore qu'ilz troublassent beaucoup de gens, si n'emouvoient ilz point Fabius, pource qu'il n'y veoit apparence quelconque pour s'en emouvoir : mais entendant
10 le peu de nombre des ennemis et la faulte d'argent qu'ilz avoyent, il conseilloit, et estoit d'avis que lon devoit avoir un peu de patience et ne avanturer point la bataille contre un homme qui avoit son armee aguerrie de longue main, et ja exercitee par plusieurs combats à ceste fin
15 seulement : et estoit d'opinion qu'il falloit envoyer du secours à leurs subjects et alliez, selon qu'il en seroit besoing, pour retenir les villes en leur devotion, et ce pendant laisser amortir d'elle mesme la vigueur des forces de Hannibal, qui estoit comme un feu de paille
20 et une flamme allumée en une matiere de peu de duree : [III.] mais quelque chose qu'il sceust alleguer, il ne le peut onques mettre en teste de Flaminius, lequel dit qu'il n'attendroit point que la guerre s'approchast jusques aux portes de Rome, ny ne combatroit point dedans la ville
25 pour la defendre, comme avoit anciennement fait Camillus. Si commanda incontinent à ses capitaines qu'ilz tirassent leurs compagnies aux champs, et luy mesme monta sur son cheval, lequel sans cause apparente s'effroya si estrangement et se tourmenta tant qu'il jetta le
30 consul la teste devant par terre : cela neantmoins ne luy fait point changer d'opinion, ains suyvnt sa premiere resolution, s'en alla au devant de Hannibal, et luy presenta la bataille en la Thoscane, au long du lac qui se

nomme Thrasimene, qui est le lac de Peruse. Ceste bataille fut 'si asprement combatue d'une part et d'autre que, combien qu'à l'instant mesme du combat il se fust levé un tremblement de terre si violent que quelques
5 villes en furent renversees sans dessus dessous, aucunes rivières destournees de leurs cours, et les pieds des montagnes esbranlez et ouverts, il n'y eut toutefois pas un des combatans qui en sentist rien. Si y demoura mort sur le champ le consul mesme Flaminius, apres avoir fait de
10 sa personne plusieurs actes de grande force et de grande hardiesse, et autour de luy les plus gens de bien qui fussent en l'armée : le demourant s'estant mis en fuite, il en fut fait un fort grand meurtre, car il fut taillé en pieces bien quinze mille hommes, et y en eut autant
15 de prisonniers. Apres la desconfiture, Hannibal feit toute la diligence qui luy fut possible pour trouver le corps de Flaminius, à fin de le faire inhumer honorablement, à cause de sa vertu, mais il ne le peut onques trouver entre les morts, ny n'a lon jamais sceu depuis qu'il estoit
20 devenu. Or quant à la premiere desfaitte de Trebia, ny le capitaine general qui l'escrivit, ny le messenger qui en apporta la nouvelle premiere à Rome, ne la dit à la verité, ainsi comme elle estoit, ains faignit que l'issue en avoit esté douteuse, de sorte que lon ne sçavoit qui en
25 avoit eu du meilleur : mais de ceste cy, incontinent que le præteur Pomponius en eut entendu la nouvelle, il feit assembler le peuple en conseil, là ou, sans user de desguisement ne de dissimulation, leur dit tout ouvertement :
« Seigneurs Romains, nous avons perdu la bataille, en
30 « laquelle nostre armee a esté desconfitte et desfaitte tout
« à plat, et le consul mesme y est demouré mort : par-

« quoy advisez ce que vous avez à faire pour vostre salut et seureté. » Ces paroles jettees comme un oïrage de vent impetueux sur la mer d'une infinie multitude de peuple, meirent la ville en grand trouble, et en fut l'effroy si grand qu'il n'y avoit homme qui fust à soy, ne qui eust le sens rassis : toutefois si furent ilz bien tous d'accord que les affaires avoyent necessairement besoin du souverain magistrat que lon appelle en latin la dictature, et d'un personnage qui la sceust exercer vertueusement sans
10 espargner ny craindre personne, et que Fabius Maximus seul estoit tel, ayant la grandeur de courage et la gravité de meurs egale à la dignité et autorité souveraine de ce magistrat : avec ce qu'il estoit en l'aage ou la force du corps est encore joincte à la maturité de l'entendement,
15 et la hardiesse meslee avec l'experience et sagesse.

IV. Cest advis estant approuvé de tous, Fabius fut eleu dictateur, lequel nomma pour chef de la chevalerie Lucius Minutius : si requit premierement au senat qu'il luy fust permis de monter à cheval à la guerre, car il
20 n'estoit pas permis au dictateur, ains expressement defendu par une ordonnance ancienne, soit ou pource qu'ilz reputoyent la principale force de leur armee consister en leurs gens de pied, et à ceste cause vouloyent que le chef demourast entre eulx au jour de la bataille et
25 ne les abandonnast point : ou pource que l'autorité de ce magistrat en toute autre chose est si grande qu'elle approche de la tyrannique, ilz vouloyent qu'à tout le moins en cela le dictateur eust affaire de la souveraine puissance du peuple. Fabius donques voulant d'entree
30 monstrier la majesté et la grandeur de son magistrat, à fin que chascun luy en fust plus obeïssant et plus prompt à faire son commandement, il sortit en public avec vingt et quatre sergens portans les faisceaux de verges et les haches

devant luy : et comme l'un des consuls luy vint au devant, il luy envoya commander par un sergent qu'il eust à laisser les faisceaux de verges qu'on portoit devant luy, et les autres marques et enseignes de magistrat, et
5 qu'il le vinst trouver en estat d'homme privé. Puis commençant par un tresbeau et bon commencement au service des Dieux, il remonstra au peuple comme la perte qu'ilz avoyent receüe, leur estoit advenue par la temerité et nonchalance estourdie de leur capitaine, qui n'avoit
10 tenu compte des choses divines, non point par la faute ny par la lascheté des combatans : et les enhorta pour ceste cause de ne craindre point leurs ennemis, ains d'appaiser l'ire des Dieux, en leur portant honneur et reverence : non qu'il les rendist superstitieux en ce fai-
15 sant, ains asseuroit leur vertu par vraye devotion envers les Dieux, et leur ostoit ou diminueoit la crainte des ennemis, en leur donnant certaine esperance de l'aide des Dieux. Si furent adonc visitez les saints livres prophetiques que lon appelle les livres de la Sibylle, qui
20 sont tenus forts secrets, et y trouva lon quelques anciennes propheties et oracles qui se rapportoyent et se confor- moyent aux accidens lors advenus ; mais il n'est pas loisible de publier ny redire à autrui ce que lon y a cogneu : puis le dictateur, en pleine assemblee du peuple, devant
25 toute l'assistance, voua solennellement aux Dieux qu'il leur sacrifieroit tout tant de fruct que porteroient à la prochaine saison nouvelle les brebis, les truyes, les vaches et les chevres, en toutes les montagnes, plaines, rivières ou prairies de l'Italie, et feroit celebrer des jeux
30 de musique et jouer autres mysteres en l'honneur des Dieux, jusques à y despendre la somme de trois cents

trente trois sesterces et trois cents trente trois deniers romains et un tiers de denier davantage. Ceste somme reduitte à la monnoye grecque monte à la valeur de ^a quatre vingts trois mille cinq cents quatre vingts trois drachmes
5 d'argent, et deux oboles. Or seroit il bien malaisé de rendre la raison pour laquelle il specifica nommeement ceste somme ainsi precise, et pourquoy il la distribua par trois, si ce n'est que lon vueille exalter la puissance du nombre ternaire, pource que c'est un nombre de sa nature
10 parfait, et le premier des nompers, qui est le commencement de multitude, et qu'il comprend en soy les premieres differences et les premiers elements et principes de tous les nombres uniz et joincts ensemble.

V. Ainsy Fabius ayant fait que le peuple eust bonne
15 esperance en l'aide et faveur des Dieux, le rendit en ce faisant mieulx deliberé de bien faire à l'advenir : mais luy mettant tout son espoir de victoire en soy mesme, comme celuy qui estimoit que les Dieux envoyent aux hommes l'heur et la prosperité par le moyen de vertu
20 et de prudence, s'en alla trouver Hannibal, non point en intention de le combattre, ains en ferme deliberation de luy consumer la vigueur de son armee par long traict de temps, sa pauvreté par force d'argent, et le petit nombre de ses gens par grande multitude de combatans. Si s'en
25 alloit tousjours campant en lieux forts et haults sur les montaignes, hors du danger de la chevalerie de son ennemy, qu'il coustoyoit tousjours, de sorte que quand l'ennemy s'arrestoit en quelque lieu, aussi faisoit il luy, et s'il se remuoit, il le suyvoit à la trace, et rouoit à l'en-
30 tour de luy, sans jamais esloigner les montaignes, ny

a. Ce sont environ huit mille cinq cens escus.

xx D : et qui comprend — 29 D ; roüoit

s'approcher de si pres qu'il peust estre contraint de combattre s'il ne vouloit : et neantmoins se monstroittousjours à la queue de son ennemy, et le tenoit en continuelle crainte, par ce qu'il estimoit qu'il allast espianter le point de son occasion pour le charger à son advantage. Mais en dilayant et prolongeant ainsi le temps, il vint à la fin à estre mesprisé de chascun : car et en son camp on mesdisoit publiquement de luy, et les ennemis mesmes le tenoyent pour homme couard et de fort lasche cueur, 10 excepté Hannibal seul, lequel appercevant bien son bon jugement, et la maniere de laquelle il le vouloit combattre, estima que par toute voye de ruse ou de force, il le falloitt attirer au combat, ou autrement que les affaires des Cartaginois s'en alloyent ruinez, attendu qu'ilz ne se 15 pouvoyent servir ne valloir de leurs armes, en quoy ilz estoient les plus forts, et ce pendant estoient minez et consumez par multitude d'hommes, et à force d'argent, en quoy ilz estoient les plus foibles. Si se meit à imaginer et à essayer toutes sortes de ruzes de guerre, dont il 20 se pouvoit adviser, ne plus ne moins que fait le ruzé champion de lucte, qui cherche tout moyen d'avoir prise sur son adversaire pour luy donner le bond : car tantost il s'approchoit de luy, et luy faisoit donner des alarmes en son camp, tantost il s'en reculoit, et se remuoit 25 souvent de lieu à autre, pour voir s'il le pourroit point attirer hors de ceste resolution, de ne mettre rien en hazard, ains jouer tousjours au plus seur. Et quant à luy, il persevera tousjours constamment en sa premiere deliberation, croyant certainement que c'estoit le plus expedient de le faire ainsi : mais le general de la chevalerie, 30 Minutius, luy faisoit beaucoup d'ennuy, lequel ardent du

desir de combatre sans propos, et faisant de l'audacieux, alloit gaignant la bonne grace des soudards par une furieuse ardeur de vouloir combatre qu'il leur imprimoit, et une vaine esperance dont il les remplissoit, de maniere
5 qu'ilz se moquoyent de Fabius, en l'appellant le pædagogogue de Hannibal, et au contraire louoyent haultement Minutius, comme capitaine hardy, et digne de la magnanimité de Rome. Cela le faisoit encore plus arrogamment monter en gloire, et en presumptueuse opinion de
10 soymesme, en piquant Fabius de ce qu'il alloit ainsi logeant tousjours son camp sur les montagnes, disant que le dictateur leur appareilloit de beaux jeux, en leur faisant voir l'Italie que lon brusloit, pilloit et gastoit ainsi devant leurs yeulx : et demandoit à ceulx qui estoient
15 bons amis de Fabius, s'il feroit point à la fin monter son camp jusques au ciel, se deffiant de la terre, ou si c'estoit de peur que les ennemis ne le trouvassent, qu'il s'alloit ainsi cachant dedans les nues et les brouees. Les amis de Fabius luy rapportoyent tous ces brocards, et luy conseilloyent de hazarder plus tost la bataille, que de sup-
20 porter plus tant de paroles injurieuses qui se disoyent contre luy. Mais Fabius leur respondit : « Si je faisois
« ce que vous me conseillez, je serois encore plus
« couard qu'ilz ne cuident que je le sois maintenant, en
25 « sortant hors de ma deliberation pour crainte de leurs
« paroles piquantes et traicts de moquerie. Car ce n'est
« point honte que d'avoir crainte pour le bien et le salut de
« son païs : ains, au contraire, s'estonner pour le bruit et
« l'estime d'une commune, ou pour les impropres et
30 « calumnies des hommes, n'est point acte de personnage
« digne d'une sigrande charge, ains plus tost d'homme servant et obeissant à ceulx à qui il doit commander, et
« qu'il doit gouverner, pourcequ'ilz ne sont pas sages. »

VI. Depuis il advint que Hannibal tumba en un erreur bien grand, pource que voulant s'esloigner de Fabius, et par mesme moyen mener son armee en païs plain, ou il y eust vivres et fourrages pour les bestes, il
5 commanda à ses guides qu'ilz le conduisissent incontinent apres soupper en la plaine de Casinum. Les guides n'ayans pas bien entendu ce qu'il leur avoit dit, à cause qu'il prononçoit barbarement le langage italien, prirent l'un pour l'autre, et l'allerent jeter luy et son armee en
10 un bout de la Champagne pres la ville de Casilinum, par le milieu de laquelle passe la riviere que les Romains appellent Vulturinus, et le païs d'alentour est une vallee ceincte et environnee de montagnes tout à l'entour, excepté qu'elle s'estend devers la mer, là ou ceste riviere
15 se respendant hors de son lict, fait des maretz et des bancs de sable fort profonds, et finalement se va descharger en celle coste de mer qui est fort dangereuse, et ou il n'y a nul abry. Estant donques Hannibal descendu en ce fond de sac, Fabius qui cognoissoit le païs et sça-
20 voit les adresses des chemins, suyvant ses brisees, luy serra le pas par ou il pouvoit sortir de ceste vallee, avec quatre mille hommes de pied qu'il y ordonna, et disposa le demourant de son armee sur les croupes des montagnes, aux endroits plus opportuns tout à l'environ, puis avec
25 ses coureurs, et les plus dispos et legerement armez de ses gens, fait charger la queuë des ennemis : ce qui meit toute leur armee en desordre, et y en eut bien huit cents de tuez. Parquoy Hannibal voulant tirer son camp hors de là, et cognoissant la faulte que ses guides avoyent
30 faite, en prenant l'un pour l'autre, et le danger auquel ilz l'avoyent mis, les fait pendre. Mais au demourant, de

3 A : et quand et quand mener son armee — 10 D : de la campagne — 23 D : les croupes

forcer ses ennemis qui tenoyent les cymes des coustaux, et les en dechasser à force, il n'y voyoit point de moyen, ny n'en avoit point d'esperance : à l'occasion dequoy ses gens estans effroyez et descouragez, pource qu'ilz
5 se voyoyent de tous costez enfermez, sans ordre d'en pouvoir eschapper, il se delibera d'affiner son ennemy par une telle ruze : c'est qu'il feit choisir environ deux mille bœufs, de ceulx que lon avoit pris au pillage, et leur feit attacher à chasque corne des flambeaux ou des fagots
10 de saule, et des javelles de sarment, et ordonna à ceulx qui en avoyent la charge, que la nuict quand il leur hausseroit un signe en l'air, ilz meissent le feu en ces fagots, et chassassent les bœufs contremont les coustaux vers les pas et les endroits que les ennemis avoyent occu-
15 pez. Pendant que cela se preparoit, luy de son costé ordonna son armee en bataille, puis quand la nuict fut venue, la feit marcher le petit pas. Or les bœufs, tant que le feu qui brusloit ce qu'ilz avoyent attaché aux cornes, fut petit, cheminerent tout bellement contremont le pied des
20 montagnes, là ou on les chassoit, dont les bergers et bouviers qui estoyent sur les cymes des coustaux, s'esmerveillerent fort de voir ainsi des flammes et des feuz attachez aux cornes de ces bœufs, comme si c'eust esté une armee marchant en ordonnance aux lumieres des torches : mais
25 quand les cornes vindrent à estre bruslees jusques à la racine, et que le sentiment du feu fut passé jusques à la chair vifve, adonc commencerent les bœufs à se debatre et à secouër leurs testes, et en ce faisant, se couvrirent de feu les uns les autres de plus en plus : si ne cheminerent
30 plus bellement, ny en ordre, ains pour la frayeur qu'ilz avoyent, et la douleur qu'ilz sentoient, se prirent à courir

1 D: costaux [et sic ailleurs] — 14 A: avoient occupez, et pendant que cela se preparoit

ça et là à travers les montagnes, portans de la flamme à leurs cornes et à leurs queueës, dont ilz mettoient le feu es bois et buissons par lesquelz ils passoyent. Cela sembloit bien estrange à voir, et estonnoit fort les Romains
5 qui gardoyent les pas des montagnes, car ilz cuidoyent que ce fussent hommes qui courussent ainsi ça et là avec des torches aux mains : au moyen dequoy ilz en estoient tous effroyez et troublez, pensans que ce fussent les ennemis qui accourussent ainsi contre eulx, pour les envi-
10 ronner de tous costez, tellement qu'ilz n'oserent plus s'arrester aux passages ou ilz avoyent esté ordonnez, ains abandonnans les destroits se meirent à fouir vers leur grand camp, et aussi tost les avantcoureurs de Hannibal, armez à la legere, se saisirent de ces pas, de maniere que le
15 reste de l'armee eut tout loisir de marcher à son aise jusques là, sans crainte ny peril, encore que elle fust chargee et empeschee d'une quantité grande de toute sorte de butin.

VII. Or quant à Fabius, il s'apperceut bien des la nuict
20 mesme que c'estoit une ruze de Hannibal, pource que quelques uns des bœufs, ainsi qu'ilz s'en fuyoyent ça et là, tumberent entre ses mains : à l'occasion dequoy, craignant de tumber en quelque embusche pour les tenebres de la nuict, il teint ses gens en bataille sans
25 autrement bouger ny faire bruit, et le matin si tost que le jour commença à poindre, se meit à suivre son ennemy à la trace, donnant sur la queueë, et escarmouchant les derniers dedans les destroits des montagnes, de maniere qu'il meit tout l'ost des ennemis en desarroy,
30 jusques à ce que Hannibal envoya de l'avantgarde quelque nombre d'Espagnolz, hommes legers et dispos,

accoustumez de gravir aux montagnes, lesquelz venans à charger les Romains armez de pesantes armes en tuerent plusieurs, et feirent retirer Fabius : lequel en fut adonc encore bien plus mesprisé et blasmé que devant, pource
5 qu'il avoit tousjours monsté de ne vouloir point à force ouverte combattre Hannibal, ains le miner et desfaire par astuce et prudence, en quoy il se trouvait luymesme abusé et affiné par luy. Davantage Hannibal voulant enflammer encore plus l'ire et le courroux des Romains contre
10 luy, quand il approcha de ses terres, commanda que lon bruslast et gastast tout à l'environ, mais que lon ne touchast aucunement aux sienes, et y meit expressement des gardes pour empescher que lon n'y prist rien, et que lon n'y feist aucun dommage. Cela fut rapporté à Rome, qui
15 aggrava bien encore plus le mescontentement que lon avoit de luy : joinct que les tribuns du peuple ne cessoient de crier contre luy es harengues qu'ilz faisoient devant le peuple, à la suscitation d'un Metellus principalement, non pour inimitié qu'il eust encontre Fabius,
20 mais pource qu'il estoit parent de Minutius, maistre de la chevalerie, et estimoit que la mauvaise opinion que lon prendroit de l'un, tourneroit à la louange et à l'avantage de l'autre. Le senat mesme estoit courroucé contre luy pour l'accord qu'il feit avec Hannibal, touchant les
25 prisonniers de guerre : car il accorda que lon eschangeroit les prisonniers en rendant homme pour homme, ou bien * deux cents cinquante drachmes d'argent pour chasque teste, si les uns en avoyent plus que les autres. Quand l'eschange eut esté ainsi fait, il se trouva que Hannibal
30 en avoit encore de reste deux cents quarante Romains.

a. Ce sont environ vingt et cinq escus.

11 D : qu'on bruslast gastast tout

Le senat ordonna que lon n'envoyeroit point d'argent pour les delivrer, et blasma grandement Fabius d'avoir fait cest accord, comme n'estant ny honorable ny profitable à la chose publique, pour recouvrer des gens qui
5 par lascheté de cueur s'estoyent laissez prendre aux ennemis. Ce qu'entendant, Fabius supporta patiemment le courroux du senat; mais n'ayant point d'argent, et ne voulant point faillir à sa parole, ny abandonner ses citoyens prisonniers, il envoya son filz à Rome avec pro-
10 curation pour vendre ses terres, et luy en apporter l'argent incontinent. Le jeune homme y alla, vendit les heritages de son pere, et luy en porta bien tost l'argent au camp, dont il rachepa les prisonniers, en envoyant leur rençon à Hannibal. Plusieurs de ceulx qu'il avoit
15 rachepiez, le voulurent depuis rembourser, mais il n'en voulut onques rien prendre, et leur donna leur rençon à tous.

VIII. Depuis estant appelé à Rome par les presbtres, pour faire quelques solennelz sacrifices, il laissa l'armee
20 entre les mains de Minutius pour la gouverner en son absence, avec condition de ne s'attacher point à l'ennemy, et de ne combattre point : ce que non seulement il luy defendit tresexpressément, comme ayant souveraine puissance, ains encore l'en admonesta, et l'en pria tres
25 instamment, comme son amy. Minutius se souciant bien peu de toutes ses prieres et commandemens, aussi tost qu'il eut le dos tourné, commença incontinent à harasser les ennemis : et un jour entre les autres ayant observé que Hannibal avoit envoyé bonne partie de son armee
30 au fourrage et recouvrement de vivres, il alla charger ceulx qui estoyent demourez, et les mena batant jusque

16 A : ains leur donna leur rençon

dedans leur camp avec grand meurtre, et plus grand effroy de ceulx qui s'estoyent sauvez, lesquelz n'attendoient pas moins que d'estre assiegez dedans leur camp : et encore apres que toute leur armee se fut rassemblée en un, il se retira malgré eulx, et sans rien perdre. Cela le remplit d'arrogance, et les soudards de temerité, encore plus que jamais. Si courut incontinent la nouvelle de ceste desfaitte jusques à Rome, et la fait on beaucoup plus grande qu'elle n'estoit : et Fabius
10 l'ayant entendue dit qu'il craignoit beaucoup plus la prosperité de Minutius, qu'il ne faisoit son adversité. Mais le commun peuple s'en esjouit fort, et avec grande demonstration de joye accourut sur la place : là ou Metellus, l'un des tribuns du peuple, montant en la chaire
15 aux harengues, leur fait un sermon, auquel il magnifia et loua haultement la vertu de Minutius, et à l'opposite chargea Fabius, non plus de lascheté et de couardise, ains de trahison : accusant aussi les autres principaux personnages de Rome, disant que des le commencement ilz
20 avoyent tenu moyen de tirer ceste guerre en longueur, à fin de ruiner l'autorité et la puissance du peuple, et avoyent incontinent fait tumber les affaires soubz la main d'une monarchie, laquelle avec ses remises et delais donneroit loisir à Hannibal de se planter et maintenir en
25 Italie, jusques à ce que les Cartaginois eussent moyen, avec le temps, de luy envoyer renfort d'une seconde armee, pour de tout point se saisir et s'emparer de toute l'Italie.

IX. Quoy entendu, Fabius se tira en avant pour parler au peuple, là ou il ne s'amusa point à respondre aux charges que le tribun luy avoit mises sus, ains dit

2 D : et le plus grand effroy — 18 A : accusant quand et quand les autres

qu'il falloit promptement achever les sacrifices et ceremonies du service divin, à fin qu'il s'en peust soudainement retourner au camp pour y chastier Minutius, lequel par dessus son expresse defense avoit combatu contre
5 l'ennemy. Il n'eut pas plus tost achevé ces paroles, qu'il se leva incontinent un grand bruit et un tumulte parmy le peuple, pour le danger de Minutius, à cause que le dictateur a puissance de mettre en prison, et de faire mourir qui bon luy semble, sans forme de proces ny de
10 jugement : et estimoit on, puis que Fabius estoit une fois sorty hors de son accoustumee clemence et bonté, qu'il deviendroit si aspre en son courroux, qu'il seroit bien malaisé de l'appaiser. Parquoy il n'y eut celuy en toute l'assistance qui ne se teust de peur, excepté le tri-
15 bun Metellus, lequel ayant loy de tout dire, pour la seurété que luy donne son magistrat, qui seul retient son autorité quand il y a un dictateur eleu, et demeure en son entier, estans les autres supprimez, supplia lors à grande instance le peuple de ne vouloir point abandon-
20 ner Minutius, ny ne permettre qu'il souffrist ce que Manlius Torquatus jadis avoit fait à son filz, auquel il fait trencher la teste apres avoir vaillamment vaincu et desfait son ennemy : les admonestant d'oster à Fabius ceste puissance tyrannique de la dictature, et de mettre
25 leurs affaires entre les mains de celuy qui vouloit et scauroit bien les conduire à port de salut. Le peuple fut fort emeu par ces seditieuses paroles, mais toutefois encore n'osa il contraindre Fabius de quitter la souveraine autorité de sa dictature, combien qu'il en eust bien mauvaise
30 opinion, et qu'il fust tresmal content de luy : ains ordonna que Minutius auroit de là en avant egale puissance et

autorité pareille à celle du dictateur en la conduite des affaires : ce qui jamais n'avoit encore esté ouy ne veu ; mais bien tost apres il fut aussi fait une autre fois, apres la desconfiture de Cannes. Car estant lors Marcus
5 Junius le dictateur au camp, lon eleut à Rome un autre dictateur, qui fut Fabius Buteo, pour nommer et creer de nouveaux senateurs, au lieu de ceulx qui estoient morts en la bataille ; mais apres qu'il en eut nommé, et remply le conseil du senat, le jour mesme il laissa les sergens
10 qui portoyent les haches devant luy, et renvoya la suite qui l'accompagnoit par honneur, et se jetta à travers la presse du peuple sur la place, vaquant à ses particuliers affaires, ne plus ne moins qu'une personne privee.

X. Or cuidoyent bien les Romains que Fabius voyant
15 comme lon avoit donné à Minutius puissance egale à la siene, le prendroit fort à cueur, et en seroit tres desplaisant : mais ilz ne cognoissoient pas du tout sa nature, pource qu'il n'estima point que leur folie luy tournast à malheur, ny à dommage ou deshonneur, ains comme
20 Diogenes le sage respondit à un qui luy disoit : « Ceulx
« la se moquent de toy » — « Je ne m'en tiens, dit il,
« point pour moqué ; » voulant dire qu'il reputoit ceulx la seuls estre moquez, qui se passionnent et se troublent pour des moqueries. Ainsi enduroit Fabius doulcement,
25 et sans passion quelconque, quant à ce qui le touchoit particulierement, tout ce que le peuple faisoit, servant d'exemple et de preuve manifeste aux philosophes, qui maintiennent que l'homme sage et homme de bien ne peult estre nullement injurié ne deshonoré : car tout le
30 desplaisir qu'il recevoit de la folie du peuple, estoit pour le regard de la chose publique, à cause qu'ilz avoyent donné moyen à un estourdy et temeraire de servir à sa

folle ambition au faict des armes. A l'occasion dequoy craignant que luy aveuglé de vaine gloire et de presumptueuse opinion de soy mesme, ne se precipitast et hastast de faire quelque grand mal avant qu'il fust arrivé, il se
5 partit soudainement de Rome, sans que personne en sceust rien, pour s'en retourner au camp : là ou il trouva Minutius si fier et si superbe, qu'il n'estoit plus aucunement supportable : car il vouloit avoir autorité de commander à toute l'armee à son tour. Ce que Fabius ne luy
10 voulut point consentir, ains departit par moitié tout l'exercite avec luy, estimant qu'il valoit mieulx qu'il commandast tousjours seul à une partie de l'armee, que par tour à la totalité : si choisit pour soy la premiere et la troisieme legion, et luy donna la seconde et la qua-
15 trieme, et partagea aussi semblablement le secours des alliez. Et comme Minutius se vantast et glorifiast de ce, que la majesté du souverain magistrat avoit esté ravallee et abbaissee pour l'amour de luy, Fabius luy remonstra qu'il devoit penser, s'il estoit sage, que ce n'estoit point
20 à luy, ains à Hannibal, qu'il avoit à combattre ; et encore s'il se vouloit opiniastres à estriver par jalousie encontre son compaignon, à tout le moins devoit il regarder que luy qui avoit gaigné, et qui avoit esté tant honoré par ses citoyens, ne fust pas moins soigneux de leur seureté et
25 de leur salut, que celuy qui avoit esté vaincu et ignominieusement traité par eulx.

XI. Minutius prit cest advisement comme pour une moquerie simulee et couverte, à la maniere des vieillards, et prenant sa moitié de l'armee, se logea seul
30 à part. Hannibal n'ignoroit rien de tout ce debat, ains espioit toutes les occasions pour se servir de leur discord. Or y avoit il entre leurs deux camps une motte non guerres malaisée à gagner, et estoit une belle assiette

pour loger un camp à seureté, ayant commodité et aisance de toutes choses. La campagne d'alenviron, à la voir de loing, sembloit toute plaine et toute unie, pource qu'elle n'estoit point couverte de boscages : mais toutes
5 fois il y avoit quelques fonceaux et quelques vallees entre deux : à l'occasion de quoy Hannibal, encore qu'il eust bien le moyen de s'en saisir facilement d'emblee, s'il eust voulu, ne le voulut point faire, ains la laissa au milieu pour luy servir d'emorche à attirer ses ennemis au combat. Parquoy quand il veit que Minutius estoit séparé
10 d'avec Fabius, il espendit une nuit quelque nombre de ses gens par ces fonceaux et vallees, puis le matin au point du jour envoya une troupe non gueres grosse à la decouverte pour occuper laditte motte, esperant qu'il
15 pourroit bien attirer par ce moyen Minutius à combatre pour ce logis : comme il en advint. Car Minutius y envoya premierement ses coureurs, puis toute sa gendarmerie : et finalement voyant que Hannibal luy mesme venoit pour soustenir ses gens qui estoient dessus la
20 motte, il s'y en alla aussi avec tout le demourant de ses forces en bataille rengee, et fait un grand effort pour chasser ceulx qui defendoyent la motte. Le combat dura quelque temps egal entre les deux parties, jusques à ce que Hannibal, voyant que son adversaire avoit à bon
25 esciant donné dedans ses rets, et qu'il monstroït le derriere de son bataillon tout nud à ceulx de ses gens qu'il avoit mis en embusche, leva incontinent le signe qu'il leur avoit baillé, auquel ilz se leverent tous à un coup, et se ruerent avec grands cris sur la queue des Romains,
30 dont ilz tuerent de primsault un bon nombre, et meirent les autres en un tel trouble, et en si grand effroy, qu'il n'est possible de le sçavoir bien exprimer. Si fut bien adonc la braverie de Minutius et sa fiere audace ravalée :

car il regardoit tantost l'un, tantost l'autre de ses capitaines au visage, et n'en voyoit pas un qui eust courage de demourer, ains estoient tous prests de se tourner en fuite : ce qui eust esté cause de leur totale ruine, pource
5 que les Numides, soy sentans les plus forts, commen-
ceoyent ja à se respandre par la plaine tout à l'environ, mettans en pieces tous ceulx qui se desbandoyent pour fourir.

XII. Estans donques les gens de Minutius tumbéz en
10 tel inconvenient, Fabius, qui avoit bien preveu le danger
auquel ilz estoient pour tumber, et qui pour ceste cause
tenoit son armée toute preste en bataille, eut le soing de
sçavoir ce qui se feroit, non par le rapport d'aucuns mes-
sagers, ains par le veoir luy mesme à l'œil de dessus une
15 butte qui estoit au devant de son camp. Parquoy quand il
veit Minutius et ses gens enveloppez de tous costez, et
ja en branle de fourir, et qu'il entendit leurs cris, non
comme de gens qui eussent cueur de combattre, ains qui
estoyent effroyez et regardoyent à se sauver de vitesse, il
20 frappa de la main sur sa cuisse, en gettant un grand sous-
pir, et dit à ceulx qui estoient autour de luy : « O Dieux,
« comment Minutius s'est allé precipiter luy mesme en
« sa ruine, plus tost que je n'attendoye, et plus tard qu'il
« ne vouloit ! » Mais en disant cela, il feit quand et
quand marcher les enseignes en diligence, criant tout
25 hault : « Mes amis, il nous fault haster pour aller secourir
« Minutius, qui est vaillant homme de sa personne, et
« aimant le bien et l'honneur de son païs : et si d'adven-
« ture il a failly en se precipitant par trop, pour cuider
« chasser les ennemis, il n'est pas maintenant temps de
30 « l'en accuser, nous le luy remonstrerons une autre

fois. » Si rompit incontinent à son arrivee et escarta les Numides, qui estoyent au guet emmy la campagne : puis tira oultre jusques à ceulx qui chargeoyent sur la queue des Romains, ou il en tua ceulx qui s'arrestèrent
5 pour luy faire teste : car les autres, de peur qu'ilz tum-
bassent eulx mesmes au danger ou ilz avoyent rengé les Romains, avant que d'estre de tout point enfermez, se tournerent en fuite. Parquoy Hannibal, voyant ceste mutation et regardant comme Fabius en personne, avec
10 plus grand effort que son aage ne portoit, alloit fendant la presse des combatans, contremont la motte, pour penetrer jusques au lieu ou estoit Minutius, fait cesser le combat, commandant que lon sonnast la retraite, et remena ses gens dedans son camp, estans les Romains
15 bien aises de se pouvoir aussi retirer à sauveté : et dit on que Hannibal, en se retirant, dit à ses amis un tel mot en riant : « Ne vous ay je pas dit plusieurs fois que
« ceste nuee que nous voyions tousjours attachee à la cyme
« des montagnes, se creveroit à la fin quelque jour, avec
20 « orage et tempeste qui tumberoyt sur nous ? »

XIII. Apres ceste rencontre, Fabius ayant despouillé ceulx qui estoyent demourez morts sur le champ, se retira aussi en son camp, sans se laisser eschapper de la bouche une seule parole oultrageuse ny fascheuse de son
25 compagnon. Mais Minutius, si tost qu'il fut de retour en son camp, assemblant ses gens, leur parla en ceste maniere : « Mes amis, ne faillir jamais en maniant de
« grands affaires, est chose qui surpasse la nature de
« l'homme : mais se servir des faultes passees pour ins-
30 « truction de l'advenir, est fait en hommes sages et ver-
« tueux. Quant à moy, je confesse n'avoir pas moins

14 D: ramena — 30: hommes sages, etc. [*même texte en A et en D*]

« d'occasion de me louer de la fortune, que de m'en
« plaindre : car ce que le long temps ne m'avoit peu
« enseigner, je l'ay appris en une bien petite partie d'un
« seul jour : c'est que je ne suis point suffisant pour
5 « commander, ains ay moy mesme besoiing d'estre regy
« et gouverné par autrui : et que je ne me doy point
« opiniastrer follement à cuider vaincre ceulx desquelz il
« m'est plus honorable confesser estre vaincu. Si vous
« declare que le dictateur Fabius sera celuy qui desormais
10 « vous commandera seul en toute autre chose : mais
« pour luy donner à entendre que nous recognoissons la
« grace qu'avons presentement receuë de luy, je seray
« celuy qui vous guideray à l'en aller remercier, en me
« rendant le premier obeïssant à ses commandemens, et
15 « faisant tout ce qu'il m'ordonnera. » Ayant achevé ces
paroles, il commanda aux portenseignes de le suyvre, et
luy marcha le premier devers le camp de Fabius, là ou
estant arrivé, il s'en alla droit à la tente du dictateur :
dequoy chascun s'emeveille, ne sachant ce qu'il vouloit
20 faire. Fabius luy sortit audevant. Et Minutius, lui ayant
mis ses enseignes à ses pieds, l'appella à haulte voix son
pere : et ses soudards appellerent semblablement ceulx de
Fabius leurs patrons, qui est le nom duquel les serfs
affranchiz appellent ceulx qui les ont delivrez de ser-
25 vitude. Puis quand le bruit fut appaisé, Minutius se prit
à dire hault et clair : « Seigneur dictateur, tu as ce jour-
« dhuy gaigné deux victoires, l'une sur Hannibal, que
« tu as vaincu par prouesse, et l'autre sur moy ton com-
« pagnon, que tu as vaincu par prudence et bonté : et
30 « par l'une tu nous as sauvez, par l'autre tu nous as
« enseignez : ainsi avons nous esté semblablement vaincus
« en deux sortes, l'une par luy à nostre honte, et l'autre
« par toy à nostre honneur et salut. Pourtant t'appelle je

« mon pere, ne trouvant autre appellation plus venérable, de laquelle je te puisse honorer, et me sentant plus obligé à toy, pour la grace que j'ay presentement receuë de toy, qu'à celuy mesme qui m'a engendré, 5
« à cause que j'ay esté seul engendré par luy, et ay esté
« sauvé par toy avec tant d'autres gens de bien qui sont
« icy. » En disant ces paroles, il embrassa Fabius : et le semblable feirent aussi les soudards qui s'entracollèrent
estroittement, et se baisèrent les uns les autres : de ma-
niere que tout le camp se trouva plein de caresses et de
larmes tresdoulces et espraintes à force de joye.

XIV. Depuis s'estant Fabius desmis du magistrat de la dictature, furent de rechef eleuz des consuls, les premiers desquelz suyvirent la mesme forme de gouverner que Fabius
15 avoit commencee, se gardans de presenter bataille à Hannibal, et envoyans tousjours du secours à leurs subjects et alliez pour les entretenir et les garder de se rebeller, jusques à ce que Terentius Varro, homme de petit lieu, mais bien cogneu pour son audace temeraire, et pour le credit qu'il
20 avoit acquis envers le peuple par ses flateries, fut parvenu à la dignité consulaire : car on pensa bien que par sa temerité et faulte d'experience il mettroit incontinent le tout au hazard d'une bataille, par ce qu'il crioit en toutes les assemblees du peuple que ceste guerre dure-
25 roit tousjours, tant que le peuple eliroit pour capitaines des Fabiens, et se vantoit publiquement, que des le premier jour qu'il verroit les ennemis, il les desferoit. En disant ces braves paroles, il assemblea une telle puissance, que jamais les Romains n'en avoyent eu de si grande
30 ensemble, contre quelque ennemy que ce fust : car il meit en un camp jusques au nombre de quatre vingts huit

8 A: s'entr' accollèrent — 11 A: espraintes — 28 A: il assemblea quand et quand une telle puissance

mille combatans : ce qui mettoit Fabius et les autres Romains qui voyent bon sens, en grande crainte, pour autant qu'ilz ne voyoyent point de ressource aux affaires de Rome, s'il advenoit qu'ilz perdiissent un si grand nombre de gens. Si s'adressa Fabius à l'autre consul, qui se nommoit Paulus Emilius, homme bien entendu au fait de la guerre, mais mal voulu de la commune, dont il redoubtoit encore la fureur, à raison de quelque amende en laquelle le peuple auparavant l'avoit condamné

10 envers la chose publique, « et en le reconfortant l'admo-
 « nosta et encouragea de resister à la folle temerité de son
 « compagnon, luy remonstrant comme il n'auroit pas plus
 « d'affaire contre Hannibal que contre Terentius Varro,
 « pour le salut de son pais, à cause que tous deux cher-
 15 « choient à combattre : l'un, pource qu'il n'entendoit pas en
 « quoy consistoit l'avantage de ses forces, et l'autre, pource
 « qu'il cognoissoit bien sa foiblesse. Mais il est plus rai-
 « sonnable que tu me croyes en ce qui concerne les affaires
 « de Hannibal, que Terentius Varro : et je t'assure que
 20 « si lon ne luy baille point moyen de combattre ceste annee,
 « qu'il est force forcee, ou qu'il se ruine de soy mesme
 « s'il demeure, ou qu'il s'en fouye honteusement avec son
 « armee, attendu que jusques icy, quoy qu'il semble estre
 « victorieux et maistre de la campagne, il n'y a encore eu
 25 « personne de ses ennemis qui se soit tourné de son costé,
 « et que de l'armee qu'il a amenee de son pais quand et
 « luy, il ne luy en est pas demouré aujourd'hui un tiers. »
 A ces remonstrances le consul respondit en ceste maniere,
 ainsi que lon dit : « Quand je considere l'estat de mes
 30 « affaires, seigneur Fabius, il me semble estre meilleur pour
 « moy de tumber mort entre les picques de noz ennemis,

22 A : qu'il sen fuye

« que retomber une autre fois entre les voix et suffrages
« de noz citoyens. Toutefois, puis que le bien de la chose
« publique requiert que lon face comme tu dis, je m'ef-
« forceray de me monstrier sage capitaine à toy seul,
5 « plus tost qu'à tous les autres ensemble qui me voul-
« dront tirer au contraire. » Ainsi se partit de Rome Paulus
en ceste intention : [XV.] mais Terentius, son compagnon,
voulut à toute force qu'ilz commandassent à toute l'armée
soverainement l'un apres l'autre, chascun son jour, et
10 s'alla camper tout au plus pres de Hannibal, au long de la
riviere d'Aufide, pres du bourg qui s'appelle Cannes. Et le
jour que ce fut à luy à commander à son tour, il feit mettre
hors de grand matin le signe de la bataille, qui estoit une
cotte d'armes teincte en escarlatte, que lon estendoit
15 dessus la tente du capitaine general, tellement que les
ennemis mesmes du commencement s'effroyerent de
veoir la hardiesse de ce nouveau capitaine, et le grand
nombre de combatans qu'il avoit en son ost à compari-
son d'eulx, qui n'estoyent pas de la moitié tant : toute-
20 fois Hannibal leur commanda qu'ilz s'armassent et se
teinssent prests pour la bataille : et ce pendant luy avec
peu de suite s'en alla à cheval monter sur une petite
butte, non gueres roide, de laquelle il pouvoit descou-
vrir evidemment tout le camp des Romains, et veit com-
25 ment ilz se reengeoyent desja en bataille. Et comme l'un
de ceulx qui estoyent en sa compagnie, homme de pareille
noblesse et condition que luy, nommé Giscon, dit que
le nombre des ennemis luy sembloit merueilleusement
grand à le veoir ainsi de loing, Hannibal se fronçant le
30 visage luy respondit : « Encore y a il une autre chose
« bien plus esmerveillable, de laquelle tu ne t'es point

« advisé, Giscon. » Giscon luy demanda incontinent :
« Et quelle ? » — « C'est, ditil, que de tout ce grand nombre
« de combatans que tu vois là, il n'y en a pas un qui
« s'appelle Giscon comme toy. » Ce mot de risée, dit au
5 contraire de ce que les assistens attendoyent, qui pen-
soyent bien que ce deust estre chose de consequence,
les fait rire à bon esciant : si descendirent de dessus la
butte tous rians, et racomptèrent à ceulx qu'ilz rencon-
trèrent par le chemin ceste sornette, de sorte que la risée
10 en alla incontinent de main à main en la pluspart du
camp, et ne se pouvoit pas Hannibal mesme estancher
de rire. Ce que voyans, les soudards Cartaginois en
prirent une grande assurance, faisans leur compte que
leur general ne se seroit pas ainsi mis à plaisanter et à
15 rire si pres du peril, s'il ne se fust senty de beaucoup
le plus fort, et qu'il n'eust bonne cause de mespriser les
ennemis.

XVI. Davantage en la bataille il usa de deux ruses de
capitaine bien advisé : la premiere fut, de l'assiette du
20 lieu, ou il renga ses gens en bataille, de sorte qu'ilz
avoient le vent au dos : car il tiroit un vent impetueux
et bruslant comme un estourbillon de foudre, lequel
enlevoit de la plaine, qui estoit de grande estendue
et sablonneuse, une poudre ardente comme feu, et la
25 passant par dessus le bataillon des Cartaginois, la jettoit
droit contre les yeux et les visages des Romains, par
telle violence qu'ilz estoient contraints de tourner les
visages en arriere, et troubler leurs rengs. La seconde
ruse fut la forme de laquelle il ordonna sa bataille :
30 car il meit deçà et delà aux deux ailes les meilleurs
combatans et les plus vaillans hommes qu'il eust en

tout son ost, et remplit le milieu des pires et des plus
inutiles qui y fussent, dont il feit comme une pointe,
laquelle se jettoit en avant, et passoit de beaucoup les
deux costez du front de sa bataille, ayant enjoint à
5 ceulx des ailes, que quand les Romains auroyent rompu
ce premier front, et qu'ilz poursuyvroient les reculans
en arriere, de façon que le milieu de sa bataille vien-
droit à s'enfoncer et à se courber en croissant, et que
les ennemis se trouveroyent au dedans, alors ilz se
10 ruassent d'un costé et d'autre sur eulx, et les chargeassent
incontinent par les flancs, et les envelopassent par der-
riere. Cela fut cause du plus grand meurtre : car quand
le milieu commença à reculer et à recevoir au dedans
les Romains, qui poursuyvoyent asprement, la bataille de
15 Hannibal changea de forme, et au lieu qu'elle estoit au
commencement en pointe, elle se trouva enfoncée au
milieu en figure de croissant : et adonc les capitaines
des bandes choisies qui estoient aux deux ailes, firent
tourner leurs gens, les uns à la main gauche, les autres
20 à la droite, et chargerent les Romains par les flancs et
par derriere ou ilz estoient nuds, et ainsi meirent en
pieces tous ceulx qui ne se peurent sauver de vistes-
se avant que d'estre enveloppez. Encore dit on qu'il advint
un autre inconvenient fortuit à la chevalerie romaine :
25 ce fut que le cheval du consul Paulus Æmilius, ayant esté
blecé, le porta par terre : à l'occasion dequoy ceulx qui
estoyent les plus prochains de luy, meirent incontinent
pied à terre pour le secourir : ce que voyans les autres
qui en estoient plus loing, imaginerent incontinent que
30 ce fust un commandement fait à tous generalement : à
l'occasion dequoy ilz descendirent de cheval, et comba-
tirent à pied. Quoy voyant Hannibal dit : « Je les aime
« mieulx ainsi, que s'ilz me les eussent livrez piedz et

« poings liez. » Mais quant à ces particularitez la, ceulx qui ont escrit les histoires au long, les exposent plus à plein. Au demourant, des deux consuls, Varro se sauva à cheval avec peu de suite de ses gens dedans la ville
 5 de Venouze, et Paulus en la foule et presse de ceste route, ayant le corps plein de traicts, qui estoyent demourer dedans ses playes, et le cueur aggravé d'un si angoisseux regret que de veoir la desconfiture de ses gens, estoit assis aupres d'une roche attendant que quelcun des
 10 ennemis vinst l'achever de tuer : mais pour la grande quantité de sang dont il avoit toute la teste et la face souillee, peu de gens le recognoissoient, de maniere que ses amis et ses serviteurs mesmes passoyent oultre sans le cognoistre, et n'y eut qu'un jeune homme de maison noble et patri-
 15 ciene, nommé Cornelius Lentulus, qui l'ayant apperceu, se meit en devoir de le sauver : car il se jetta incontinent à pied, et luy amena son cheval, le priant de vouloir monter dessus, pour essayer de se reserver à la necessité de son païs, qui avoit plus grand besoing que jamais
 20 d'un bon et sage capitaine : mais il refusa l'offre et la priere du jeune gentilhomme, et le contraignit de remonter à cheval, quoy qu'il en plorast de pitié, et s'estant soulevé pour luy toucher en la main luy dit : « Tu
 « diras de ma part à Fabius Maximus, et luy tesmoi-
 25 « gneras comme Paulus Æmilius a tousjours observé et
 « suyvy son conseil jusques au bout, et n'a jamais rien
 « transgressé de ce qu'il luy avoit accordé : mais qu'il a
 « esté forcé par Varro premierement, et puis apres par
 « Hannibal. » Ayant dit ces paroles, il donna congé à
 30 Lentulus, et se rejecta en la presse de ceulx que lon tuoit, là ou il mourut. On tient qu'il fut tué en ceste bataille

1 A : quant à ses — 11 D : du sang — 14 D : noble patri-
 cienne

cinquante mille Romains, et en fut pris de prisonniers quatre mille, et dix autres mille qui depuis la bataille furent pris es deux camps.

XVII. Ceste belle victoire gaignee, les amis de Hannibal luy conseilloyent qu'il suyvist sa fortune, et qu'il entreroit pesle mesle quand et les fuyans dedans la ville de Rome, tellement que à cinq jours de là il pourroit soupper dedans le Capitole. Il n'est pas aisé à dire quelle raison l'en destourna, sinon que je pense, plus tost
10 qu'autrement, que ce fut quelque bonne fortune, ou quelque Dieu favorable à l'empire Romain, qui se meit au devant, et qui le feit avoir peur et reculer à le faire. A l'occasion dequoy lon dit qu'un Cartaginois, nommé Barca, luy dit en cholere : « Hannibal, tu sçais bien
15 « vaincre, mais tu ne sçais pas user de la victoire. » Toutefois ceste victoire luy apporta une mutation si grande, qu'au lieu qu'il n'avoit pas au paravant une seule ville, une seule estappe, ny un seul port en Italie, et qu'il avoit grande difficulté et grande peine à nourrir son
20 armee de ce qu'il pouvoit ravir et desrober à la journee, n'ayant pas une retraite asseuree, ny aucun lieu certain sur quoy il peust fonder l'esperance de l'entretienement de ceste guerre, ains allant ça et là errant et tenant les champs avec son armee, comme avec une grosse troupe
25 de brigands et de larrons, alors il receut en son obeissance presque toute l'Italie : car la plus part des plus grandes et plus puissantes nations d'icelle se rendirent incontinent à luy : et la cité de Capoue, qui estoit la plus grosse qui y fust, apres celle de Rome, se tourna de son
30 costé. Ainsi peut on clairement veoir par ce bel exemple que c'est un grand mal d'avoir à esprouver la sagesse d'un

31 A : d'un bon capitaine

capitaine, et non pas seulement la feaulté d'un amy, ainsi que dit le poëte Euripides : car ce que paravant on appelloit couardise et froideur en Fabius, incontinent apres la bataille fut estimé, non point discours de sens
5 humain, ains plus tost de quelque celeste et divin entendement, qui preveoit les choses à advenir de si loing, qu'elles ne sembloient pas croyables à ceulx mesmes qui les enduroient. Au moyen dequoy Rome tout aussi tost rejeta le demourant de son esperance sur luy, et recourut
10 à son conseil ne plus ne moins qu'à la sauvegarde d'un temple ou d'un autel, de sorte que la premiere et principale cause de faire demourer le peuple ensemble, sans s'escarter ça et là, comme il feit du temps que Rome fut prise par les Gaulois, fut l'opinion et confiance que
15 lon eut en sa prudence. Car au lieu que paravant il sembloit couard et deffiant, lors qu'il n'estoit point encore arrivé de dangereux inconvenient, à l'heure que chascun se plongeoit en pleur et en dueil infiny qui ne servoit de rien, et que tout le monde estoit si troublé, qu'on ne
20 donnoit ordre à chose quelconque, luy seul au contraire alloit par la ville d'un pas moderé, avec un visage constant et asseuré, saluant courtoisement un chascun, ostant les cris et lamentations feminines, et defendant les assemblees des convois, qui se font pour lamenter publique-
25 ment un trespasé à son enterrement. Et au contraire il suada à ceulx du senat de s'assembler en conseil, donna courage à ceulx qui estoient en magistrat, estant luy mesme toute leur force et toute leur vertu, pource qu'il n'y avoit homme ayant charge publique, qui ne jettast ses
30 yeux sur luy, pour sçavoir ce qu'il avoit à faire.

XVIII. Si feit mettre aux portes de la ville des gardes

6 D : les choses à venir

pour empescher de sortir ceulx qui s'en voudroyent fouir et abandonner Rome : et davantage limita le temps et le lieu du dueil, ordonnant que qui le voudroit faire, le feist en son privé dedans sa maison, et durant l'espace de
5 trente jours seulement, apres lesquelz il falloit que tout dueil cessast, à fin que la ville fust pure et nette de toutes telles choses. Et estant la feste de Ceres escheute environ ces jours la, il luy sembla qu'il valloit mieulx omettre du tout les sacrifices et la procession que lon
10 avoit accoustumé de faire à tel jour, que de donner à cognoistre par le petit nombre et la tristesse de ceulx qui y assisteroyent, la grandeur de la perte qu'ilz avoyent faite, pource que les Dieux prennent plaisir à estre servis joyeusement par ceulx qui sont en prosperité. Ce neant-
15 moins tout ce que les devins ordonnerent estre fait pour pacifier l'ire des Dieux, ou pour divertir les menaces des sinistres prodiges, fut fait : car on envoya à l'oracle d'Apollo, en la ville de Delphes, un parent de Fabius, que lon surnommoit Pictor : et ayans esté deux reli-
20 gieuses Vestales corumpues, l'une fut enterree toute vive, selon la loy et la coustume, et l'autre se fait mourir elle mesme. Mais bien fait en cest endroit à admirer la grandeur de courage et magnanime clemence des Romains, en ce que retournant le consul Varro de la desconfiture
25 le plus malheureusement et le plus honteusement qu'homme en eust sceu retourner, et en estant luy mesme si honteux et si desplaisant, qu'il n'ozoit pas lever la teste, le senat toutefois luy alla encore au devant jusques à la porte de la ville, avec tout le peuple entierement,
30 et le receurent honorablement. Qui plus est, ceulx qui estoient en magistrat, et les principaux du senat, entre

19 A: aiant esté



lesquelz estoit Fabius, quand on eut fait silence, le louèrent de ce qu'il n'avoit point desespéré du salut de la chose publique, apres une calamité si grande, ains estoit retourné en la ville pour donner ordre aux affaires, 5 et user de l'autorité des loix et du service de ses citoyens, comme ayans encore moyen de se sauver et ressourdre.

XIX. Mais quand ilz entendirent que Hannibal apres la bataille s'estoit tourné vers les autres contrees de 10 l'Italie, alors ilz reprirent courage, et envoyerent des capitaines et des armées aux champs, entre lesquelz les deux principaux furent Fabius Maximus et Claudius Marcellus, qui par voyes presque du tout contraires avoyent acquis louange egale et reputation pareille : pource que 15 Marcellus, ainsi que nous avons escrit en sa vie, estoit homme qui executoit vivement, comme celuy qui estoit prompt à la main, hardy de nature, et proprement tel que ceulx que Homere appelle martiaux et belliqueux, pour se hazarder et adventurer hardiment à tout danger : 20 au moyen dequoy, ayant affaire à un autre capitaine hardy et aventureux aussi, il s'attachoit à tout propos de pareille audace en toutes rencontres à luy. Mais au contraire, Fabius perseverant tousjours en son premier advis esperoit que qui ne combatroit ny ne harasseroit point 25 Hannibal, il se ruineroit et se desferoit de soy mesme, et que son armée se mineroit d'elle mesme à force de guerroyer continuellement, ne plus ne moins que le corps d'un champion de lucte, qui pour avoir fait trop d'efforts se trouve cassé et rompu. Pourtant escrit Posidonius que 30 l'un fut appellé l'espee, et l'autre le bouclier des Romains, et que la fermeté et constance de Fabius à faire la guerre

7 A et D : resourdre — 19 D : pour se hazarder hardiment à tout danger

seurement, sans commettre rien à la fortune, meslee avec la vehemence de Marcellus, fut ce qui preserva l'empire de Rome : car Hannibal rencontrant à toutes heurtes en son chemin l'un qui estoit impetueux comme un torrent, trouvoit que son armee en estoit toute esbranlee, froisee et harassee : et l'autre, qui estoit comme une petite riviere qui luy couloit tout doucement par dessous, sans faire bruit, mais continuellement l'alloit minant et consumant petit à petit, jusques à ce que finalement il se trouva reduit à telz termes, qu'il estoit las de combattre contre Marcellus, et si redoubtoit Fabius, qui ne combattoit point : pource que pendant tout le temps que dura ceste guerre, il eut presque tousjours en teste ces deux capitaines estans præteurs ou consuls ou proconsuls : car l'un et l'autre fut par cinq fois eleu consul. Et quant à Marcellus, il luy dressa une embusche en son cinquieme consulat, ou il le surprit et tua. Mais quant à Fabius, il le tenta et le sonda bien par plusieurs fois, et par toutes sortes d'eschoguettes, de ruzes et d'embusches ; mais il ne luy sceut jamais rien faire, sinon qu'une fois qu'il l'avoit ja esbranlé, il luy cuida faire donner dedans les filez : car il avoit contrefait des lettres missives, comme si les principaux de la ville de Metapon luy eussent escrit qu'il s'en vinst celle part, et qu'ilz luy livreroient la ville entre ses mains, et que ceulx qui estoient de l'intelligence n'attendoient autre chose, sinon qu'il s'approchast de là. Ces lettres emeurent un peu Fabius, de sorte qu'il avoit ja resolu de prendre une nuit partie de son armee, et s'y en aller : mais pource que les signes des oiseaux ne luy en promettoient point bonne issue, il s'en deporta : et tantost apres il descouvrit que

19 D : par toutes sortes d'aguets

c'estoyent lettres que Hannibal avoit finement contre-faittes pour le surprendre, et que luy mesme en personne s'estoit embusché pres de la ville pour l'attendre : mais cela se doit à l'aventure attribuer à la grace des Dieux, 5 qui le voulurent preserver.

XX. Au demourant, quant aux rebellions des villes sujettes et soulevemens des peuples alliez, Fabius estoit d'opinion qu'il valloit mieulx les contenir par doulx et humain traitement, de maniere qu'ilz eussent honte de 10 se remuer sans occasion, que d'aller severement rechercher toutes suspicions, ny se porter trop aigrement envers ceulx qui seroyent aucunement soupçonnez. Auquel propos on racompte qu'il y avoit en son ost un soudard Marsien de nation, vaillant homme de sa per- 15 sonne, et d'aussi noble maison qu'il y en eust entre tous les alliez, lequel avoit tenu quelques paroles avec d'autres soudards de s'en aller rendre aux ennemis : Fabius qui en sentit le vent, ne luy fait point pire chere pour cela, ains l'appellant à soy, luy dit, « qu'il confessoit que lon 20 « n'avoit pas tenu tel compte de luy comme il meri-
« toit : dequoy, dit il, pour le present je blasme les par-
« ticuliers capitaines qui vont ainsi distribuans les
« appointemens et honneurs par grace et par faveur,
« non pas par merite : mais cy apres je t'en donneray le
25 « tort à toy mesme, si tu ne parles quelquefois à moy
« et ne me dis priveement tes necessitez, quand tu aura,
« besoing de quelque chose. » Luy ayant dit ces paroles, il luy donna un cheval de service pour la guerre, et l'honora d'autres pris d'honneur dont on a accoustumé 30 de recompenser les gens de bien : ce qui fait que le sou-

10 D : rechercher — 12 D : soupçonnez — 17 D : soldats — 22 A : distribuant — 28 A : il luy donna quand et quand un cheval — 30 D : soldat [*et sic plus bas*]

dard depuis ce jour la devint tresfidele et tresaffec-
tionné au service des Romains. Car il estoit bien advis à
Fabius qu'il n'y avoit raison quelconque que les veneurs,
escuyers et autres qui se meslent de dompter les bestes
5 irraisonnables, leur ostassent la fierté sauvage et farouche
qu'elles ont de nature, par diligence, accoustumance et
soing de leur nourriture, plus tost que par les battre à
coups de fouet, ny les tenir empestrees : et que celuy qui
prend à gouverner des hommes, n'usast plus de patience,
10 de douceur et de clemence, que de rudesse pour les cor-
riger, et qu'il les traittast plus rudement et plus dure-
ment que les laboureurs ne font les figuiers, oliviers et
pommiers sauvages, lesquelz ilz apprivoisent et addoul-
cissent si bien qu'ilz en font à la fin de bons figuiers,
15 bons oliviers et bons pommiers. Une autre fois quelques
particuliers capitaines luy rapportèrent qu'il y avoit un
de leurs souldards qui s'escartoit souvent du camp et
s'esloignoit de son enseigne : il leur demanda quel homme
il estoit au demourant : ilz luy respondirent tous unanime-
20 ment que c'estoit un fort bon homme de guerre, et que lon
faudroit bien à en trouver un pareil en toutes leurs bendes,
et quand et quand luy reciterent quelques prouesses
notables, et quelques preuves de sa personne que ilz
luy avoyent veu faire. Parquoy Fabius feit soigneusement
25 enquerir quelle estoit la cause qui le faisoit ainsi souvent
sortir hors du camp, et trouva qu'il estoit amoureux d'une
jeune femme, et que pour l'aller voir il s'escartoit à tous
coups de son enseigne, et mettoit sa vie en grand danger,
pource qu'il y avoit assez loing : cela entendu, il y envoya
30 quelques gens, sans que le souldard en sceust rien, et la
feit prendre et cacher dedans sa tente, puis appella le
souldard qui estoit Lucanien de nation, et le retirant à

32 D : et le tirant à part

U. G. P.

part, luy dit : « J'ai bien sceu comme tu as couché plu-
« sieurs nuicts hors du camp, contre les loix èt ordon-
« nances militaires des Romains : mais aussi ay-je bien
« entendu que tu es homme de bien au demourant :
5 « pourtant te pardonne-je les fautes passees, en conside-
« ration de tes bons services : mais doresnavant je te veux
« donner en garde à un autre qui me rendra compte de
« toy. » Le soudard se trouva bien estonné quand il
entendit ces paroles. Et Fabius faisant sortir son amie,
10 la luy meit entre ses mains, en luy disant : « Ceste cy
« me respondra que cy apres tu demoureras au camp
« avec nous : et au reste, ce sera à toy à nous faire
« cognoistre par effect que ce n'estoit point pour autre
« cause meschante que tu te desrobois, en te servant de
15 « l'amour de ceste cy pour une couverture. » Voila ce
que lon treuve par escript quant à ce propos.

XXI. Au demourant, Fabius regaigna en ceste maniere
et remeit en l'obeissance des Romains la ville de Tarente,
qui leur avoit esté emblee par trahison : il y avoit en son
20 camp un jeune homme Tarentin, qui avoit dedans la ville
une sœur, laquelle luy estoit fort fidele et l'aimoit cor-
dialement : or estoit amoureux d'elle un capitaine Bru-
tien de nation, l'un de ceulx à qui Hannibal avoit com-
mis la garde de la ville : cela donna esperance et moyen
25 au jeune homme Tarentin de conduire à chef son entre-
prise, laquelle il communiqua à Fabius, et de son consen-
tement s'en fouit et s'alla rendre dedans Tarente, don-
nant à entendre qu'il se vouloit de tout poinct retirer au-
pres de sa sœur. Et pour les premiers jours qu'il y fut,
30 le capitaine Brutien coucha tout seul à part, à la requeste
de la fille, qui pensoit que son frere ne sceust rien de

son fait : mais au bout de quelques jours, le jeune homme la tira à l'escart, et luy dit : « Ma sœur, il estoit
« grand bruit jusques au camp des Romains que l'un des
« principaulx hommes de ceste garnison t'entretenoit ; je
5 « te prie, dis moy qui il est : car pourveu qu'il soit gen-
« til compagnon, et aussi homme de bien de sa personne
« comme lon dit, la guerre qui confond toutes choses,
« fait qu'il ne peut chaloir de quel lieu il soit, et n'y a
« rien de deshonesté en ce que lon fait par force : c'est
10 « un grand heur en temps ou le droit et la raison n'ont
« point de lieu, à tout le moins de se rencontrer entre
« les mains d'un doulx et gracieux seigneur. » La sœur,
ayant ouy ces paroles de son frere, envoya querir le capi-
taine Brutien, et luy fait cognoistre son frere, lequel se
15 meit incontinent à luy faciliter la jouissance de ses
amours, et à luy rendre sa sœur encore plus traittable et
plus amoureuse qu'elle ne l'estoit au paravant : au moyen
dequoy le capitaine aussi commença à prendre asseu-
rance de luy, de maniere qu'il fut desormais facile au
20 jeune Tarentin de gaigner et faire tourner la voulunté de
cest homme amoureux et mercenaire, soubz l'esperance
de grands presents qu'on luy promettoit, et que Fabius luy
devoit faire. Ainsi l'escrit la plus grande partie des histo-
riens : toutefois il y en a qui escrivent que la femme qui
25 gaigna le capitaine Brutien n'estoit point Tarentine, ains
estoit Brutiene, de laquelle (ce disent ilz) Fabius se ser-
voit pour concubine : et qu'elle ayant sceu que le capi-
taine des Brutiens qui estoient en garnison dedans
Tarente, estoit aussi Brutien et de son propre païs, en
30 parla à Fabius, du consentement duquel elle s'approchant
des murailles de la ville parla à luy, et fait si bien qu'elle
le gaigna.

XXII. Mais pendant que ceste trame s'ourdissoit,

Fabius, voulant distraire et escarter Hannibal de ce quartier la, escrivit aux gens de guerre qui estoient pour les Romains dedans la ville de Rege, qu'ilz courussent le païs des Brutiens, et qu'ilz allassent mettre le siege devant la
5 ville de Caulonie pour la raser et destruire : car ilz estoient bien jusques au nombre de huit mille hommes, la plus part traistres, estans passez d'un camp à l'autre, et les plus inutiles de ceulx qui ayans esté notez d'infamie pour leurs mauvais deportemens, avoyent illec esté
10 transportez de la Sicile par Marcellus, de sorte qu'en les perdant, la chose publique ne faisoit pas grande perte, ny n'estoit pas pour en avoir grand regret. Si pensa Fabius que les exposant en proye à Hannibal, comme un
15 appast pour le tirer arriere de ce quartier la, il le divertiroit des environs de Tarente : comme il advint : car incontinent Hannibal se coula celle part avec son armee pour les attrapper ; et ce pendant Fabius alla mettre le siege devant Tarente, là ou six jours apres qu'il y fut arrivé, le jeune homme qui avoit avec sa sœur conduit
20 la trame du capitaine Brutien, s'en vint une nuit devers luy, apres avoir bien noté et remarqué l'endroit de la muraille que le Brutien avoit à garder, lequel avoit promis de se faindre et de laisser entrer ceulx qui viendroyent assaillir ce costé la. Toutefois Fabius ne voulut
25 pas du tout fonder l'esperance de ceste execution sur la trahison du Brutien : il est bien vray qu'il alla luy mesme en personne se presenter devant cest endroit la, mais ce fut sans rien attenter pour un temps : et ce pendant il fait donner l'assault vivement à tous les autres
30 costez de la ville, tant par mer que par terre, avec grands cris et grand bruit, jusques à ce que le capitaine Brutien,

voyant que tous ceux de la ville et de la garnison cou-
royent la part ou ilz entendoient le bruit si grand, feit
signe à Fabius qu'il estoit temps : lequel adonc feit
apporter force eschelles, par ou il monta avec sa troupe
5 sur les murailles, et ainsi se saisit de la ville. Mais il
semble qu'en cest endroit il se laissa vaincre à l'ambition :
car il commanda que lon tuast les Brutiens les premiers,
à fin que lon ne sceust point qu'il avoit emporté la ville
par trahison : en quoy il se trompa, car non seulement
10 il n'en rapporta pas la gloire qu'il en esperoit, ains y
acquit le blasme de desloyauté et de cruauté. Il mourut
aussi en ceste prise grand nombre des Tarentins, et si en
fut encore vendu trente mille cheffz, toute la ville sac-
cagée, et du pillage furent portez aux coffres de l'espargne
15 publique à Rome^a trois mille talents. Lon dit qu'ainsi
comme lon pilloit et emportoit tout l'autre butin, le
greffier qui en tenoit le registre demanda à Fabius
qu'il vouloit que lon feist des Dieux, entendant les ta-
bleaux et les images d'iceulx, et que Fabius luy respondit :
20 « Laissons aux Tarentins leurs Dieux courroucez à eulx. »
Toutefois il feit transporter à Rome la statue de Hercules,
d'excessive grandeur, qui estoit à Tarente, et la feit
poser au Capitole, joignant laquelle il feit aussi dresser
son image de bronze estant à cheval : en quoy il se mons-
25 tra de beaucoup plus violent que Marcellus, ou, pour
mieux dire, il feit cognoistre au monde combien l'humani-
té, clemence et bonté de Marcellus estoit admirable,
ainsi comme nous avons escrit en sa vie.

XXIII. Hannibal, ayant entendu la nouvelle de ce
30 siege, s'estoit mis en chemin pour venir en diligence
secourir Tarente, et dit on qu'il ne faillit à y arriver à

a. Un million et huit cens mille escus.

temps que d'environ deux lieues et demie : et quand il sceut au vray qu'elle estoit prise, il dit tout hault en public : « Les Romains ont donques aussi leur Hannibal, « car nous avons perdu Tarente tout en la mesme sorte
5 « que nous l'avions gaignee. » Mais puis apres quand il fut retiré en son privé, ce fut la premiere fois qu'il dit entre ses familiers que de longue main il avoit bien preveu qu'il leur seroit difficile, mais lors qu'il cognoissoit evidemment qu'il leur estoit du tout impossible de tenir
10 l'Italie avec les forces qu'ilz avoyent. Fabius entra dedans Rome en triumphe pour la seconde fois à cause de ceste prise, et fut son second triumphe plus magnifique que son premier, comme d'un vaillant champion de lutte qui souvent faisoit teste à Hannibal, et qui se desmesloit
15 aiseement de toutes ses ruzes, ne plus ne moins que des prises et accrochemens de lutte qui n'avoyent plus la mesme force ny roideur qu'elles souloyent au paravant avoir, à cause que son armee estoit en partie effeminee pour les delices et les richesses qu'elle avoit amassees, et
20 en partie aussi recreuë et diminuee par les continuelles secousses et rencontres qu'elle avoit endurees. Or y avoit il un Romain nommé Marcus Livius, qui avoit esté gouverneur de Tarente lors que Hannibal l'avoit prise, et neantmoins avoit retenu le chasteau, et l'avoit gardé jus-
25 ques à ce que la ville retourna une autre fois en la puissance des Romains : il fut marry de voir tant d'honneur que lon faisoit à Fabius, de sorte qu'un jour en plein senat, estant transporté d'ambition et d'envie, il ne se peut tenir de dire que c'estoit luy et non pas Fabius
30 qui estoit cause de la prise de Tarente. Fabius s'en prit à rire, et luy respondit sur le champ : « Tu as dit la verité; « car si tu ne l'eusses point perdue, je ne l'eusse point reprise. »

XXIV. Mais les Romains honorèrent grandement Fabius en toutes autres choses, et mesmement en ce qu'ilz eleurent son filz consul, lequel estant ja entré en possession de son magistrat, ainsi comme il despeschoit
5 quelques affaires touchant le faict de la guerre, son pere, fust ou pour la debilité de sa vieillesse, ou pource qu'il voulust esprouver son filz, monta à cheval pour aller devers luy, et passa à travers la presse des gens qui estoyent autour de luy et qui avoyent affaire à luy : mais
10 le jeune homme l'ayant advisé de loing, ne le voulut pas supporter, ains luy envoya un officier luy faire commandement de descendre de cheval, et de venir à pied, si d'aventure il avoit aucune chose à faire au consul. Ce commandement despleut à tous les assistans, qui jetterent
15 incontinent leurs yeux sans dire mot sur Fabius, comme estimans que lon faisoit tort à sa grandeur ; mais luy descendit incontinent à pied, et s'en alla plus viste que le pas, embrasser et caresser son filz, en luy disant : « Tu
« as raison, mon filz, et fais tresbien de monstrier que tu
20 « sçais à qui tu commandes, et que tu cognois la grandeur de l'autorité consulaire que tu as receuë. C'est
« le vray moyen par lequel nous et noz ancestres avons
« augmenté l'empire de ceste cité, en ayant tousjours plus
« cher le bien et l'honneur de nostre païs que pere ne
25 « mere ny enfans. » Aussi à la verité dit on que le bisayeul de Fabius, le plus grand et le plus honoré personnage qui fust en Rome de son temps, comme celuy qui avoit esté consul par cinq fois, et qui avoit eu plusieurs triumphes, à raison de plusieurs grandes et glorieuses victoires qu'il avoit gaignees, voulut bien depuis
30 estre encore lieutenant de son filz et aller soubz luy à la guerre quand il fut eleu consul : et finalement retour-

nant son filz victorieux en la ville sur un chariot de triumphe, tiré par quatre chevaux, il le suyvit à cheval parmy la troupe des autres, faisant gloire de ce qu'ayant par droit d'autorité paternelle domination sur son filz, 5 et qu'estant le plus grand homme de ses citoyens, et pour tel tenu et réputé, neantmoins il se soubmettoit volontairement à la loy et au magistrat qui avoit l'autorité d'icelle : toutefois ce personnage la avoit bien d'autres vertus qui le rendoyent d'ailleurs admirable. 10 Mais il advint que ce filz de Fabius mourut avant luy, la mort duquel il supporta modereement, comme personne sage et comme bon pere : car estant la coustume qu'à la mort des personnages illustres, leurs plus proches parents feissent une funebre harengue à leur louange, au 15 convoy de leurs obseques, il feit luy mesme l'oraison à l'honneur de son filz, et la prononcea luy mesme publiquement sur la place, et, qui plus est, la redigea pairescript et la publia.

XXV. Environ ce temps Cornelius Scipion fut envoyé 20 en Espagne, dont il dechassa les Cartaginois, apres les avoir desfaits en plusieurs batailles, et y avoir conquis plusieurs grosses villes, et mis en grande reputation les affaires des Romains, dont il fut à son retour autant ou plus honoré, aimé et estimé que nul autre qui fust en 25 la ville. Au moyen dequoy, ayant esté eleu consul, il considera que le peuple romain attendoit et exigeoit de luy quelque chose plus grande que des autres : si pensa que de s'attacher à combatre Hannibal au dedans de l'Italie seroit trop fait à la vieille mode, et sen- 30 tiroit trop son vieillard, et pourtant resolut incontinent en soy mesme de faire voir les armes Romaines en

Afrique, et aller piller le païs jusques aux portes de Car-
tage mesme, en transferant la guerre de l'Italie en Libye,
s'efforçant de tout son pouvoir de le mettre en teste au
peuple, et le luy faire trouver bon. Mais Fabius au con-
5 traire se persuadant que ce qu'entreprenoit ce jeune
homme mal advisé, fust aller precipiter la chose pu-
blique en un extreme danger, s'estudia de mettre Rome
en la plus grande frayeur qu'il luy fut possible, sans y
espargner ne parole ne faict, qu'il pensast pouvoir servir
10 à destourner le peuple de ceste volunté : et sceut si bien
dire et faire, qu'il avoit tiré le senat à son opinion : mais
le peuple estima que c'estoit l'envie qu'il portoit à la
gloire de Scipion, qui luy faisoit procurer tout cela, pour
arrester le cours de sa bonne fortune, de peur que si
15 d'aventure il venoit à faire quelque grand et memorable
exploit, comme d'esteindre de tout point ceste guerre,
ou de chasser Hannibal hors de l'Italie, il ne semblast
que luy se fust porté trop laschement et trop mollement
d'avoir fait trainner ceste guerre si longuement. Quant à
20 moy, je cuide bien que ce qui meut Fabius du commen-
cement à luy contredire, ne fut autre chose que le soing
du salut de la chose publique, pour le grand danger qu'il y
avoit en telle resolution : mais aussi pense-je que depuis
il passa oultre le devoir, et s'acheurta trop opiniastrement,
25 fust ou par ambition, ou par obstination, à vouloir em-
pescher l'accroissement de Scipion, attendu mesmement
qu'il feit tout ce qu'il peut, pour persuader à Crassus,
compagnon de Scipion au consulat, qu'il ne luy cedast
ny ne luy quittast point la conduite de l'armee, ains si
30 bon luy sembloit de passer en Afrique pour aller faire la
guerre aux Cartaginois, qu'il y allast plus tost luy mesme,

et, qui plus est, empescha que lon ne luy delivrast argent pour ceste guerre. Au moyen dequoy Scipion estant contraint de s'en prouvoir d'ailleurs sur son credit, en amassa es villes de la Thoscane, lesquelles, pour l'amour
5 qu'elles luy portoyent, contribuerent à son entreprise, et demoura Crassus en la maison, tant pource qu'il estoit homme doulx et non ambitieux ny contentieux de sa nature, comme aussi pource qu'il tenoit la prelatu-
re du souverain pontife, qui par la loy de leur religion est
10 contraint de demourer en la ville.

XXVI. Parquoy Fabius, voyant qu'il ne faisoit rien par ce chemin la, alla de rechef par un autre à l'encontre de Scipion, taschant à retenir et arrester les jeunes hommes qui desiroient aller à ce voyage avec luy : car il
15 crioit ordinairement en toutes les assemblees du senat et du peuple, qu'il ne suffisoit pas à Scipion de fourir Hannibal, mais qu'il emmenoit encore quand et luy ce qui restoit de forces en Italie, abusant la jeunesse de vaine esperance, et persuadant aux jeunes gens d'abandonner
20 leurs femmes, leurs peres et meres et leur pais, lors que l'ennemy qui tousjours avoit esté victorieux, et non jamais vaincu, estoit à leurs portes. Ces paroles de Fabius donnerent si grande crainte aux Romains qu'ilz ordonnerent que Scipion se serviroit donques en son entreprise
25 de l'armee qui estoit en la Sicile seulement, excepté qu'il pourroit mener d'avantage trois cents hommes, qui l'avoient bien et fidelement servy en la guerre d'Espagne. Ainsi sembla il que jusques icy Fabius feist et dist toutes ces choses suyvant sa coustume et l'humeur de sa nature.
30 Mais au demourant, Scipion ne fut pas plus tost passé en Afrique, que lon entendit incontinent à Rome des exploits admirables et des effects grands et glorieux à merveilles,

32 A: à merveilles, et quand et quand grande quantité

joint une grande quantité de despoilles et de butin, qui tesmoignoît les nouvelles estre vrayes, le roy des Numides prisonnier, deux camps des ennemis arz et bruslez tout en un mesme temps, avec perte d'un grand nombre de
5 gens, de harnois et de chevaux qui furent consummez dedans, force lettres et messagers expres que lon envoyoit de Cartage à Hannibal pour le rappeler, et le prier de ne s'arrester plus à poursuyvre une esperance vaine qui ne viendroît jamais à fin, ains s'en revenir au plus tost que
10 faire pourroit, secourir son païs. Pour lesquelles prospectez estant Scipion si fort estimé et renommé dedans Rome, que lon ne parloit que de luy, Fabius neantmoins requit encore, et fut d'advis que lon luy envoyast un succe-
5 seur, sans alleguer autre cause ny raison, sinon un commun dire, « Qu'il n'estoit pas seur de commettre tant
« et de si grandes choses à la fortune d'un seul homme,
« pource qu'il est bien malaisé qu'un mesme personnage
« soit en tout et par tout heureux. » Ces langages
adonc despleurent si fort au peuple, que lon l'en estima
20 homme importun, fascheux et envieux, ou que pour sa vieillesse il estoit devenu couard, et avoit perdu toute vigueur de courage, redoubtant Hannibal trop plus effroye-
ment qu'il ne devoit : car encore alors qu'il eut esté con-
traint d'abandonner l'Italie, et s'en retourner en Afrique,
25 il ne permettoit pas que la joye et l'asseurance que le peuple en prenoit, fust entiere et nette de toute crainte et de toute deffiance, ains alloit disant que c'estoit adonc
que les affaires estoyent en plus grand danger, et que la chose publique couroit plus grande fortune que jamais,
30 pource que Hannibal estant de retour en Afrique devant les murailles de Cartage mesme, seroit bien plus rude à

soustenir qu'il n'avoit onques esté, et que Scipion y rencontreroit une armee encore toute chaude du sang de tant de præteurs, dictateurs et consuls romains, qu'elle avoit desfaits en Italie : de maniere que par telz langages, la
5 ville se trouva encore de rechef toute troublee, et combien que la guerre fust transferee de l'Italie en Afrique, estima neantmoins l'occasion de craindre estre plus prochaine de Rome que jamais.

XXVII. Mais peu de temps apres, ayant Scipion desfait
10 Hannibal en bataille rengee, abbatu et mis soubz ses piedz la gloire et l'orgueil de Cartage, donna à ses citoyens une joye plus grande qu'ilz n'avoient onques esperee : et en ce faisant redressa et assura l'empire Romain, qui peu devant avoit esté en grand branle. Toutefois la vie de
15 Fabius ne s'estendit pas jusques à la fin de ceste guerre, et n'entendit onques de son vivant la nouvelle de la routte de Hannibal, ny ne veit onques celle grande et asseuree prosperité de son pais : car environ le temps que Hannibal se partit de l'Italie, il tumba en une maladie dont il
20 mourut. Or trouve lon par les histoires que les Thebains ensevelirent Epaminondas aux despens du public, pource qu'il mourut en si grande pauvreté, que quand il fut mort lon ne trouva rien qui soit en sa maison, sinon une petite broche de fer : mais les Romains n'inhumerent pas
25 Fabius aux despens de la chose publique, ains contribuerent à ses funerailles pour teste la moindre piece de monnoye qui eust cours alors, non pource qu'il eust faulte de biens pour se faire inhumer, mais seulement pour honorer sa memoire, en faisant ses obseques à leurs
30 despens, comme de leur pere commun. Ainsi eut il à sa mort honneur convenable à la vertu de sa vie.

LA COMPARAISON DE PERICLES AVEC FABIVS

I. Voila donques ce que lon treuve par escript de ces deux grands personnages. Et comme ainsi soit qu'ilz ayent laissé l'un et l'autre plusieurs beaux exemples de vertu, tant en faict de guerre qu'en matiere de gouverne-
5 ment, commençons à les conferer ensemble. Premiere-
ment Pericles vint au manienent des affaires de sa chose publique, lors que le peuple Athenien estoit au comble de sa prosperité, et en la fleur de sa puissance, et richness plus grande que jamais n'avoit esté auparavant, ny ne fut
10 onques depuis. Ce qui pourroit sembler avoir esté cause de le maintenir sur ses piedz en seureté perpetuelle, sans jamais succumber, non tant pour sa valeur que pour la puissance et prosperité publique : la ou, au contraire, les actes de Fabius se rencontrerent aux plus malheureux et
15 plus deshonorez temps de son pais, esquels il ne mainteint pas sa ville en ses biens sans dechoir, ains la tirant d'un trescalamiteux estat ou il la trouva, la rendit en un meilleur. Davantage les heureux exploits de Cimon, les victoires et trophées de Myronides et de Leocrates, et plu-
20 sieurs beaux et grands faicts d'armes de Tolmides, donnerent moyen à Pericles de tenir sa ville en festes et en

11 D : de la maintenir

jeux tant qu'il en eut le gouvernement, et ne la trouva pas en nécessité qu'il la falust garder à force d'armes, ou reconquerir ce qu'elle auroit perdu. Et à l'opposite Fabius voyant devant soy plusieurs fuittes, routtes et desfaittes, 5 plusieurs meurtres et morts de capitaines generaulx des armes Romaines, les lacs, les plaines, les bois remplis de leurs desconfitures, les fleuves et ruisseaux regorgeans de sang et de corps morts jusques à la mer, prit en main le gouvernement de la siene, et par un moyen de proce- 10 der tout different des autres, la sousteint et estaya des-soubz, de maniere qu'il la garda de tumber à plat par les demolitions et ruines que les autres y avoyent faittes. Toutefois on pourroit aussi dire qu'il n'est pas si difficile de manier une ville humiliee par adversitez, et qui, con- 15 trainte par la nécessité, se laisse gouverner au plus sage, comme de refrener la fierté et l'insolence d'un peuple enorgueillly et élevé par longue prosperité, ainsi comme Pericles vint à bout des Atheniens. Aussi la grande multitude de tant et de si griefves calamitez qui advindrent 20 lors aux Romains, monstra bien que Fabius estoit un grave et constant personnage, qui ne se laissa point aller aux crieries d'une commune, ny jamais ne se departit de ses premiers conseilz.

II. Et peut on opposer à la prise de Samos, que Pericles prit à force, le recouvrement de Tarente, et à l'isle d'Eubœe, les villes de la Campagne, qu'il retira, exceptee celle de Capoue, que les consuls Furius et Appius recouvrerent. Mais il semble que Fabius ne gagna jamais bataille, sinon celle la dont il triompha la premiere fois, 30 là ou Pericles dressa neuf trophées des batailles et victoires qu'il avoit gaignees, tant par mer que par terre. Vray est

aussi que lon ne sçauroit alleguer un tel acte de Pericles, comme fut celuy de Fabius quand il recourut Minutius des mains de Hannibal, et preserva une armee toute entiere de Romains : qui fut sans point de doubte un faict
5 digne de grande gloire, comme procedant de prouesse, sagesse et bonté tout ensemble : mais aussi ne fait onques Pericles un tel erreur, comme fait Fabius, quand il fut affiné et abusé par la ruse des bœufs de Hannibal, ayant trouvé son ennemy, qui par cas d'adventure s'estoit de
10 luy mesme enfermé dedans le destroit d'une vallee, et l'ayant laissé eschapper la nuict par subtilité, et le jour par force : car il fut prevenu par trop dilayer, et batu par celuy qu'il tenoit enfermé. Et s'il fault qu'un bon capitaine non seulement use bien de ce qu'il a present en
15 main, mais aussi qu'il juge sagement de ce qui est à advenir : la guerre des Atheniens se termina tout en la mesme sorte que Pericles leur avoit predict : car par ambition de vouloir trop embrasser, ilz perdirent leur estat : et au contraire, les Romains ayans envoyé Scipion en Afrique
20 pour y faire la guerre aux Cartaginois, gaignerent tout ce qu'ilz voulurent, ayant leur capitaine vaincu, non par fortune, mais par vaillance et par prouesse leurs ennemis : de maniere que le bon jugement de l'un est tesmoigné par la ruine de son païs, et l'erreur de l'autre adveré par
25 l'heureux evenement de ce qu'il avoit voulu empescher. Or est-ce faulte pareille à un capitaine de tumber en un inconvenient non attendu ne preveu, que par defiance faillir à embrasser l'occasion de faire un grand exploit quand elle se presente : car mesme default d'experience
30 engendre temerité à l'un, et oste l'assurance à l'autre. Voila quant à leurs faicts de guerre.

15 D : à avenir — 24 D : averé

III. Et quant aux actes de gouvernement civil, c'est un grand reproche à Pericles d'avoir esté auteur de la guerre : car on tient que luy seul en fut cause, en s'ahurant à ne vouloir point que lon cedast pour peu que ce
5 fust, aux Lacedæmoniens : toutefois il m'est advis que Fabius Maximus ne ceda luy mesme non plus aux Cartaginois, ains se presenta hardiement et courageusement à tout danger pour maintenir contre eulx l'empire de son païs. Mais la debonaireté et clemence que Fabius monstra
10 envers Minutius, condamne fort les brigues et menees de Pericles à l'encontre de Cimon et de Thucydides, tous deux gens de bien et d'honneur et tenans le party de la noblesse, qu'il feist chasser de la ville et les bannir à certain temps. Aussi estoit l'autorité et la puissance de
15 Pericles en sa chose publique plus grande, moyenant laquelle il empescha qu'il n'y eust de son temps aucun capitaine qui executast sa folie et sa temerité au dommage du public, excepté Tolmides seul qui luy eschappa, et malgré luy s'alla aheurter contre les Boëotiens, ou il
20 demoura : car tous les autres au demourant luy adhererent, et se renegerent à sa vouldunté pour la grandeur de son autorité : là ou Fabius, encore que quant à luy il ne feist point de faulte, et qu'il allast seurement en besongne, si est-ce que pour n'avoir pas esté assez fort pour empes-
25 cher les autres de faillir, semble avoir esté en ce regard defectueux : car les Romains ne feussent pas tumbés tant de calamitez, s'il eust eu autant d'autorité à Rome, comme Pericles en avoit à Athenes. Et quant à la liberalité, l'un la monstra en ne vouldant point accepter l'argent
30 qu'on luy presenta, et l'autre en en donnant à ceulx qui en avoyent besoyn, et racheptant ses citoyens qui estoient

4 A : que lon cedast un peu aux Lacedæmoniens

prisonniers : toutefois il n'y despendit pas grande somme de deniers, ains environ trois mille six cents escus seulement : là ou il ne seroit pas facile à dire combien Pericles pouvoit amasser d'argent et de presens par le moyen de
5 son autorité, tant des subjects et alliez mesmes des Atheniens, comme aussi des roys et princes estrangers : en quoy neantmoins il teint tousjours ses mains nettes de toute concussion. Mais au reste, quant à la beaulté et magnificence des temples, ouvrages et edifices publiques,
10 tous les ornemens ensemble qui furent onques à Rome avant le temps des Cæsars, ne sont pas à comparer à ceulx dont Pericles embellit et orna la ville d'Athenes : car il n'y a point de proportion ny de comparaison de la sumptuosité excellente et magnificence des uns aux autres.

13 D: de la sumptuosité et excellente magnificence des uns aux autres

ERRATUM

P. 21, l. 26 : *au lieu de* qui ne mesloyent
lire qui ne se mesloyent

